

San Mateo

Mamabuinore coyuiyebu Mateo bácu ùi toivaiye báquede Jesucristorã. Mateo bácu barejaquémavu judíovacacu, Galilea âmícurijoborôcacu, aru Jesús ùi yávaiye méne beorí coyucôjeimaracacu. Leví âmícucu barejaquémavu Mateo bácu, ñai jabovare tãutũra ícaipôecu bácu, Roma âmícuro jaborôre memenu mácu, Jesús ùi órejaquiyi jipocare ù mácure. Majidivũ ne dápiayepe iye coyuiyede Jesucristorã toivarejaquemavu ù mácu cucu bácu Israel bácu pãramena ne curijoborói. Pôecu cubebi majicu ye uju ùi toivaiju bácarôre diede, ubenita obedivũ majidivũ ne dápiayepe ãniuju bácarôre 70 d.C. jipocare.

Mateo bácu jáðovarejaquemavu Jesúre yópe jabocupe. Toivarejaquemavu judíovare, ne majinajiyepe ayu Jesúre Jũmenijicui daroimu macuyãre, yópe ùi coyucôjeiye báquepedeca úre coyucaipôeva mácavũre aru ne toivaiye báquepedeca Majepacu Jũmenijicui yávaiye javequede coyuitucubore. Coyurejaquemavu 1:1 David bácu aru Abraham mácu Jesús ùi jipocacavu bácvũre, dápiare ðacuyũ Jũmenijicu “Yópe ðarãjare”, ùi aipe báquepedeca na mácavũque (Gn 15:18, 2 S 7:8-16). Jáðovarejaquemavu Jesúre yópe bueipôecupe máre. Cũinãpũrũpe paiye Jesús ùi coyuiye báquede toivarejaquemavu Mateo bácu: (1) Jũmenijicui jaboteinore coyũno (caps. 5-7); (2) Jesús ùi yávaiye méne beorí coyucôjeimarare cõjeiyede coyũno (cap. 10); (3) jári dápiari ne ðarãjiyepẽ ainore coyũno (cap. 13); (4) aipe ðaiye jaurôre Jesúre ju aipôevare coyũno (cap. 18); aru (5) ijãravũ cũiyede aru Jũmenijicui jaboteino buiyede coyũno (caps. 13-24).

Jesucristo ùi jipocacavu bácvũre coyũno (Lc 3.23-38)

1 ¹Yũ toivaquijivũ ne ãmiãre ina Jesucristo ùi jipocacavu bácvũre, ùi jipoca põeteivũ bácvũre. Útame ñai jabocu bácu David bácu pãramecu, aru Abraham mácu pãramecu máre.

²Abraham mácu Isaac bácu pacu barejaquémavu. Isaac bácu Jacob bácu pacu barejaquémavu. Jacob bácu Judájã mácvũ népacu barejaquémavu. ³Judá bácu Fares bácu aru Zara bácu népacu barejaquémavu. Aru Tamar bácu népaco barejaquémavu. Fares bácu Esrom mácu pacu barejaquémavu. Esrom mácu Aram mácu pacu barejaquémavu.

⁴Aram mácu Aminadab bácu pacu barejaquémavu. Aminadab bácu Naasón mácu pacu barejaquémavu. Naasón mácu Salmón mácu pacu barejaquémavu. ⁵Salmón mácu Booz bácu pacu barejaquémavu. Aru

Rahab bácu jípaco barejaquémavu. Booz bácu Obed bácu pacu barejaquémavu. Aru Rut bácu jípaco barejaquémavu. Obed bácu Isaí bácu pacu barejaquémavu. ⁶Isaí bácu David bácu pacu barejaquémavu. Ñai David bácu Israecavu bácvũ ne jabocu barejaquémavu. David bácu Salomón mácu pacu barejaquémavu. Aru Urías bácu márepaco jípaco barejaquémavu.

⁷Salomón mácu Roboam mácu pacu barejaquémavu. Roboam mácu Abías bácu pacu barejaquémavu. Abías bácu Asa bácu pacu barejaquémavu. ⁸Asa bácu Josafat bácu pacu barejaquémavu. Josafat bácu Joram mácu pacu barejaquémavu. Joram mácu Uzías bácu ñecu marejaquémavu. ⁹Uzías bácu Jotam mácu pacu barejaquémavu. Jotam mácu Acáz bácu pacu barejaquémavu. Acáz bácu Ezequías bácu pacu barejaquémavu. ¹⁰Ezequías bácu Manasés bácu pacu barejaquémavu. Manasés bácu Amón

mácui pacu barejaquémavu. Amón mácu Josías bácu pacu barejaquémavu.

¹¹ Josías bácu Jeconíajā mácavu néñecu marejaquémavu. Dinumũare, ne curinumũare, ina Babilonia āmicurōcavu bācavu ne buorī nũvaimara marejaquémavu maja Israecavu maje jipocacavu bācavu. Na mácavũre nũvarejaquemavu pũ Babilonia āmicurōita.

¹² Na mácavũre ne buorī nũvariburu yóboi, Jeconías bácu Salatiel bácu pacu barejaquémavu. Salatiel bácu Zorobabel bácu pacu barejaquémavu. ¹³ Zorobabel bácu Abiud bácu pacu barejaquémavu. Abiud bácu Eliaquim mácu pacu barejaquémavu. Eliaquim mácu Azor bácu pacu barejaquémavu. ¹⁴ Azor bácu Sadoc bácu pacu barejaquémavu. Sadoc bácu Aquim mácu pacu barejaquémavu. Aquim mácu Eliud bácu pacu barejaquémavu. ¹⁵ Eliud bácu Eleazar bácu pacu barejaquémavu. Eleazar bácu Matán mácu pacu barejaquémavu. Matán mácu Jacob bácu pacu barejaquémavu. ¹⁶ Jacob bácu Joséi pacu barejameda. Nai José Maríai márepacu barejameda. Aru María Jesúi paco barejácoða. Nai Jesús Jūmenijicu ũi epeimũ, Cristo, barejameda.

¹⁷ Que baru Abraham mácu curinumũre, pũ David bácu curinumũita, catorce paiyajuboa bācavu curejaquemavu. Aru David bácu curinumũre, pũ ina Babilonia āmicurōcavu bācavu ne buorī nũvaiyeta maja Israecavu maje jipocacavu bācavũre Babiloniaita, apenv catorce paiyajuboa bācavu curejaquemavu. Aru maja Israecavu maje jipocacavu bācavũre ne buorī nũvaiyede, pũ nai Cristoi pōeteiyeta, apenv catorce paiyajuboa bācavu curejaquemavu.

Jesucristo ũi pōeteino

(Lc 1.27, 31, 2.1-7, 21)

¹⁸ Yópe barejávũya Jesucristo ũi pōeteino mácarō. Jípaco bacodó María āmicuco barejácoða. Joséi márepaco bacodó barejácoða. Óre ũi nomicubedata

cāreja, javeta ō micatedejaquemavu nai Espíritu Santo ũi paruéque.

¹⁹ José boropatebecu barejameda Jūmenijicu jáinore. Que baru María ōi juedojicure eaiyede coreóvarī, judíova ne daicōjeiyepedeca ðaiyurī, óre jarũvacũyũ barejameda. Ūbenita Josécapũravu ye jarũvaiyũbedejameda óre pōeva ne jáiyede, “Cuyoje tede ðaquijichũvũ yũ óre” ayũ. Que baru óre pōeva ne jámene jarũvaiyũrĩdurejameda nai José. ²⁰ Ūi nópe ðápiarĩburu yóboi, cūinácu ángele, Jūmenijicu ðaroimũ, earejameda vuorũmũ José yebai. Aru yópe arī, coyũrejameda ũre:

—Mũ, José, David bácu pāramecu, jidũbecuva Maríare nomicũjacu mũ. Espíritu Santo ũi juedojímo mácotame ō. ²¹ Ūmũ juedojicure cũvacodome ō. Ū macũyũme meadacũyũ ũi pōevare, ne āmeina teiyede jarũvarī. Que baru ũ macũyũ Jesús āmicucũyũme ũ, arejameda nai ángele Joséde.

²² Caiye iye nópe vaidéjavũya cūinátrũ Jūmenijicu ũi coyũcōjeiye báquepedeca cūinácu ũi yávaiyede coyũcaipōecu bācure. Yópe arī, toivaicōjenejaquemavu ũ mácure Jūmenijicu:

²³ Nomió ũmucubecova juedoearī juedocũvacodome ō. Emanuel āmicucũyũme ũ macũyũ, arejaquemavu nai Jūmenijicu yávaiyede coyũcaipōecu bācu. Emanuel aiyũrō, “Jūmenijicu majaan cubi”, aiyũrōtamũ. ²⁴ Que teni José coedarī, ángele ũi aye báquepe ðarejameda. Maríare nũvarejameda ũi cũrami. ²⁵ Ūbenita óque cũbedejameda cāreja, pũ ōi mácure juedocũvarĩburu yóboita. Aru ōi juedocũvaede, “Jesús bájacu mũ” arī, amidorejameda José.

Abíacovare bueipōeva

Jesúre ne járanũino

2 ¹ Belén āmicurĩmaroi, Judea āmicurijoborōi, pōetedejameda Jesús. Ūi pōeteiyede dijoborōcavu ne jabocu Herodes āmicucu barejameda. Ū curejameda Jerusalén āmicurĩmaroi.

Dinũmre aviá dainocavũ, abiacovare bueipõeva, earejaimada Herodes yebai.

²Earĩ, yõpe arĩ, jẽniari járejaimada:

—¿Muja judíova muje jabocu bacuyá, ári põetecuba ñ? Cũinácu abiacoru ñi põeteiyede jádovañure jári, daivubu ñuja, jínajivu mearore úre, arejaimada ina abiacovare bueipõeva.

³Apevu diede ne coyuiyede jápiarĩ, ãmei cãrijiñũ marejámeđa ñai jabocu. Ñi jabocu bae boje, apecu jabocu ñi põeteiyede jápaiyubedejaquemavu. Aru obedivu Jerusalécvã máre cãrijiñũ barejáimada. ⁴Cãrijiñũ, úre memecaivure órejaicõjenejameđa Herodes apevu sacerdotevare jaboteipõevare aru Jũmenijicui yávaiye báquede bueipõevare máre. Ne eaiyede, yõpe arĩ, jẽniari járejameđa ñai jabocu:

—¿Ári põeteyuba Jũmenijicui epeimu ijãrvãui, ñai Cristo? arejameđa náre.

⁵Yõpe arĩ, coyurejaimada úre:

—Belén ãmicurĩmaroi, Judeacarõi, põetecuyume Jũmenijicui epeimu, ñai Cristo. Yopedeca toivaicõjenejaquemavu Jũmenijicui yávaiyede coyũcaipõecu bácvare:

⁶Judea ãmicurijoborõcarõ ñmaro, Belén ãmicurĩmaroi, põetecuyume ñai, Israecavũ ne jabocu bacuyá, náre jípacatecvũ. Que baru diĩmaro quĩjinoacari, parũrõ maquiyébu, arĩ coyurejaquemavu Jũmenijicui yávaiyede coyũcaipõecu bácvare, arejaimada ina judíovai jabova Herodede.

⁷Ne coyurĩburu yõboi, úre memecaivure yavenina órejaicõjenejameđa Herodes ina abiacovare bueipõevare, põeva ne jápiabenoĩ. Náque boroteni, coreóvarĩ majidejameđa aipiye bajure abiacoru ñi járorõ mácarõre. ⁸Majicũ bácvã, náre jarorejameđa pu Belén ãmicurĩmaroĩta. Yõpe daicõjenejameđa náre:

—Vorãñjara muja juedojicure. Vorĩ eaiyvũ bácvã, coyurãdajarã yure cojedeca. Yũ máre nũcvũmu ñi yebai, mearore jícvũ ùre, arejameđa borocvcũ ñai Herodes.

⁹Jápiavũ bácvã ñi coyuiyede, ina abiacovare bueipõeva mái nurejaimada, yõpe ñai jabocu ñi aiye báquepedeca. Que teni abiacoru, ne jáimũ mácvã aviá dainocapũrvãui, náre jípacateni nurejameđa pu ñi eaiyede juedojicui curĩnamine. Aru diñami pũenoĩ mautedejameđa. ¹⁰Ne jáiyede abiacoru mauteyure cuibeda diñami pũenoĩ, urãrõ torojurejaimada ne ùmei. ¹¹Diñami cũrami jívũui ne ecoiyede, járejaimada juedojicure jípacõ Maríaque. Nuatutarĩ ñi yebai, jídejameđa mearore úre. Que teni ne cvve ñmaritõcuare voarĩ, úrure, olíbano ãmicue mumijuede, aru mirra ãmicue mumijuede máre jídejameđa úre. ¹²No yõboi, vnorũmũ, Jũmenijicui copainuicõjemenejameđa náre Herodes yebai. Que baru ma apemamata copainurejaimada ne curõita.

Jesúĩ bũcvã Egiptoĩ ne dupini nũino

¹³Ina abiacovare bueipõeva ne nũriburu yõboi, cũinácu ángele, Jũmenijicui daroimũ, cvetedejameđa Joséde vnorũmũ. Yõpe arĩ, coyurejameđa úre:

—Coedarĩ, nacajari, nvajacũ juedojicure, jípacore máre, Egipto ãmicurijoborõita. Dupini nũjara muja. Juedojicure vorĩ, boarĩ jarũvaicõjecvũme Herodes. Que baru mautejarã muja nore pu “Nũjara”, ji aiyeta cojedeca, arejameđa ñai ángele Joséde.

¹⁴Coedarĩ, juedojicure, jípacore máre, nvarejameđa José. Diñamimareca Egipto ãmicurijoborõita dupini nurejaimada na. ¹⁵Aru nore, Herodes ñi yãibéde cãreja, mautedejaimada na. Caiye iye nópe vaidéjavũya cũinãtũra Jũmenijicui ñi coyũicõjeiye báquepedeca cũinácu ñi yávaiyede coyũcaipõecu bácvare. Yõpe arĩ, toivaicõjenejaquemavu ñi mácvare Jũmenijicui: “Jĩmacure cutucacũ yũ, ñi etaquiyepe ayũ Egipto ãmicurijoborõre jocarĩ”, arejaquemavu Jũmenijicui.

Herodes ùmũ juedojinare ñi boarĩ jarũvaicõjeino

(Mr 1.24; Lc 2.39; Jn 1.45)

¹⁶Ina abiacovare bueipõeva, ne copainumene Herodes yebai yõpe ñi

cōjeino mácarōpe, Herodecapūravu jorojinejameđa, ne ju abe boje ũre. Ne juvojaiyede coreóvayu b́acu, jorojĩn, churaravare boarĩ jaruvaicōjenejameđa caivu ina ũmu juedoĩna púcaũja cuvabevure cãreja. Yópe ũi corevaiyepene ina abiacovare buaipōeva ne coyũie báquepe, mamarũmure ne jáiye báquede abiacovure, Herodes boarĩ jaruvaicōjenejameđa caivu ina ũmu juedoĩnare, Belén ãmicurĩĩmaroĩ curivure aru no ĩmaro joabenoĩ curivure máre. ¹⁷Yópe Raquel báco òi oiye báquepe, nopedeca ina Belécavu máre orejaimađa. Caiye iye nópe vaidéjavũya cũináturu Jũmenijicu ũi coyũicōjeiye báquepedeca ũi yávaiyede coyũcaipōescu bácu Jeremías bácu. Yópe arĩ, toivaicōjenejaquemavu ũi mácu Jũmenijicu:

¹⁸ Ramá ãmicurĩĩmarore

jápurateavũya urarō ne chĩori oiye. Ico Raquedecabe odo mamara mácvure boje. Nárecabu yaivu b́acavu. Que baru orĩ dajocabebico ò, arejaquemavu Jũmenijicu yávaiyede coyũcaipōescu bácu.

¹⁹ Apenũmua vaiyede, Herodes bácu ũi yainĩburu yóboi, José ũi cuede Egipto ãmicurĩĩjororõi, bediõva cojedeca vnorũmũi cuetedejameđa ũre cũinácu ángele, Jũmenijicuĩ daroimu. Yópe arĩ, coyũrejameđa ũre:

²⁰ —Coedarĩ, nacajari, nũvajacu juedocure, jípacore máre. Muje joborõ, Israel ãmicurĩĩjororõi, nũjara cojedeca. Ñai boaiyucu bácu juedocure jave yaibĩ, arejameđa ñai ángele Joséde.

²¹ José coedarĩ, nũvarejameđa juedocure jípacoque. Aru copainurejaimađa Israel ãmicurĩĩjororõita. ²² Israecarõ Judea ãmicurĩĩjororõi nũjurorivu barejáimada na. Ũbenita Herodes bácuĩ mácu, Arquelao ãmicucu, Judeacavure jaboteyu barejáimeđa jípacu bácu yóboi. Aru die borore jápiarĩ, jiducu, Josécapūravu cuiyubedejameđa noi. Bediõva cojedeca vnorũmũi, Joséde

nore nũicōjemenejameđa Jũmenijicu. Que baru apeno Israecarõ, Galilea ãmicurĩĩjororõi, nũrejaimađa Joséjã. ²³ Nazaret ãmicurĩĩmaroĩ nũri, earĩ, curejaimađa na. Nópe vaidéjavũya cũináturu Jũmenijicuĩ coyũicōjeiye báquepedeca ina ũi yávaiyede coyũcaipōeva mácvure. Yópe arĩ, “Ñai Cristo Nazarecacu bacuyũme”, arejaquemavu na mácvu.

Juan Bautista ũi coyũino Jũmenijicuĩ yávaiyede pōescubenoĩ

(Mt 4.17, 7.19, 12.34, 23.33; Mr 1.1-8, 15; Lc 3.1-9, 15-17; Jn 1.19-28, 8.33)

3 ¹ Obediũja yóboi, Juan Bautista coyũĩ búrejameđa Jũmenijicuĩ yávaiyede. Judea ãmicurĩĩjororõcarõ pōescubenoĩ, pōeva vaivure coyũre curejameđa nore. ² Yópe arĩ, coyũrejameđa:

—Chĩori dápiarĩ muje ãmeina teiyede, oatũvajarã muje ðaiyede. Muje nópe ðaiyede, maumena mũjare jabotecuyũme Jũmenijicu, arejameđa, coyũyu náre.

³ Nai Juan Bautista barejaquemavu Jũmenijicuĩ yávaiyede coyũcaipōescu bácu Isaías ũi coyũimu mácu. Javede yópe arĩ, Isaías bácu coyũicōjenejaquemavu Jũmenijicu Juan Bautista bacuyũrã:

Jũmenijicũre coyũcaipōescu coðoboboyũre jápiarãjarama pōescubenoĩ: “Meađajarã muje ũmene copu etaburĩ maje jabocure, nopedeca muje meađaiyepene daimare ñai ũmu, muje pueðaimu, ũi daquiye jípacai. Que ðarĩ dajocajarã muje ãmeina teiyede Jũmenijicuĩ daroimu macuyũ ũi daquiye jípacai, Jũmenijicuĩ copu etaquiyepe ayu mũjare”, arejaquemavu Isaías bácu, coyũyu Juan Bautista bacuyũrã.

⁴ Juan Bautista dorejameđa camello ãmicucuĩ podaque ðaicajede ũi cuitótecaje. Aru ũi jarióicãva máre ãimacajequede ðaicãva marejãvũya.

Ë ãre curejameða mujuñuvare aru mumicorore máre, yópe apevu nócvav çave çuvabevure. ⁵Obedivü pöeva, Jerusalén ãmicuriĩmarocavü, Judea ãmicurijoboröcavü, aru Jordán ãmicuriya jia êcaruacavü máre jápiarãnurejaimaða Juan Bautista yebai. ⁶Aru jiai, Jordán ãmicuriyai, na coapa “Ãmecübu yu” ne arĩburu yóboi Jũmenijicure, ne chĩori dápiaye boje ne ãmeina teiyede, jáðovarejameða Jũmenijicuque.

⁷Obedivü judfövai jabova, fariseo ãmicuriyajubocavü aru saduceo ãmicuriyajubocavü máre, jáðovaranurejaimaða Jũmenijicuque jiai. Æbenita na eavüre jári, yópe arejameða Juan Bautista:

—iMuja jujovaiuvbu, muje ðaiye boje mearape! iAru ðdavape paivübu muja, muje ãmeðaiye boje apevure! Jũmenijicui jorojĩquijãravü eaiyede, jáve dupini buojabenamu muja.

⁸Ðajarã muja yópe pöeva chĩoivü ne ãmeina teiyede, oatuvavü ne ðaiyepe. ⁹Yópe arĩ, “Majeñecu Abraham mácu meacu barejaquemavü. Jũmenijicu yóvarejaquemavü ã mácvure. Que baru meara bajutamu maja Jũmenijicui jáinore. Aru ãi jorojĩquinore dupini buojarãjaramu maja”, arĩ dápiabejarã muja. Jáve çoyuyübu mujare: Muja oatuvabevü baru, Jũmenijicui jorojĩquijãravü eaiyede dupini buojabenamu muja. Jápiajarã. Jũmenijicu ucü baru, buojaibi oatuvavü iboá çuraboare Abraham mácuĩ páramena márajivüre ðacuyü, ne ðarãjiyepe ayü yópe ãi uröpe. ¹⁰Yópe jiore memeipöescu ãi jáiyede jocucua jëidua mearua çübecure ãi jioi, ãi jaruvajuroepe dicuáre toaboi, nopedeca Jũmenijicu jáñu mujare mearo ðabevüre, jaruvacuyüme mujare toabo cüiméboi.

¹¹Yu jáve mujare jáðovavü Jũmenijicure ocoque, muje chĩori dápiaye boje muje ãmeina teiyede. Æbenita dacuyüme ji yóboi cüinácu, ji pueno parucu. Æ macuyüme jáðovañu mujare Jũmenijicuque Espiritu

Santoque, ãi çuquiyepe ayü mujaque aru ãi cadatequiyepe ayü mujare máre. Aru ã macuyüme jáðovañu mujare Jũmenijicuque toaque máre, muje meara tenajiyeye ayü yópe pöeva ne meadaiyepe táure toaque, aru ãi ñájine ðaquiyepe ayü mujare, meara tebedu. Que baru caivü pueno meacu bajube ã. Yúcapüravü pare ãi cãchinocacübu. Que baru ãre cadateni buojabevü yu. Pü oarĩ buojabevü yu nuvacayü ãre ãi curaidoare. ¹²Yópe oteiyede memeipöescu ãi veoyepe jaraboque, oteiyede epecuyü ãi epeiñami, aru oteiyede cajeáre juacuyü, nopedeca Jũmenijicu ãre ju aivüre epecuyüme ãi jaboteinoi aru ãre ju abevüre jaruvacuyüme toabo cüiméboi, arĩ buedejameða Juan Bautista.

Juan Bautista ãi jáðovaino Jesúre Jũmenijicuque

(Mt 12.18, 17.5; Mr 1.9-11; Lc 3.21-22, 9.35)

¹³Dinüme Jesús nurejameða, etacuyü Galilea ãmicurijoboröre jocarĩ, pü Juan Bautista yebaita, Jordán ãmicuriya jiai, ãi jáðovaquiyepe ayü ãre Jũmenijicuque. ¹⁴Juan Bautistacapüravü ãre jáðovaiyübedejameða. Que baru arejameða Jesúre:

—Yure javü mi jáðovaino ocoi Jũmenijicuque, ji ãmeina teiye boje. Murecabu meacu baju. Que baru müre javbevü ji jáðovaino ocoi Jũmenijicuque, arejameða Jesúre Juan Bautista.

¹⁵Æbenita Jesúcapüravü arejameða: —Yópe Jũmenijicui ðaicöjeiyepe ðaiye javü majare. Que baru müre javü mi jáðovaino yure ocoi Jũmenijicuque, arejameða ãre Jesús.

Que baru Juan Bautista jáðovarejameða Jesúre Jũmenijicuque no jiai. ¹⁶Ëi jáðovariburu yójiñboi, maumena marejameða Jesús jiare jocarĩ. Dinümmiãreca vorĩ nurejavãya cavarö mearo Jũmenijicui çurö. Aru Jũmenijicui Espiritu jurecope êmeni tubacodaðore ãi puenora járejameða Jesús. ¹⁷Aru ina çurivü noi jápiarejaimaða apeno yávinore, cavarö

mearo Jūmenijicui curōque aiyede yópe: “Ñainecabe jímacu, jí umu. Me torojuvu yu úre”, arejamedá Jesúre Jūmenijicu.

**Abujuvai jabocu úi Jesúre
jujovariđuino**

(Mr 1.12-13; Lc 4.1-13; He 2.18, 4.15)

4 ¹Dinumure ñai Espiritu Santo nuvarejamedá Jesúre pōecubenoí, ñai abujuvai jabocu úi jujovariđuquiyepé ayu úre. ²Aru cuarenta paijāravua, cuarenta paiñamia yéde amenejamedá Jesús. Que baru no yóboi ávúé ijidejavūya úre. ³Ñai jujovayu, Satanás āmicucu, earí, Jesús āuyaiyure coreóvarí, arejamedá úre:

—Jāveneca Jūmenijicui mácu baru, āiye dajacu iboá cūraboare, arejamedá.

⁴Ūbenita Jesús arejamedá ñai abujuvai jabocure:

—Mí aiyepe đabevu yu. Jūmenijicui yāvaiye úi toivaicōjeiye báque coyuvu yópe: “Pōeva cubenama ne āiye matuiyeda. Qué Nora curājarama caiye Jūmenijicui yāvaiyeque máre”, arejamedá Jesús.

⁵Que aríburu yóboi, ñai abujuvai jabocu nuvarejamedá Jesúre Jerusalén āmicuriímaroi. Úre muri nure đarejamedá Jūmenijicui cūrami puenora.

⁶Aru arejamedá úre:

—Jāve Jūmenijicui mácu baru, turí nujacu yore jocarí, pu joborōita. Que baru Jūmenijicui yāvaiye úi toivaicōjeiye báque coyuvu mi borore yópe: “Jūmenijicu jarocuyume úi ángelevare, ne coreñaiyepé ayu mure. Jāmuórajarama mure ne puruáque mi ijíe tebequiyepé aivu mi cubobare cūraboque”, arí toivarejaquemavu. Que baru mi turí nuru, yu jāñu buojacuyumu Jūmenijicu đayure yópe úi aiye báquepedeca, arejamedá Jesúre ñai abujuvai jabocu.

⁷Aru Jesúcapūravu arejamedá úre:

—Mí aiyepe đabevu yu. Jūmenijicui yāvaiye úi toivaicōjeiye báque coyuvu yópe: “Jujovabeyacu mi jabocu Jūmenijicure. Jāđovaicōjemejacu úi parúede”, arí toivarejaquemavu. Que

baru yéde đabevu yu, jāđovaicōjeyurocu úi parúede. Majivu yu parucure, arejamedá Jesús.

⁸Aru bediōva cojedeca ñai abujuvai jabocucapūravu nuvarejamedá Jesúre. Cūracū ūmujuricū puenoi jāđovarejamedá caiye ijāravucarōa ĩmaroare aru caiye die cūve méne máre. Aru arejamedá úre:

⁹—Caiye iye jabocubu yu. Que baru jíquijivu mure caiye iyede, mi ñuatutarí mearore jídu yure, arejamedá Jesúre ñai abujuvai jabocu.

¹⁰Dinumure Jesúcapūravu arejamedá úre:

—Mí aiyepe đabevu yu. Aru mu, Satanás, maumena nujacu mu yure jocarí. Jūmenijicui yāvaiye úi toivaicōjeiye báque coyuvu yópe: “Mearore jíjacu mi jabocu Jūmenijicure aru úre cūinácura memecajacu yópe úi urōpe”, arejamedá Jesús.

¹¹Que baru ñai abujuvai jabocu nurejamedá Jesúre jocarí. Aru ángeleva coreni cadatedejaimada úre.

Jesús Galileai úi bueni buino

(Mt 3.2, 14.3; Mr 1.14-15, 6.17; Lc 3.19-20, 4.14-15; Jn 2.12)

¹²Dinumure Herodes āmicucu jabocu buoicōjenejamedá Juan Bautistare. Die borore jápiayu bācu Jesús, nurejamedá Galilea āmicurijoborōi. ¹³Nazaret āmicuriímarore dajocarí, nuri apeno joborōi, Zabulón aru Neftalí āmicuriyajuboa pōeyajubocavu ne curijoborōi, nurejamedá Jesús. Capernaum āmicuriímaroi cuscunurejamedá, macajitabu urabu écarui. ¹⁴Nópe vaidéjavūya cūináturu Jūmenijicu úi coyucōjeiye báquepedeca úi yāvaiyede coyucaipōecu bācure, Isaías āmicucure. Yópe arí, toivaicōjenejaquemavu ū mácure Jūmenijicu:

¹⁵Zabulón aru Neftalí āmicurijoborōai, Jordán āmicuriya apeduve, jia uradacapūravui, Galilea āmicurō, judiōva ānevú ne curōtamu.

¹⁶Ina pōeva ñeminoi dobarivu

bácvav ɱrarō mearo miadárore jáđama. Ina pōeva bótainope painoi dobarivv bácvavure, ne ũme yaijuroede, miadáe tuivv náre, arejaquemavv Jūmenijicui yávaiyede coyucaipōecu bácv.

Nópe ũi coyuiyede, yópe aiyurejaquemavv: Ina judíoiva āmev Jūmenijicui yávaiyede jávene majibedejaquemavv aru járavv cūiméjāravv baquinóre cūvabedejaquemavv Cristoi daquiye jipocai.

¹⁷Dinumumiata bueni bárejamedá Jesús. Yópe arí, coyure curejamedá: —Chīori dápiarí mŭje āmeina teiyede, oatuvajarā mŭje đaiyede. Mŭje nópe đaiyede, maumena mŭjare jabotecuyume Jūmenijicui, are nurejamedá Jesús.

Jesús ũi “Dajarā” aino yóvaicvavivv moa boaipōevare

(Mt 9.35; Mr 1.16-20, 39; Lc 5.1-11)

¹⁸Que teniburu yóboi, Jesús cuyv macajitavv ɱrabv Galilea āmicurijitavv ěcarui, járejamedá pucarā ũmuvare, Simóre aru Andrés ĩmacumaquevure. Moa boarí bojedaipevare marejáimada na. Que baru đuvaivv barejáimada ne pápicv ɱracure dibv macajitavv. ¹⁹Ne que teiyede, Jesús arejamedá náre:

—Dajarā yúque. Epequijivv mŭjare, mŭje davarājiyepere pōevare ji yebai, yópe mŭje moare davaiyepere pápicvque, ji meadaquiyepe náre, arejamedá Jesús.

²⁰Que ayure jápiarí, đajocarejaimada ne pápicvare, nurajivv Jesúque. ²¹Aru cuyv cāreja, jipocai járejamedá apev pucarā ũmuvare, Zebedeoi mārare, Santiago aru ĩmacv Juan. ĩmarejaimada népacvque ne jiadocūi, meadaivv ne pápicvare. Jārina, cuturejamedá náre. ²²Quénora cūiná đajocarejaimada dicūre aru népacvare máre, nurajivv Jesúque.

Jesús ũi bueino obedivv pōevare
(Lc 6.17-19)

²³Jesús bueyv barejáme Jūmenijicui yávaiyede caino Galilea

āmicurijoborōi judíoiva cójijiñamiai. Coyuyv barejáme iye yávaiye méne Jūmenijicui jaboteiyede pōevare. Aru meadayv barejáme pōevare caiye duica ijíe coapa aru caino ĩjinore máre. ²⁴Que baru caivv pōeva Siria āmicurijoborōcavv jápiarejaquemavv Jesúi borore. Aru obedivv pōeva név v ijimarare meadarānūvarejaima Jesús yebai. Ina duica ijíede cvvarivvure, ijíede nājivvure, ĩjinore cvrivvure, abujiva ĩmamarare, bidivvure aburi ne jijecamure etaiyeque, aru nacajaiye majibevvure máre meadarejame Jesús. ²⁵Aru obedivv pōeva nurejaima ũi yóboi, Galilea āmicurijoborōcavv, Decápolis āmicurōcavv, Jerusalén āmicurīmarocavv, Judea āmicurijoborōcavv, aru Jordán āmicuriya jia apedvvecavv máre.

Jesús ũi bueino obedivv pōevare cūracūi

(Lc 6.20-23; Hch 7.52; 1 P 3.14, 4.14)

5 ¹Jesús jáñv ina obedivv pōevare, mŭri nurejamedá cūracūi. Noi ũi dobacvñuiyede, buecvuyv ũi bueimarare, ina pōeva nurejaimada ũi yebai. ²Náre yópe arí bueni bárejamedá Jesús, ne majinajiyepere ayv aipe ārojarivvure ina pōevare, Jūmenijicui jaboteimara mārājivvure. Yópe arejamedá:

³—Torojurājarama ina cōmaje ārojarivv ne ũmei, ne coreóvaiye boje ne baju āmeina teivv. Jūmenijicui ũi cadatebedu náre, buojabema đavv meare. Nárecabu Jūmenijicui jaboteimara. ⁴Torojurājarama ina chíoivv ne baju āmeina teiye boje, aru ĩjāravvcavv ne āmeina đaiye boje máre. Nárecabu Jūmenijicui torojure đaquimara. ⁵Torojurājarama ina “¿Meara márica ñŭja?” abevv, ne coreóvaiye boje Jūmenijicui jiyure caiye náre jauéde, ne cvvarājiyepere ayv méne, aru ne đarājiyepere ayv mearore. Mamajāravv edaquijāravv baquinóre, nárecabu Jūmenijicui mearore jícaquimara. ⁶Torojurājarama ina teiyurivv boropatebevure Jūmenijicui

jáinore, yópe áuyaiñv ne áiyuere aru náre cüñóiyede ne úciyuere. Nárecabu Jümenijicui boropatebende ñaquimara. ⁷Torojurájarama ina cõmaje ároje jáivv arevure, ne coreóvayie boje Jümenijicui náre cõmaje ároje jámenu, na máre ñájijmrorivure ne ámeina teiye boje. Nárecabu Jümenijicui cõmaje ároje jáquimara. ⁸Torojurájarama ina pucañmea cübevñ, ne ñaiyue boje caiyede yópe Jümenijicui urõpe, ne baju urõpe ñaiyübevñva. Nárecabu Jümenijicure járajivñ. ⁹Torojurájarama ina cãrijimene ñaiyv arevure, ne baju cãrijimevñva cue boje Jümenijicucque. Nárecabu Jümenijicui “Jímaramu”, ñi aquimara. ¹⁰Torojurájarama ina põeva arevñ ne ñájine ñaimara, ne ñaiye boje mearore yópe Jümenijicui urõpe ñajocabevñva. Nárecabu Jümenijicui jaboteimara. ¹¹Torojurájaramu mñja põeva Jümenijicure ju abevñ ne jaraiyede mñjare, ne ñájine ñaiyede mñjare, aru ne borocurí ámeina coyuiyede mñjara máre, mñje yóvayie boje yure. ¹²Me torojurájaramu mñja. Que teni boje urarõre cavarájaramu mñja cavarõ mearo Jümenijicui curõi. Nopedeca ina javecavñ bécavñ, Jümenijicure ju abevñ bécavñ máre, ñájine ñarejaquemavñ ina Jümenijicui yávaiyede coyucaipõeva mácavñre, mñje jipocavñ bécavñre, arejameña Jesús.

“Yuquirare” aru “põibure” jári dápiaiñ ne ñaräjijeye aino
(*Mr 4.21, 9.50; Lc 8.16, 11.33, 14.34-35; Jn 8.12, 9.5; 1 P 2.12*)

¹³Bedióva Jesús, yópe arí, buedejameña náre:

—Mñjarecabu yópe yuquirape paivñ ijáravñi. Meadaivñbu maje áiyede yuquiraque. Nopedeca mñja meara ñaiyübu põevare. Yuquira maje áiyede meadaivñ. Ñbenita yuquira ejué bñjaru, áiyede meadarí buojabevñ. Quédada põeva jaruvadama diede mára, dimai cuivñ ne curaräjijeye aivñ diena.

¹⁴Mñjarecabu yópe miadãrope paivñ ijáravñi. Cüñáro imaro cãracú pñeno

curõ maru, ye yaveni buojaino ámevñ. Que baru caivñ põeva járajarama diimarore. ¹⁵Põecu pñuibure pñoriburuv yóboi, ñõmemi dibure pñebñ cãchinoi. Quénora ñõimi dibure jocave pñenora. Que baru caivñ diñami cürami curivñ járajarama me. ¹⁶Nopedecabu mñje cue põeva ne jáinore. Ména cñjará mñja ijáravñi, yócvñ ne járajijeye aivñ mñje mearore ñaiyede. Diede jári, coreóvarájarama aipe árojacure majepacu cavarõ mearocacure. Aru “Meacubñ mñ”, arájarama ñre, arejameña Jesús.

Jesús ñi bueino Jümenijicui jaboteiyede aru ñi ñaicõjeyede
(*Lc 16.17*)

¹⁷Cojedeca Jesús, yópe arí, buedejameña náre:

—“Jaruvacudayube”, arí dápiabejará yure iye ñaicõjeyede Jümenijicui coyuiye báquede Moisés bácare, aru ina Jümenijicui yávaiyede coyucaipõeva mácavñ ne coyuiye báquede máre. Diede jaruvacudabevñ yu. Quénora mñjare jáñovacudayubñ aipe aiyurõre, aru aipe ñaiye jaurõre caiye diede jübevñva.

¹⁸Que baru jáve coyuyubu mñjare: Cüñájáravñ yo cavarõ aru yo joborõ máre cüiquiyebu. Ñbenita caiye iye Jümenijicui yávayie, ñi toivaicõjeyebñ báque, ye cüiméquiye. Quénora caiye vaiquiyebu yópe Jümenijicui toivaicõjeyebñ báquepedeca ñi yávaiyede. ¹⁹Caiye iye Jümenijicui yávayie, ñi toivaicõjeyebñ báque, javñv majare. Que baru caivñ pñevare ju are ñaiye javñv caiye diede.

Ñbenina yávabecube Jümenijicui. Ácu pñecu apeñie ñi yávaiyede ju abede ñabecu baru, aru arevure máre bueyñ baru ne ju abede ñabenajijeye ayu, ñrecabe jaboteimñ ámesyuv cavarõ mearo Jümenijicui curõi. Ñbenita ácu pñecu caiye Jümenijicui yávaiyede ju are ñayñ baru, aru arevure máre bueyñ baru ne ju are ñaräjijeye ayu, ñrecabe Jümenijicui jaboteimñ me pueñaimñ macuyá cavarõ mearo Jümenijicui curõi.

²⁰Que baru соууубу мујаре: Мearore даиye јавуу мујаре ina Јүменижциу yáviaye бáquede бueipōeva рүeno aru ina fariseova рүeno máre. Ne рүeno Јүменижциу урōpe дарí, мearore даbevу baru муја, ye Јүменижциу јaboteimara āmenajaramu муја, aru cavarō мearo ўи curōi cubenajaramu муја, arejameđa Jesús.

Jesús ўи бueino пōeva ne jaraiyede
(Lc 12.57-59)

²¹Yōpe arí, buedejameđa Jesús:

—Jápiadavū муја ina javecavu jápiaivu бácvare iye соууиye бáquede yōpe arí: “Pōevare boarí jaruvabejarā муја. Ácv pōescu apescure boarí jaruvayvу baru, ўrecabe nájicuyv”, arejaquemavv. ²²Ћbenita yúcapūravv соууубу мујаре yōpe: Ácv pōescu jarayvу baru apescure, ўrecabe nájicuyv. Ácv pōescu “Árүmecubv му” ayv baru apescure, ўrecabe nájicuyv. Aru ácv pōescu “Jүmenijicure coreóvabecubv му” ayv baru apescure, ўrecabe nájicuyv тоabo cüiméboi. Pōeva nópe āmeina yávaivv apescure āmeina даivubu, yōpe ne boarí jaruvajuroepe ўre.

²³⁻²⁴Que baru му нvvañvу maru mi Jүmenijicure јícaquiyede ўи cүrami, aru нore earí, дápiayv baru apescu chíoñvure mi āmeina даiye boje ўre, epeni дajocajacv mi Jүmenijicure јícaquiyede иva ўre јícaiyede juaiva јipocai. Nүjacv ñai mi āmeina teimv yebai, jēniacuyv ўи ārүmetequiyepе ayv iye mi āmeina teiye бáquede ўre сорv. Mi cārijimene дарíburu yóboi ўqve, copainuri Jүmenijicui cүrami, mi јícaquiyede јíjacv ўre.

²⁵Apescv ўи āmecororv мvре, aru ўи нvvaiyurv мvре јabova ne āmeina teivvure jēniari јáññami, maumena “Meadarājavēv” ajacv ўre, ўи нvvamequiyepе ayv мvре јabova ne āmeina teivvure jēniari јáipōescure, aru ўи jēni јíbequiyepе ayv мvре churaravare, aru ne jaruvabenajiyepе aivv мvре āmeina teivvure jēni јacoiñami јívvi.

²⁶Jāve соууубу мvре: Ne буorv

мvре āmeina teivvure jēni јacoiñami, etabescuyvumu му caiye iye mi bojecvbe даiyede bojeđayuta, arejameđa náre Jesús.

Jesús ўи бueino пōeva ne āmeina даiyede apēvв nēmarebucvvaque
(Mt 18.8-9; Mr 9.43, 47)

²⁷Bediόva Jesús buedejameđa, yōpe arí:

—Jápiadavū муја ina javecavu jápiaivu бácvare iye соууиye бáquede yōpe arí: “Āmeina даbejarā муја apēvв nēmarebucvvaque”, arejaquemavv.

²⁸Ћbenita yúcapūravv соууубу мујаре yōpe: Ácv pōescu јáññvу maru nomióre, jēiyurí дápiayv baru óre, ўrecabe āmeina даyv óque ўи que дápiaiye boje.

²⁹Que baru му āmeina teyv baru mi јáiyede yacorv меapūravcарvque, ñni jaruvajacv didvре. Meaquiyebu бíjaru мvре cüinárv yacorv, Jүmenijicui jaruvabequiyepе ayv mi baju caibajure тоabo cüiméboi. ³⁰Aru му āmeina teyv baru mi даiyede рvгv меapūravcарvгvque, burarí jaruvajacv дipvгvре. Meaquiyebu бíjaru мvре cüinápvrv, Jүmenijicui jaruvabequiyepе ayv mi baju caibajure тоabo cüiméboi, arejameđa náre Jesús.

Jesús ўи бueino nomi jaruvainore
(Mt 19.7, 9; Mr 10.4, 11-12;
Lc 16.18; 1 Co 7.10-11)

³¹Bediόva Jesús buedejameđa, yōpe arí:

—Jápiadavū муја ina javecavu jápiaivv бácvare iye соууиye бáquede yōpe arí: “Ácv pōescu jaruvayvу baru јímarepacore, óre јíjacurí cüináyoca ‘Mvре jaruvayvubu yv’ aiyocare”, arejaquemavv. ³²Ћbenita yúcapūravv соууубу мујаре yōpe: Ácv pōescu jaruvayvу baru јímarepacore āmeina даbecoreca apescvque, ўrecabe āmeina даre даcvyv óre, ўи jaruvaríburu yóboi cvcv baru apescvque. Aru ácv pōescu рvгvбуovv apescv ўи jaruvaimo mácoque, ўrecabe āmeina даyv óque oí mamarvмvсacvре jaruvarí, arejameđa Jesús.

Nópe ayu, “Nomi jaruvainore ubevu yu”, aiyucu barejaquemavu Jesús.

Jesús ñi bueino pöeva “Jäve ðacuyumu” ne aiyede
(Mt 23.22; Stg 5.12)

³³Yópe arí, buedejameda Jesús:
—Jápiadavü muja ina javecavu jápiaivu bácvure iye coyuiye báquede yópe arí: “Borocurí, ‘Jäve ðacuyumu yu ji coyuiyepe’, abejará muja. Quénora ðacajará Jümenijicure caiyede yópe muje coyuiye báquedeca úre”, arejaquemavu. ³⁴Ûbenita yúcapüravu coyuyubu mujare yópe: Muje yávaiyede ye jëniamejara apecure, ñi jáðovaquiyepa aivu muje coyuiye jávene. Cavarõ mearotamu Jümenijicui dobarõ mearo curõ. Que baru jëniamejara cavarõ mearocacure, ñi jáðovaquiyepa aivu muje coyuiye jávene. ³⁵Ijáravutamu yópe Jümenijicui cuboba tuoinope, ñi cuedaiye báque boje ijárvure aru ñi purucvae boje caiyede. Que baru jëniamejara ijárvucacure, ñi jáðovaquiyepa aivu muje coyuiye jávene. Jerusalén ámicurímarotamu Jümenijicu, ñai jabocu parucu baju, ñi imaro. Que baru jëniamejara Jerusalécacure, ñi jáðovaquiyepa aivu muje coyuiye jávene. ³⁶Muja oarí ðabevu cüináme muje poðamene boede aru ñemiéne máre. Jümenijicu cüinárecabe oarí ðayu diede. Que baru jáðovamejara muje coyuiye jávene mi jipobuque. ³⁷Que baru muje yávaiyede ju ajará aru bi ajará quénora. Aprejéne coyüivu baru, ámeina ðajebu. Ina borocurí yávaiyure jëniaiye javu apecure, ñi jáðovariduyepa aivu ne coyuiye jávene. Ûbenita muja jávene yávaiyure jaubevu diede, arejameda Jesús.

Jesús ñi bueino pöeva ne ñájine ðaiyuede ne mauvare
(Lc 8.29-30)

³⁸Bedióva yópe arí, buedejameda Jesús:
—Jápiadavü muja ina javecavu jápiaivu bácvure iye coyuiye báquede

yópe arí: “Ácu pöecu ñi ámedaru apescu yacorure, ñi yacorure máre ámedajará muja. Aru ácu pöecu ñi ámedaru apescu cõpiyore, ñi cõpiyore máre ámedajará muja”, arejaquemavu. ³⁹Ûbenita yúcapüravu coyuyubu mujare yópe: Maucvabejará ina mujare ámedaivure. Quénora cüinácu pöecu ñi pëvaru muje meapüravucaviobure, copedini pëvaicõjeyara muje cãcopüravucaviobure máre. ⁴⁰Aru cüinácu pöecu ñi nuvaicõjenu mujare jabova ne ámeina teivure jëniari jáñami, aru ñi ámecororu mujare, jabocu ñi jícõjequiyepa ayu mujare muje camisare ñai pöecure, ñi nuvaicõjequiyepa jipocai, úre jjárá dicajede aru muje puenocacajede máre. ⁴¹Cüinácu churara ñi nuvaicõjenu mujare ñi cavede cüinákilometro, yópe Romacavu ne jabova ne cõjeinope, nuvacajará diede pucakilometros, diede ðaiyubevuvacari. ⁴²Ñai mujare jëniañure jjárá ñi jëniaiyede, bojedabecureca mujare. Aru ñai mujenore “Jjárá cãreja” ñi aru, ju arí jjárá mujare ñi jëniaiyede máre, jacopaiyovabecureca mujare muje jíye báquede úre, arejameda Jesús.

Jesús ñi bueino maje urõre maje mauvare
(Lc 6.27-28, 32-36)

⁴³Jesús buedejameda cojedeca:
—Jápiadavü muja ina javecavu jápiaivu bácvure iye coyuiye báquede yópe arí: “Ûjará mujevure aru ubejará muje mauvare”, arejaquemavu. ⁴⁴Ûbenita yúcapüravu coyuyubu mujare yópe: Ûjará muje mauvare. Ina mujare ñájine ðaivure jëniacajará Jümenijicuque, ñi mearo ðacaquiyepa aivu náre. ⁴⁵Que ðaivu baru, majepacu cavarõ mearocacu ñi mára marajáramu muja. Úpe paivu barajáramu muja, muje mearõ ðaiyede mearare aru ámenare máre. Úrecabe aviáre bóre ðayu ina mearare aru ina ámenare máre, aru ocare ðayu ina boropatebevure aru ina boropateivure máre. ⁴⁶Muja, Jümenijicui pöeva, muje aru náre ina urivure mujare, Jümenijicu

ye bojedabecuyume ména pōevare ne que ðaiyede. Ina máre, jabovare tātura ícaipōeva, ámeina ðaivuvacari, nópe ðaðama. ⁴⁷ Mũja, Jūmenijicui pōeva, jacoyuivũ baru mũjevũ quévũra, mearore ðabevũ mũja. Ina máre, judíova ámevũ, ámeina ðaivuvacari, nópe ðaðama. ⁴⁸ Que baru mũjacapūravũ, cōmaje āroje jári, mearore ðajarā arevũre jaubevũva, yópe majepacũ cavarō mearocacũ ũi ðaiyepe, arejameða Jesús.

Jesús ũi bueino aipe ðaiye jaurōre pōevare, ne cadatenajiyeye cōmaje ārojarivũre aino
(Mt 23.5)

6 ¹ Bedíova cojedeca Jesús, yópe arí, buedejameða:
—Me jájara mũja mũje ðaiyede mearore, cadatenajivũ ina cōmaje ārojarivũre. Náre cadatedu, jáicōjenajivũ arevũre mũje ðaiyede mearore. meamejebu. Nópe ðaru, majepacũ cavarō mearocacũ ye bojedabecuyume mũjare.
² Que baru cainũmũa mũje jícaiyede cadatenajivũ ina cōmaje ārojarivũre, jíbejarā caivũ ne jáinoi, yópe ina mũjovaivũ ne jíyepe. Nácapūravũ jíyaima maje cójijiñamiai aru mái máre, jáicōjenajivũ arevũre, ne mearo yávarājiyepe aivũ nára. Jáve soyũyũbu mũjare: Nácapūravũ javede cuvama ne boje caiyede. Arevũ pōeva ne mearore jíye náre, diebu ne boje matuiye. Majepacũ cavarō mearocacũ ye bojedabecuyume náre.
³ Ũbenita mũjacapūravũ, mũje jícaiyede cadatenajivũ ina cōmaje ārojarivũre, ñamene soyubejarā mũje ðaiyede.
⁴ Quénora cainũmũa jíjarā yavenina, arevũ ne coreóvabenajiyeye aivũ. Nópe ðaru, majepacũ cavarō mearocacũ, ñai jáñũ mũje ðaiyede yavenina, bojedacuyume mũjare ména, arejameða Jesús.

Jesús ũi bueino aipe ðaiye jaurōre pōevare, ne jēniarajiyeye Jūmenijicũque aino
(Mr 11.25-26; Lc 11.2-4, 18.10-14)

⁵ Yópe arí, buedejameða Jesús:

—Cainũmũa mũje jēniaiyede majepacũ Jūmenijicũque, ðabejarā yópe ina mũjovaivũ ne ðaiyepe. Nácapūravũ jēniadaima Jūmenijicũque, núrivũ maje cójijiñamiai aru tãibũai máre, jáicōjenajivũ arevũre, ne ména yávarājiyepe aivũ nára. Jáve soyũyũbu mũjare: Nácapūravũ javede cuvama ne boje caiyede. Arevũ pōeva ne mearore jíye náre, diebu ne boje matuiye. Majepacũ cavarō mearocacũ ye bojedabecuyume náre. ⁶ Ũbenita mũjacapūravũ, mũje jēniaiyede Jūmenijicũque, ecorí mũje cāramiai, jedevacobede bieniburu, arevũ ne jámenoi, jēniajara majepacũque mũja coapa. Nópe ðaru, majepacũ cavarō mearocacũ, ñai jáñũ mũje ðaiyede yavenina, bojedacuyume mũjare ména.

⁷ Mũje jēniaiyede majepacũ Jūmenijicũque, cúpecare numejara cūináromia borore mũje soyuiyede. Nópe ðaðama ina judíova ámevũ, Jūmenijicure coreóvabevũ, “Ũrarō ñũje soyũru Jūmenijicure, jápiaquijichubi ñũjare”, ne ũbenina arí dápiaiye boje.
⁸ Ne ðaiyepe ðabejarā mũja. Mũje jēniarajiyeye jípocai javeta coreóvaibi majepacũ cavarō mearocacũ aipe jaurōre mũjare. ⁹ Que baru yópe arí, jēniajara majepacũ Jūmenijicũque:

Mũ, ñũjepacũ, cavarō mearocacũ, meacũ bajubu mũ. Que baru caivũ pōeva mũre pueðarí mearore jíjarāri. ¹⁰ Búre ðajacũ mũ mi jabotequiyede pōevare. Caivũ ijāravũcavũ ðajarāri mearore yópe mi ũrōpe, yópe ina cavarō mearocavũ ne ðaiyepe mi ũrōpe cainũmũa. ¹¹ Jíjacũ ñũjare jāravũva coapa ñũje áiyeva. ¹² Aru ārumetejacũ ñũje ámeina teiyede, yópe ñũja máre ñũje ārumeteiyeye caiye arevũ ne ámeina ðaiyede ñũjaque. ¹³ Ñai abujuvai jabocũ ũi mũjovajuroede ñũjare vainí tuicōjemejacũ ñũjare, ñũje ðabenajiyeye ámenore. Quénora ñũjare ámeðare ðaicōjemejacũ ñai abujuvai

jabocure, arejameđa Jesús, náre
bueyu Jümenijicuque jëniayede.

¹⁴Aru yópe arí, coyure nurejameđa
Jesús:

—Mujacapuravui árumetedu pöevare ne
ámeina teiye báquede mujare, majepacu
cavarō mearocasucapuravui máre
árumetecuyume muje ámeina teiyede.

¹⁵Ûbenita mujacapuravui árumetebedu
pöevare ne ámeina teiye báquede mujare,
majepacu cavarō mearocasucapuravui
máre árumetebecube muje ámeina
teiyede, arejameđa Jesús.

**Jesús üi bueino aipe ðaiye jauröre
pöevare ámevva áiyede ne
jëniarajiyepa Jümenijicuque aino**

¹⁶Yópe arí, buedejameđa Jesús:

—Muje ámene áiyede jëniarajivui
Jümenijicuque, chiore cubejarā pöeva
ne jáinore, ne coreóvarājiyepa aivui muja
ámevure áiyede, muje jëniarajiyepa
aivui Jümenijicuque. Nópe ðaðama
ina jajovaiyu. Nácapuravui chiore
cuyama, jáicöjenajivui apévure ne
ména yávarājiyepa aivui nára, ne áiyede
áme boje. Jáve coyuyubu mujare:
Nácapuravui javede cuvama ne boje
caiyede. Apevu pöeva ne mearore jíye
náre, diebu ne boje matuiye. Majepacu
cavarō mearocacu ye bojedabecuyume
náre. ¹⁷Ûbenita mujacapuravui, muje
áiyede ámene jëniarajivui Jümenijicuque,
chiore cubejarā. Quéhora vaivéni muje
poðare, cüitútujara muje jivare. ¹⁸Muje
nópe ðaru, apévui pöeva coreóvabenama
muja ámevure áiyede. Quéhora
majepacu cavarō mearocacu cünácura
coreóvacuyume muja ámevure áiyede.
Aru ñai jáñu muje ðaiyede yavenina,
bojedacuyume mujare ména, arejameđa
Jesús.

**Jesús üi bueino maje cuvarájiyede
mearo bajure cavarō mearoita**
(Lc 12.33-34; Stg 5.2-3)

¹⁹Cojedeca yópe arí, buedejameđa
Jesús:

—Vobejarā muja urarō muje cuvae
méne ijáravui. Diede bocomiva áinomui,

cura etainomu, aru ñavacurivui ecorí
ñavainomu. ²⁰Ûbenita vojarā muja
urarō muje cuvae méne cavarō mearo
Jümenijicui curöi, bocomiva ne ámenoi,
cura etabenoi, aru ñavacurivui ne ímenoi
máre. ²¹Que baru muje cuvae curöre
dápiarājaramu muje úmeque máre,
arejameđa Jesús.

**Jesús üi bueino pöeva ne ðainore ne
dápiainope**
(Lc 11.34-36)

²²Cojedeca Jesús buedejameđa náre,
úque curivure:

—Pöeva ne yacorua, pëoinope, járe
ðaiyu náre, ne memenajiyepa aino aru
ne majinajiyepa aino ári ne nuiyede.
Pöeva ne yacorua ijetedu náre, ye
ne memeyede aru ne nuiyede máre
majibenama. Aru pöeva ne úme,
yacoruape paino, pëore ðaiyu ne
dápiayede. ²³Que teni pöecu cainumua
dápiayu baru ijáravuquede, ijetede ðaibi
üi úmene, üi dápiabe boje cavarō mearo
Jümenijicui curöquede. Aru ñai pöecu
üi úme bíjacuyume. Que baru pöeva
ne jámenu ne yacoruaque ámenotamu.
Ûbenita püeno ámenotamu ne úme
ñemino maru, arí buedejameđa Jesús.

**Jesús üi bueino táuturare uröre aru
ubenore Jümenijicure**
(Lc 16.13)

²⁴Yópe arí, buedejameđa Jesús
cojedeca:

—Jümenijicure aru táuturare máre
árumejara muja. Cünácui pöecu
Jümenijicure árucu baru, pare árumemi
táuturare. Aru táuturare pare árucu
baru, árumemi Jümenijicure. Que baru
ñai táuturare ucui baru, Jümenijicure
ubecuyume, arejameđa Jesús.

**Jesús üi bueino Jümenijicui coreiyede
üi pöevare**
(Lc 12.22-31; 1 P 5.7)

²⁵Bedióva yópe arí, buedejameđa
Jesús:

—Que baru coyuyubu mujare: Muja
árurivui baru Jümenijicure, cárijimejara

muja apurivü muje ārājijede, muje ūcurājijede máre. Aru cārījimejara muja muje bajure, muje dorājijede máre. Jūmenijicui apure daiye boje mujare, jāve muje āiyede máre cūvare đacuyume. Aru ūi cue daiye boje muje bajuáre, jāve muje doiyede máre cūvare đacuyume. ²⁶Jārjide apa muja ina mǫjinaré. Majepacu cavarō mearocacu jíbi náre ne āiyeva, na otebevureca, aru oteiyede imevureca, aru diede máre epebevureca oteiyede epeiñama jívui. Aru caivu mǫjina obedivü pñeno bojecurivutamu muja, Jūmenijicui pñeno ūe boje mujare. Que baru mujare jauéde jícyume ū. ²⁷Aru mujacacu cārījijñu maru, cūináora cure đarí majibebi ūi cuede ijāravui. Que baru cārījijye meamevu mujare. ²⁸Que baru, ¿aipe teni cārījivurū muja muje dorājijede? Jārjide apa muja iye cóvure, đacarōre. Die bucuiyavū, mememevacari, aru ne cuitótecajeare máre naremevacari. ²⁹Ūbenita coyuyubu mujare: Iye cóvua métamu, caiye icajea ñai jabocu bācu Salomón mácu cuitótecajea bojecuricajea pñeno. ³⁰¡Muja pare quíjino ju aivubu Jūmenijicure! Jūmenijicu nópe mearo đaibi iye cōriáre, caride dái cuede aru javenare pōeva ne juarājijede. Nopedeca Jūmenijicu jícyume mujare muje cuitótecajea meacajeare caiye iye cóvua pñeno. ³¹Que baru cārījimejara muja yéde muje ārājijede, muje ūcurājijede, aru muje dorājijede máre. ³²Ina judíova āmevu, Jūmenijicure ju abevü, cārījini vođama caiye iyede, ne ārājijede, ne ūcurājijede, aru ne dorājijede máre. Aru majepacu cavarō mearocacu majibi caiye iye mujare jauéde. ³³Ūbenita vojarā muja iye Jūmenijicui jaboteinoquede, muje daiyue boje mearore yópe ūi đaicōjeiyere. Aru Jūmenijicu jícyume muje ārājijede, muje ūcurājijede, aru cuitótecajeare máre. ³⁴Que baru cārījimejara iye vaiquiyede mujare javenare. Caijāravua coapa pōeva ñájijñama āmenore. Que baru đápijarā carí jāravuque āmenore, apejāravu edaquijāravuque āmenore

đápiabevüva, arí buedejameđa náre Jesús.

**Jesús ūi pōevare apevure
āmeoroicōjemeno**
(Mr 4.24; Lc 6.37-38, 41-42)

7 ¹Jesús, yópe arí, buedejameđa náre cojedeca:

—“Āmenatamu” arí, āmeorobejarā muja apevure. Muje nópe aru, majepacu Jūmenijicu āmeororí, “Āmenatamu muja” acuyume mujare. ²Yópe muje āmeoroiyere apevure, nopedeca mujare āmeoroicyume Jūmenijicu. Nópe muje apevure jíyepedeca, jícyume mujare Jūmenijicu. ³Ūrarō āmeina teino muje cūvaru, āmeoroiyere jaubevü apevu quíjino āmeina teivure. Nópe daiye yópe bájebu: Me jáivubu muja mujecu ūi docujíe curōre ūi yacorui. Ūbenita jámevu muja muje ūrarō docucurōre muje yacorui. ⁴Aru jámevuvacari muja ūrarō docucurōre muje yacorui, mujecure “¿Mi docujíene inaji mi cūvaede mi yacorui?” arí buojabevü muja. ⁵¡Jūjovavutamu muja! Mamarumu ijara muja muje ūrarō docucurōre muje yacorure. No yóboi mearo jáivuta, ijara mujecu ūi docujíene ūi cūvaede ūi yacorui. ⁶Jūmenijicui yávaiye pñeno me bajure coyubejarā ina pōeva āmenare, diede jápiarí eabevure. Nópe đaru, yópe pōeva ne jíjuroepebu jiaruare yavimivare. Jiarua méne aru āmene máre coreóvabeni, copedini cūñaima náre jívure. Nopedeca ina pōeva āmena, Jūmenijicui yávaiyede jápiayubevü, āmedarājarama mujare diede coyuridivure náre. Aru ji yávaiye méne, pñeno bojecuede pōevare ne ūmei, buebejarā ina pōeva āmenare, diede jápiarí eabevure. Nópe đaru, yópe pōeva ne đuvajuroepebu cūrajiboa bojecurijiboa perla āmicurijiboare vāriva ne jipocai. Nijiboare coreóvabeni, curadaima nijiboare jobo jívui. Nopedeca ina pōeva āmena, ji yávaiye méne jápiayubevü, āmedarājarama mujare diede buenidivure náre, arí buedejameđa Jesús.

**Jesús ùi bueino aipe jèniaiye jaúrõre
Jūmenijicūque aru aipe ðaiye jaúrõre
apevure**

(Lc 6.31, 11.9-13; Jn 14.13-14, 15.7,
16.23-24; 1 Jn 3.21-22, 5.14-15)

⁷Jesús coyurejameða náre yópe:

—Jèniare nūjara Jūmenijicūque, aru jícuyume mūje jèniainore úque. Vore nūjara úre, aru earājaramu. Mūje órejare nūiyede jedevacobei, Jūmenijicu voacacuyume mūjare. ⁸Que baru caivu jèniaivu Jūmenijicūque cavama ne jèniainore. Caivu voivu eadama ne voimure. Aru caivu órejauvure jedevacobei voaibi náre Jūmenijicu, arí buedejameða Jesús.

⁹Aru cojedeca Jesús, yópe arí, buedejameða náre:

—¿Mūja juedocuarivu, mūjemacu úi jèniaru mūjare páubore, jíje bárica mūja úre cūrabore? ¹⁰¿Aru mūjemacu úi jèniaru mūjare moacure, jíje bárica mūja úre áðare? ¡Que ámevu! ¹¹Que baru mūja ámena méne cavaede jíni majiépedeca mūjemarare, majepacu cavarõ mearocacu pueno méne cavaede jíni majibi mūja jèniaivu úre.

¹²Que baru ðajarā ajevure yópe mūje ñepe ðaivu mūjaque me. Nopedeca ðaicójenejaquemavu Jūmenijicu pòevare úi coyūye báquede úi yávaiyede Moisés bácare aru ina Jūmenijicu yávaiyede coyūcaipòeva mácavure máre, arejameða Jesús.

**Jesús ùi bueino jedevacobe
quíjicobede
(Lc 13.24)**

¹³Yópe arí, náre buede nūrejameða Jesús:

—Ecojarā Jūmenijicu jaboteinoi, yópe mūje ecoiyepede jedevacobe quíjicobei. Yópe jedevacobe uracobepe aru urama maiyójabe ne cuimape, obedivu pòeva nūivubu, ne bíjarājiyede toabo cūiméboi.

¹⁴Ubenita yópe jedevacobe quíjicobepe aru quíjima maiyójae ne cuima, obebejina nūivubu, ne meadarājiyede cavarõ mearo Jūmenijicu curõ, arejameða Jesús.

**Jesús ùi bueino maje majinore
jocūca jèidūare**

(Mt 3.10, 12.33; Lc 3.9, 6.43-44)

¹⁵Cojedeca Jesús buedejameða náre, ne majinajiyepede ayu aipe árojarivure bueipòevare:

—Me jájara ina Jūmenijicu yávaiyede coyūcaipòevape teivu, ùbenina ne buenajiyepede aivu borocuede. Námu yópe áimara jíjecurivu lobova ámicurivure paivu. Ovejavape teni ina lobova eodama ne yebai, boarājivu náre. Nopedeca ina borocuede bueivu, Jūmenijicure ju aivure yávaðama, ecorājivu mūje yebai. Ubenita ámeðaiyurivubu mūjare mūje úmei.

¹⁶Náre coreóvarājaramu mūja ne ðaiyeque, yópe maje coreóvayepede jocūcare ðicu jèidūaque. Miuñna jèmevu úyaiboare. Nopedeca jèmevu higo ámicuridua miuñnare. ¹⁷Jocūcu meacu cūvavu jèidua mearuare. Ubenita jocūcu ámeacu, ámeðare cūvavu. ¹⁸Jocūcu meacu cubevu jèiye ámene jícu. Aru jocūcu ámeacu cubevu jèiye méne jícu.

¹⁹Caíye jocūca jèidua mearua cubedu, jiore memeipòescu coení jaruvajebu toaboi. Nopedeca Jūmenijicu ina borocuede bueivure ñájine ðacuyume.

²⁰Nopedeca coreóvarājaramu mūja ina borocuede bueivure aru ina yávaiyede jávene bueivure máre ne ðaiyeque, arejameða Jesús.

**Jesús ùi bueino caivu ne
ecobenajinore Jūmenijicu
jaboteinore
(Lc 13.25-27)**

²¹Bediõva buede nūrejameða Jesús:

—Caivu ina yure aivu “mū, ñūje jabocu”, ubenita ðabevuvacari yópe jípacu, cavarõ mearocacu, úi urõpe, ecobenama úi jaboteinore. Quévura ina úi urõpe ðaivu ecorājarama nore.

²²Ánijāravu daquijāravu baquinóre obedivu pòeva, yópe arí, coyūrajarama yure: “Mū, ñūje jabocu, ñūjarecabu Jūmenijicu yávaiyede coyūcaivu bácvu, aru jaruvavu bácvu abujavare,

aru ure pōeva ne đarī majibede máre đaivu b́acavu mi ámiái, mi paruéque”, arājarama. ²³Dinumu maquinóre náre soyucuyumu yu: “Jívu ámevu muja. ¡Que baru caivu muja ámeina teivu nujara yure jocarí!” acuyumu, arejameđa Jesús, náre ecoicōjemecu J́amenijicui jaboteinore.

**Jesús ũi soyuino ṕacađ́amia ćuramia
đaivu b́acavure**

(Mr 1.22; Lc 4.32, 6.47-49)

²⁴Cojedeca Jesús, yópe arí, buedejameđa náre:

—Ina jápiaivu yure aru đaivu ji cōjeiyere đaivuđu yópe ñai ćuramine đayure jājaroi. ²⁵Ocarí, jia yaborí, oco eaquemavu diñamine. Úrarō japuquemavu úmevu. Úbenita ćijibetequemavu diñami, jājaroi núe boje. ²⁶Úbenita ina jápiaivuvacari yure, đabevu baru ji cōjeiyere đaivuđu yópe ñai ćuramine đayure jājamenoi. ²⁷Ocarí, jia yaborí, oco eaquemavu diñamine. Úrarō japuquemavu úmevu. Aru tuquemavu diñami. Úrarō b́jaino matequémavu, arí buedejameđa Jesús.

Úi nópe aiyede, yópe aiyucu barejaquémavu Jesús: Ina đaivu yópe ũi urópe b́jabenajarama, ubenita ina đabevu yópe ũi urópe b́jarājarama.

²⁸⁻²⁹Aru Jesús ũi buení buojaiyede, ina obedivu pōeva, ũi soyuiyede jápiaivu b́acavu urarō d́apiarí cuicumarejaimađa, ũi bueiye boje náre yópe parucupe ina J́amenijicui yávaie báquede bueipōeva pueno.

Jesús ũi meadaino pojeyure

(Mr 1.40-45; Lc 5.12-16)

8 ¹Jesús émeñu mácure dicú ćuracure jocarí, obedivu pōeva nuřejaimađa ũi yóboi. ²Aru nuřejameđa Jesús yebai ćuinácu pojeyu. Nuatutarí, arejameđa úre:

—Mu, ji jabocu, ucu baru, meadajacu ji pojeiyede. Buojaivu mu meadayu yure, arejameđa.

³Dinutūre Jesús, ũi puquque jabióvarí tuoyu, arejameđa úre:

—Úvu yu. Caride meatejacu mu, arejameđa Jesús.

Aru maumejiena Jesús ũi que aiyede, meatedejameđa. ⁴Jesús soyucōjemecu apévure arejameđa:

—Ćuiná, nuri Jerusalén ámicuríimaroí, jáđovajacu sacerdotede. Aru jíjacu mi meateiye boje, yópe J́amenijicui đaicōjeiyede ũi soyuiye báquepe Moisés b́acure, pōeva ne coreóvarájiyere ayu mi meateinore, arejameđa úre Jesús.

**Jesús ũi meadaino churaravai jabocu
yebacacure**

(Mt 22.13, 25.30; Lc 7.1-10, 13.28-29)

⁵Jesús ũi ecoiyede Capernaum ámicuríimaroí, ćuinácu ũmu, cien paivu churaravai jabocu, nuřejame ũi yebai. Yópe arí, jéniñu marejame, ũi cađatequiyere ayu:

⁶—Mu, ji jabocu, ćuinácu ji yebacacu ćubi ćurami, parayu, nacajaiye majibecu. Aru pare ñájiñume ũ, arejame Jesúre ñai jabocu.

⁷Aru Jesús arejame:

—Yúvacari úre meadacudaquijivu, arejame Jesús.

⁸Úbenita ñai jabocu arejame Jesúre:

—Mu, ji jabocu, meacubu mu. Úbenita yúcapuravu ámecutamu. Que baru đarí ecobejacu ji ćurami. Quénora soyjacu mi cōjeinore. Aru ji yebacacu meatecuyume. ⁹Yurecabu ćucu ne cōjeiyequé ina ji jabova. Aru ćuvavu churaravare, ji cōjeimarare. Nácacu ćuinácu “Nujacu” ji aríburu, nuimi ũ. Aru “Dajacu” ji aríburu, daibi ũ. Aru ji đaicōjenu apejiene ji yebacacure, đaiibi ũ, arejame Jesúre.

Úi que aiyede, “Íjiéde cōjeipōecubu mu” aiyucu barejaquémavu Jesúre.

¹⁰Que ayure jápiarí, pare d́apiarejame Jesús. Aru jári ina nuivure ũi yóboi, arejame:

—Jáve soyuyubu mujare: Eabevu ćareja majacacure, Israecacure, me ju ayure yure yópe ñai churaravai jabocupe.

¹¹Soyuyubu mujare: Darājarama pōeva cainoa joborōacavu, yure ju airpōeva. Dobarājarama tuoiva yebai, ārájivu

Jūmenijicui jaboteinoi ũi pōevaque, Abrahāque, Isaaque, aru Jacoque máre. ¹²Ūbenita obedivũ mujacavũ, judíoiva, ina cūjurorivũ bācavũ noi, jarũvaimara marajárama ñeminoita, ne ju abe boje yũre, ne coatenajiyepẽ ayũ yũre jarũvarĩ. Chioivũ orĩ mautenajarama nore. Aru jararĩ cõpi cūrajarama na, arejame Jesús.

¹³Dinũmũ ñai jabocũre arejame Jesús: —Copainujacu mũ mi cūrami. Jave ñacavũ yũ yópe mi jēniaiyepẽ. Jave mi yebacacũre meadavũ yũ, mi ju aiyẽ boje yũre, arejame Jesús.

Aru dinũmũmareca meatedejameda ũ.

Jesús ũi meadaino Simón Pedroĩ vácõre
(Mr 1.29-31; Lc 4.38-39)

¹⁴Jesús nurejameda Simón Pedroĩ cūrami. Ecoyũ bācu noi, járejameda Pedroĩ vácõre, moimo paradõre. ¹⁵Ōi yebai nuri, óre tuorejameda Jesús ũi pũrũque. Aru dajõcarejavũya moino óre. Dinũmũmia nacajari, āiyede meadarĩ jídejacoda ina noi curivũre.

Jesús ũi meadaino obedivũ ijimarare
(Mr 1.32-34; Lc 4.40-41)

¹⁶Dinainũmica ñamijie baji, jabuóvaujāravũ vaiyede, ina ĩmarocavũ nũvarejaimada Jesús yebai obedivũ abujuva ne ĩmamarare. Ina abujuvare yávarĩ jaetovarejameda Jesús. Aru caivũ ina ijimarare máre meadarejameda.

¹⁷Caie iye nópe vaidéjavũya cūináturu Jūmenijicui coyũicõjeiye báquepedeca ũi yávaiyede coyũcaipõecu bācu, Isaías āmicũcu, ũi aiyẽ báquede Jūmenijicui epequimũra: “Ūrecabe maja parũbevũre meadavũ, aru majare ijidé jarũvayũ”, arejaquemavũ Isaías bācu Jesurã.

Apevũ Jesúque ne nũiyurĩduino
(Lc 9.57-62)

¹⁸Jesús ina obedivũ pōevare jáñũ ũi yebai, jataicõjēnejame ũi bueimare.

—Járica, macajitabũ urabũ apedũvei nũrevũ, arejame Jesús.

¹⁹Dinũmũ cūinācu Jūmenijicui yávaiye báquede bueipõecu ũi yebai nuri, arejame:

—Mũ, bueipõecu, máque nũquijivũ yũ caino mi nũinoita, arejame Jesurẽ.

²⁰Aru Jesús arejame ũre:

—Macayavimiva cũvama ne cobeá. Aru mĩjina cũvama ne juaiboa. Ūbenita yũ, Jūmenijicui daroimũ mácu ũmũpe, ji curõ cũvabevũ, arejame Jesús.

²¹Apecũ, ũi bueimũ, arejame ũre:

—Mũ, ji jabocũ, mamarũmũre jarũvaquijivũ cāreja jipacũre cūracobei, ũi yaiyede. No yóboi máque nũquijivũ, arejame Jesurẽ.

²²Ūbenita Jesúsapũravũ arejame:

—Dajacu yáque. Ina yavũ bācavũpe pavũ, ne járiabe boje Jūmenijicui jaboteinoque yávaiyede, jarũvajarãri ina yavũ bācavũre, arejame Jesús.

Jesús ũmevũre ũi bĩjaroino
(Mr 4.35-41; Lc 8.22-25)

²³Jesús jatuyũ jiadocũi, ñũjare ũi bueimara máre jatũrejarã. ²⁴No macajitabũ urabũre jataivũre japurejavũ ũmevũ parurõ baju. Aru pācaĩboa coiyede jiadocũi, buidéjavũ dicũre oco. ²⁵Ūbenita Jesús cāñũ marejame. Que baru ũi yebai nuri, yópe arĩ, coedavarejarã ũre:

—iMũ, ñũje jabocũ, meadajacu ñũjare! iCoivũbu maja! iBĩjarājivũbu maja! arejarã ñũja.

²⁶Aru Jesús arejame ñũjare:

—¿Aipe teni jidũrivũrũ mũja? ¿Aipe teni “Jesús meadacũyũme ñũjare”, abevũrũ mũja? arejame ñũjare Jesús.

Dinũmũre nacajari, jararejame ũmevũre. Iboá uraboa pācaĩboa bĩjarejavũ. Aru cārijimene ñarejame ũ.

²⁷Cuecumari, urarõ dápiarejarã. Aru arejarã ñũje bajumia:

—¿Yécũba ñai, yópe cõjeñũ ũmevũre aru macajitabũre máre ju aimũ? arejarã ñũja.

Jesús ũi meadaino ũmũva abujuva ne ĩmamarare
(Mr 5.1-20; Lc 8.26-39)

²⁸No macajitabũ urabũre jatarĩ nuri, apedũvei Gadara āmicurõĩ earejarã ñũja. Nũje maiyede jiadocũre jocarĩ, pũcarã ũmũva, abujuva ne ĩmamarã, Jesurẽ copũ nũrejaima.

Cūracobeai, pōeva ne yaivū bācavūre jarūvainoi, curivū barejaquémavū na. Ne pare jijecue boje, pōeva ye oabedejaquemavū vaivū nore. ²⁹ Aru bujje cođoborejaima:

—Mu, Jesús, Jūmenijicui mácu, ¿yéde ucūrū ñujaque? ¿Ñujare ñájine đacuyurū Jūmenijicui abujuvare ñájiovaquijāravū jipocamia? arejaima.

³⁰ Joabenoí āivū barejāima obedivū oteivāri va. ³¹ Aru jēniarejaima ina abujuva Jesúre:

—Ñujare jaetovayū baru, coicōjējacu ina oteivāri va, arejaima.

³²—Corāñujara nára, arejame Jesús.

Aru etarī, corejaima ina oteivāri va. Cúyarī nūri, tūrejaima cūracū ēmeinoi, macajitabū urabūi. Turī, corī, bijarejaima na. ³³ Aru ina oteivāri va mácavūre coreipōeva cúyarī nūrejaima, coyurājivū uraimarocavūre caiye iye vaiye báquede ina pūcarā abujuva ne ímarara mácavūre. ³⁴ Caivū no ímarocavū copū nūrejaima Jesúre. Aru úre jári, “Nujacu mu” arī parūrōque, etaicōjēnejaima úre ne curōre jocarī.

Jesús ũi cure đaino nacajaiye majibecure

(Mr 2.1-12; Lc 5.17-26)

9 ¹ No yóboi Jesújā jiadocūi jaturī, macajitabū urabūre jatarī, earejaimada ũi ímarore. ² Apevū ũmūva nūvarejaimada ũi yebai cūinácu ũmū, nacajaiye majibecure, ũi parainoque. Coreóvayū bācu Jesús náre ju aivūre úre, arejamedā ñai nacajaiye majibecure:

—Mu, jī ũmū, chíomejacu. Mí āmeina teiyede jarūvarī, diede ārūmeteivū yū, arejamedā Jesús.

³ Apevū Jūmenijicui yávaiye báquede bueipōevacavū nore curivū, “Ñai ũmū Jūmenijicui ũbenore đai bi. Jūmenijicupe pāyū teibi ũ”, arī dāpiarejaimada na ne ũmei. ⁴ Ūbenita Jesús jári, coreóvarī ne dāpiayēde úre, jēniari járejamedā náre: —¿Aipe teni āmeno dāpiaivurū muja? ⁵ Maiyójabevū yópe aru apēcure, “Mí āmeina teiyede jarūvarī, diede ārūmeteivū yū”, jī parúede jáđovame

boje, jī que coyūiyede. Ūbenita maiyójarótamu nacajari cuicōjenu nacajaiye majibecure. Úre cure đayū baru, jáđovaquijivū jī parúede. “Mí āmeina teiyede jarūvaivū” jī aiyede, coreóvabevū muja Jūmenijicui ārūmeteinoe diede. Ūbenita ñai cūvacū Jūmenijicui majiē parúede, úrame yópe đarī jáđovaiye majicū. Quécūra Jūmenijicūvacari meadarī majibi ijimarare. ⁶ Que baru muje majinajiyēpe ayū Jūmenijicui đaroimū mácu ũmūpe, yū, parúede cūvacure ijāravūre, jarūvacayū āmeina teiyede, yópe đaquijivū yū, arejamedā Jesús.

Dinūmū arejamedā nacajaiye majibecure:

—Nacajari, mi parainore ĩni, nujacu mi cūrami, arejamedā úre Jesús.

⁷ Dinūmū, yópe Jesús ũi đaicōjeiyepedeca đarejamedā. ⁸ Ina obedivū pōeva diede jári, cūcumari, mearore jídejaimada Jūmenijicure, ũi nópe parūre đaiye boje ũmūre.

Jesús ũi “Dajacu” aino Mateore

(Mt 12.7; Mr 2.13-17; Lc 5.27-32, 15.1-2)

⁹ Jesús ũi vaiyede járejame yūre, Mateore, dobacure jī memeitucubūi, pōeva ne Roma āmicūrō jaboteino bojedainoi. Aru arejame yūre, “Dajacu yáque”. Que baru nacajari, nūrejacacu úque. ¹⁰ No yóboi, Jesús ũi ācūniyēde jī cūrami, obedivū jabovare tātūra ícaipōeva, āmeno đaipōeva, aru ũi bueimara máre dobarejaima, ārājivū úque. ¹¹ Apevū judfova, đaicōjeiyede đaiye cōmajivū, fariseo āmicūriyajubocavū, cūrejaima nore. Ina fariseovacavū, Jūmenijicui yávaiye báquede bueipōeva, Jesús āñūre járejaima ina jabovare tātūra ícaipōevaque aru āmeno đaipōevaque. Aru arejaima ũi bueimarare:

—¿Aipe teni āñūma jabovare tātūra ícaipōevaque aru āmeno đaipōevaque máre? jēniari járejaima ñujare.

¹² Que aivūre jápiarī, Jesús arejame:

—Meara pōevare juoipōēcui cadateiye jaūbevū. Quénora ijimarare ũi cadateiye

jañvñ. ¹³Buejarā mña, coreóvarājivñ me cūinácñ Jñmenijicui yávaiyede soyñcaipōescñ bácñi toivaiye báquede. Yópe arí, toivaicōjenejaquemavñ Jñmenijicñ ñ máscñre: “Ûvñ yñ mñje cōmaje āroje járajeyere ayñ arevñre, mñje yñre jícaiyere pñeno”, arí toivaicōjenejaquemavñ. Dabedejacacñ yñ ijāravñi, cutucñyñ mearare ne baju dápiaiñore. Quénora darejacacñ yñ, meadacñyñ āmenare, ne chñorajeyere ayñ ne āmeina teiyede, Jñmenijicui ārumetequiyepe ayñ diede, arejame Jesús.

**Pōeva āmevñva āiyede ne jēniaino
Jñmenijicñque**

(Mr 2.18-22; Lc 5.33-39)

¹⁴Dinñmñ Juan Bautistai bueimara, Jesús yebai nñri, jēniari járejaima ũre judíoiva ne đarí cōmajiyede, ne jēniayede Jñmenijicñque āmevñva āiyede:

—¿Aipe teni ññja aru ina fariseova máre āmevñba āiyede, ũbenita mi bueimara āmevñ āmema āiyede? arejaima.

¹⁵Jesús jēvari coyñrñ, arejame náre:

—Ina pñrñbñoyñ ñi cutuimara ne torojñve tenajiyere ayñ ñi pñrñbñoyeyede, ye chñomenama ñi cñede cāreja náque. Que baru āmevñ āmema āiyede. Nopedeca ji bueimara torojñrivñ ji cñede náque, āmevñ āmema āiyede. Ûbenita ji mauva ne nñvarajiyede yñre, ji bueimara chñoiñvñ āmenajarama āiyede, arejame Jesús.

¹⁶Cojedeca Jesús buedejame náre:

—Pōeva jēomema cuitótecaje mamacaje joabecajei javecarōre. Nópe đaru, no jēoicajeva mamacaje jađevajebu javecarōre. Que đaru, pñeno baju járojebu codeicobe. Quédecā ñame buojabema jñ aivñ ji bueiye mamaene aru javeque bueiyyede máre. ¹⁷Pōeva yuabema vino ũyaicorore mamacorore āimacaje curubñ javcacurubñque. Que đaru, codeóvajebu dicurubñre. Yurñ bñjajebu dicoro. Aru bñjajebu dicurubñ máre. Ûbenita ne yuaru mamacorore

mamacurubñque, bñjabebe dicoro aru dicurubñ máre. Quédecā ñame buojabema đaiñvñ yópe ji bueiye mamaepe, đare nñivñ baru yópe ne jave đaiye báquepe, náre arí buedejame Jesús.

**Jesús ñi nacovaino Jairoi máco
bácore aru ñi meadaino nomió
ñájññore jiveque**

(Mr 5.21-43; Lc 8.40-56)

¹⁸Jesús ñi coyuiyede náre, cūinácñ maja judíoiva maje jabovacacñ darí, puedarí, ñuatutarejame Jesús jipocai. Que teni yópe arejame:

—Carijñe yaibíco jñmaco. Ûbenita yúque darí, tñojacñ óre mi pñrñque, ñi apñcojiyepe ayñ, arejame Jesúsre.

¹⁹Ûi que aiyede, Jesús nacajari, nñrejame ũque, ññja ñi bueimaraque. ²⁰Ññje vaiváñri nñiyede, obedivñ pōeva jēneboi cñrejaquemavñ cūinácñ nomió, ijimo doce paiññña baju jive yuiyeque. Jesús yóboi nñri, jēni járejaquemavñ ñi doicaje tñrñvarā. ²¹Yópe arí dápíarejaquemavñ ñ: “Yñ jēni jáđo maru ñi doicajede, quénora ũmedacođomu yñ”, arejaquemavñ ñ. ²²Ûbenita Jesús copedini, óre jáñri, arejame:

—Mñ, ji ũmo, torojñjaco. “Û meadaiye majibi yñre”, arí dápíarebu mñ. Que baru mi que arí dápíaiye boje, meadaiñvñ mñre, arejame óre Jesús.

Aru dinñmñmareca ico nomió, ijimo máco, meatedejaquemavñ.

²³Jesús eayñ ñai judíoiva jabocñi cñrami, pedu japuivñre aru obedivñ pōeva bujñé oivñre járejame. ²⁴Náre etaicōjēññ arejame:

—Etajarā mña. Ico juedoco yayió āmemico. Quénora cāđotame, arejame Jesús.

Náre nópe arejame Jesús, ñi majié boje ñi nacovaquinore óre yainore jarñvarí. Ûi que aiyede, yñridejaima ũre. ²⁵Ûi etavarñburu yóboi ina pōevare, ecorejame Jesús juedoco bácoi curitucubñi. Ó mácoi pñrñre jēnejameđa. Aru nacajarejacođa ñ, apñco cojedeca. ²⁶Aru ñi que đaiye

borore jápiarejaimađa caivu pöeva dijaboröcavu.

**Jesús ũi meadaino pucarã
ũmũva jári eabevure**

²⁷ Jesús ũi dajocarĩ nũiyede nore jocarĩ, pucarã ũmũva, jári eabevũ, darejaima ũi yóboi. Bujíe, yópe arĩ, codoboborejaima:

—Mu, David báciai pãramecu, Jũmenijicui daroimũ mácu, ñũje jabocu bacuyú, ñũjare cõmaje ãroje jájacu mu, codoboborĩ are nũrejaima na.

²⁸ Jesús ũi ecoiyede cũrami, ina pucarã jári eabevũ darejaima ũi yebai. Aru jẽniari járejame náre:

—¿Dãpiaivurũ muja yure meadaiye majicũre? arejame.

—Jũju, ñũje jabocu, majivũ ñũja mũre meadaiye majicũre, arejaima na.

²⁹ Dinũmu ne yacoruarã tuorĩ, arejame:

—Meatejarã muja. Yópe muje ju aiyepe đacaivu yũ mujare, arejame Jesús.

³⁰ Que đayũre, járejaima ina jári eabevũ báciavu. Parurõreca Jesús arevure coyũicõjemenidurejame náre:

—Ñamene coyũbejarã iye ji meadaiyede mujare, arĩdurejame.

³¹ Ũbenita cũinã, etaivu báciavu diñamine jocarĩ, coyũrejaimađa caivu dijaboröcavũre Jesús ũi meadaiye bãquede náre.

**Jesús ũi meadaino yávaiye
majibecũre**

(Mt 10.25, 12.24; Mr 3.22; Lc 11.15)

³² Ina pucarã jári eabevũ báciavu ne eta iyede, cũinácũ ũmũ, yávaiye majibecũre, davarejaima arevũ Jesús yebai. Ñai ũmũ abujucũ ũi ĩmamũ marejaquémavu. ³³ Jesús ũi jaetovarĩburu yóboi ñai abujucũre, yávaiye majidejame ñai abujucũ ũi ĩmamũ mácu. Caivu ina obedivũ pöeva Jesús ũi nópe đaiyede jáivũ báciavu, cüecumari, urarõ dãpiarĩ aivũ barejáima:

—Javede pu cari járavũita ye jánevũ ñũja iyepe paiye đaiyede yore, ñũje joborõ, Israel ãmicurĩjoborõ, arejaima.

³⁴ Ũbenita ina fariseova yópe are curejaima Jesúrã:

—Abujuvai jabocui paruéque jarũvaibi abujuvare, arejaima ũbenina.

Jesús ũi cõmaje ãroje jáino pöevare
(Mt 4.23; Mr 1.39, 6.34; Lc 4.44, 10.2)

³⁵ Jesús buede nũrejame cainoa ĩmaroai aru ĩmajinoai máre. Judíoiva ne cójijĩñamiai bueni, coyũyũ barejáme iye yávaiye méne Jũmenijicui jaboteiyede pöevare. Aru meadayũ barejáme caiye đũaca ijie coapa aru caino ĩjinore máre.

³⁶ Ũi jáiyede pöeva chõivũre ne ñãjiye boje aru ne baju cadateiye majibe boje, cõmaje ãroje járejame náre, yópe ovejava náre coreipöecu cübevũre paivũre. ³⁷ Que baru ñũja ũi bueimarare arejame Jesús:

—Obedivũ pöeva curivũbu, Jũmenijicui yávaiye méne majibevũ cãreja, muje buenajimara iye yávaiye méne, ũi meadaquiyepa aivũ náre. Ũbenita obebevũ memecaivũbu Jũmenijicure. ³⁸ Que baru jẽniajara ĩque, ũi bueicõjequiyepa aivũ arevure ũi yávaiye méne ina diede coreóvabevũre cãreja, arejame ñũjare Jesús.

**Jesús ũi beoino ũi yávaiye méne
coyũicõjeimarava**
(Mr 3.13-19; Lc 6.12-16)

10 ¹ No yóboi Jesús órejarejame doce paivũ ñũjare ũi bueimarare. Aru parũre đarejame ñũjare, ñũje jaetovarãjiyepa ayũ abujuvare aru ñũje meadarãjiyepa ayũ caiye đũaca ijie coapa aru caino ĩjinore máre. ²⁻⁴ Ñũjare beorĩ epedejame ũi yávaiye méne beorĩ coyũicõjeimarare: Mamarũmu Simón, ũi ãmidoimũ mácu Pedro, aru Andrés, Simón Pedroi yócu; aru Zebedeoi mácu Santiago, aru Santiagoi yócu Juan; Felipe aru Bartolomé; Tomás aru yũ, Mateo, jabovare tãtura ĩcaipöecu bácia; Santiago, Alfeoi mácu, aru Tadeo; Simón, ãmicũcu Celote, aru Judas Iscariote máre. Ñai marejáme jẽni jĩcuyũ Jesũre ũi mavare. Ñũja marejacará Jesús ũi yávaiye méne beorĩ coyũicõjeimara.

Jesús ùi jaroino ùi bueimarare
(Mt 11.24; Mr 6.7-13; Lc 9.1-6, 10.4-12; Hch 13.51; 1 Co 9.14; 1 Ti 5.18)

⁵Ñija doce paivure jarocuyu barejáme Jesús, ñije coyuräjijeyepere ayu Jümenijicui jaboteinoquede yávaiye méne. Yópe arí, majicarejame ñijare ùi jaroquiye jipocai:

—Judíova ãnevũ ne joborðai nũmejara. Aru Samaria ãmicurijoborðque ìmarore ecobejarã muja. ⁶Quénora coyurãñijara muja majevure, ina judíova, Israel bácuí pãramenare. Jümenijicui yávaiyede jápiabeni, ùi urõpe ðabeni, ùre jaboteicõjemema na. Que baru ovejava mamateivure paivubu na. ⁷Muje nuiyede yópe arí: “Jümenijicu jabotecuyume pøevare maumejiena”, arí coyujarã náre. Meadajarã ijimarare.

Nacovajara yaivu bácvure yainore jaruvarí. Meadajarã pojevure. Aru jaetovajarã abujuvare ne ìmamarare jocarí. ⁸Bojecubeda jívu yu muje paruéva, muje meadaräjijeyepere ayu pøevare. Que baru meadajarã náre bojecubeda. ⁹Nũvamejara tãuturare muje jãrióicãvai. Úrure, platare, aru cobrede máre nũvamejara. ¹⁰Curubvare máre, muje curãñuri cave nũvajuroricurubvare, nũvamejara muja. Aru pũcacajea muje cuitótecajeare, curaidoare, aru tuturiteiyoare máre nũvamejara muja. Memecai pøevure bojedaiye javũ ùi memeinore. Que baru ina muje meadaimara márajivure jíye javũ mujare javéde.

¹¹Ìmaroi muje eaiyede, vorí eajarã cüinãcu pøevure, ne pueðaimvure, jápaiyucvure muje coyuiyede. Úque cujarã muja ùi cürami pu dajocarí nũvũta nore jocarí. ¹²Muje ecoiyede cürami, diñamicavure jacoyujarã muja, jëniacavũ Jümenijicvure ùi mearo ðacaquiyepe aivu náre. ¹³Na meara maru, náre mearo ðacacuyume Jümenijicu yópe muje jëniaiyepe. Æbenita na ãmena maru, náre mearo ðacabecuyume ù. ¹⁴Apecũ ùi copũ

etabedu mujare, aru muje coyuiyede jápaiyubedu máre, pupejarã jobore mujare jëiyede muje cuboba cãchinoi ùi jáiyede, muje etaiyede ùi cüramine jocarí, no ìmarore jocarí máre. ¹⁵Jãve coyuyubu mujare: Ina Sodomacavũ bácvũ aru ina Gomorracavũ bácvũ máre pare ãmeina ðaivũ barejaquémavũ. Æbenita diìmarocavũ mujare copũ etabevũ ñãjinajarama nõcvũ bácvũ pũeno baju, Jümenijicui ñãjiovaquijãravũ baquinõre pøevare, ne ãmeina teiye boje, arejame Jesús, ñijare jaroym.

Jesús ùi coyũino ùre ju aivũ ne ñãjiyede

(Mt 9.34, 12.24, 24.9, 13; Mr 3.22, 13.9-13; Lc 6.40, 10.3, 11.15, 12.11-12, 21.12-17; Jn 13.16, 15.20)

¹⁶Jesús coyvure nũrejame ñijare, yópe arí:

—Jájara. Jaroivu yu mujare ijãravucavũ jëneboi, yópe ovejava nuiyepere ãimara jjecurivũ jëneboi. Ávaivubu maja judíova: Áða me majibi, aru jureco jjecubebico. Que baru ãðape me majijarã, aru jurecope jjecubejarã pøevaque, muje coyuiyede náre. ¹⁷Me jájara muja. Mujare jëni nũvarajarama jabova ne ãmeina teivure jëniari jáiñami. Jara popenajarama mujare maja judíova maje cõjijiñamiai. ¹⁸Aru mujare nũvarajarama cõjeipøeva ne jipocai aru jabova ne jipocai máre, yvure muje ju aive boje, muje coyuräjijeyepere aivu ji borore náre aru ina judíova ãnevure máre. ¹⁹Ne jëni nũvaiyede mujare ãmeina teivure jëniari jáiñami, “¿Aipe coyurãjidi náre?” arí cãrijimejara muja. Dinũmũ maquinómareca majinajaramu muje coyuräjijeyepere javéde. ²⁰Coyujarã muja yópe majepacui Espíritu ùi dãpiare ðaquiyepe aivu dinũmũ maquinõre.

²¹Mujare, yvure ju aivvure, ina yvure ju bevũ ùbenajarama. Que baru ùmũ jëni jicuyvure jíbvure o ìmacvure máre, jabova ne boarí jarũvaicõjenajijeyepere ayu ùre. Aru nopedecca jípacu jëni

jícnyume mamacure. Aru nopedeca némará ju abeni nébucavare maucavari boarájarama náre. ²²Caivu mujare, yure muje ju aiye boje, jorojini járajarama cainoa joboróacavu. Ubenita nai ju ayu yure úi yainumuita, ú macuyáme ji meadaimu. ²³Cúináro ímarocavu ne nájine ðaiyede mujare, dupini nujara muja apeno ímaroi. Jáve soyuyubu mujare: Yu, Jümenijicui daroimu mácu úmure, copaidacuyumu muje soyuri bubarájiye jipocamia ji yávaie méne cainoa maje ímaroa, Israeque ímaroi.

²⁴Ina bueimara ñame majibema náre bueipóescu püeno. Aru ina memecaivu ñame parúbema ne jabocu püeno. ²⁵Nai bueimure vaiye jaunu caiye iye úre bueipóescui vaiye báquede. Aru nai memecayure vaiye jaunu caiye iye úi jabocui vaiye báquede. Póeva ámeina yávaivu baru cürami upacure, püeno baju ámeina yávarájarama úi cüramicavure. Quédecabu ina yure ju abevu “Abujuvai jabocubu mu” aiyuri yure, ámidoivu Beelzebúre. Que baru mujare majicayubu: Püeno baju ámeina yávari nájine ðarájarama mujare, arejame ñujare Jesús.

Jesús úi soyüino póeva ne jidurájimure
(Mr 4.22; Lc 8.17, 12.2-7)

²⁶Ñujare soyure nurejame Jesús: —Póevareca jidubejará muja. Caiye yaveiye báque jároquiyebu. Aru dupióvaiye báquede máre majinajarama caivu póeva. ²⁷Caiye ji soyüiyede mujare ñeminoi, póeva ne járiabede, soyujará póevare miadároi, ne járiaiyede. Aru caiye muje járiaiyede, póeva ne jüjuvaiyede, soyujará obedivu póevare ne cójijinoai. ²⁸Jidubejará ina boarí jaruvavure muje bajure, ubenita muje úmene boarí jaruvavu oabevure. Quéhora jidujará Jümenijicure, ñaine muje bajure aru muje úmene máre, bíjarorí majicure toabo cúiméboi.

²⁹Yócavu bojedáivu pucáina mújina quíjinare cúinátrava táuturatrava bojecubetravaque. Ubenita cúinájicu

nácacu turíburu joboróita úi yaidú, majepacu Jümenijicu tuicójeimi úre. Jümenijicu úi tuicójemenu cúinájicu nácacure joboróita, tubecuyume. ³⁰Aru caiye iye poðamea cuede muje jipobui majibi majepacu Jümenijicu. ³¹Que baru jidubejará. Muja bojecurivutamu caivu mújina obedivu püeno. Que baru Jümenijicui cójemenu, ámeno vaibéquiyebu mujare, arejame ñujare Jesús.

Jesús ju aivure aru ju abevure soyüino

(Lc 12.8-9; 2 Ti 2.12)

³²Yópe arí, soyure nurejame Jesús: —Caivu ina ju aivure yure póeva ne jáiyede, yu máre náre ju acuyumu jipacu, cavaró mearocacu, úi jáinoi. ³³Ubenita caivu ina ju abevure yure póeva ne jáiyede, yu máre náre ju abecubu jipacu, cavaró mearocacu, úi jáinoi, arejame Jesús.

Jesús úi coatede ðaino póevare

(Mt 16.24-25; Mr 8.34-35; Lc 9.23-24, 12.51-53, 14.26-27, 17.33; Jn 12.24-25)

³⁴Cojedeca Jesús, yópe arí, buedejame ñujare:

—Dápiabejará muja yu dayu bácuere, cárijimene ðacuyu íjaravacavure. Dabedejacacu yu íjaravui, cárijimene ðacuyu mujare. Quéhora darejacacu yu, póevare coatede ðacuyu, apenvu yure ne ju aiye boje ubenita apenvu yure ne ju abe boje. ³⁵Ji daiye báque boje, mamacu maucnvacuyume jíracure, aru mamaco maucnvacóome jíracore, aru mamacui márepaco maucnvacóome ói vácore máre. ³⁶Que baru póescu úi cüramicavuvacaribu úi mauva márájinu.

³⁷Ácu póescu jíracure o jíracore ucu baru ji püeno, ú buojabebi jícu bacuyú. Ácu póescu mamacure o mamacore ucu baru ji püeno, ú buojabebi jícu bacuyú. ³⁸Ácu póescu daiyucu yúque, ðajocajacurí póeva ne mearo jáiyede úre, cuyebecurí yure yóvaiyede, aru jidubejacurí úi nájiquiyede. Nópe ðabecu baru, ú buojabebi jícu bacuyú. ³⁹Ñai

põescu ùi baju urõpe ðarĩ, meaðaiyucu baru ùi bajure, coatecuyume ùi bajure Jümenijicure jaruvarĩ, yõpe yaiyú bácupe ùi ùmei. Ùbenita ñai põescu, “Ye baju ámevũ, ji yaidú Cristore boje” ayũ, ùi baju urõpe ðabecũva quénora ji urõpe ðarĩ, úrecabe ji meadaquimũ, cuscuyũ Jümenijicũque cainũmũ, ñujare arĩ buedejame Jesús.

Põeva bojedaimara ne baju ðaiyepe
(Mr 9.37, 41; Lc 9.48, 10.16; Jn 13.20)

⁴⁰ Jesús buedejame ñujare cojedeca: —Ñai põescu copũ etayu baru mujare muje coyũrãnuiyede ji yávaiye méne, yure máre copũ etaibi ù. Aru ñai põescu copũ etayu baru yure, copũ etaibi ñai yure daroyure máre. ⁴¹ Ñame copũ etaivũ cüinácu Jümenijicũ yávaiyede coyũcaipõecure, Jümenijicũ bojedacuyume náre yõpe ùi bojedaiyepedeca ñai ùi yávaiyede coyũcaipõecure. Aru ñame copũ etaivũ cüinácu ùmu meacure, Jümenijicũ bojedacuyume náre yõpe ùi bojedaiyepedeca ñai ùmu meacure. ⁴² Jáve coyũyũbu mujare: Ñai põescu jýyũ cüináru jorogure ocoque, caðatecuyũ cüinácu ji bueimaracacure, parubecureca ùi yóvaiye boje yure, jáve bñabecuyume ù Jümenijicũ bojedaiyede úre, arĩ buedejame Jesús.

Juan Bautista ùi jaroimara Jesús yebai

(Mt 17.10-13; Mr 9.11-13;
Lc 7.18-35, 16.16)

11 ¹ Jesús ñuja doce paivũ ùi bueimarare majicarĩ bũojayũ báciu, nore jocarĩ nurejame dijaborõcaĩmaroai, põevare buescuyũ aru coyuscuyũ ùi yávaiye méne.

² Dinũmũre Juan Bautista ñai jabocu Herodes ùi buoimũ marejámeda. Cũrejameda ámeina teivũre jëni jacoĩnami jívũi. Noi cuscũ, jápiarejameda Cristo ùi ðaiye borore. Que baru jarorejameda apevũ ùi bueimarare Jesús yebai. ³ Jëniari jáicõjenezameda náre yõpe:

—¿Jáveneca máru Juan Bautista “Ji yóboi dacuyume apecũ coyũpõescu” arĩ, ùi buevacamũ? ¿Ûi que arĩ buevacamũ ámenu, coreñajidi ñuja apecure? aicõjenezameda náre Juan Bautista.

⁴ Ne que arĩburu yóboi, Jesús ju ayũ arejame náre:

—Nuri coyũjarã Juan Bautistare muje jáiyede aru muje jápiayede caride:

⁵ Ina jári eabevũ bácavũ jári eaðama aru ina cuiye majibevũ bácavũ cuyama caride. Ina pojeivũ bácavũ meama aru ina jápiabevũ bácavũ jápiadama caride. Ina yaivũ bácavũ nacovaimara yainore jaruvarĩ apũma cojedeca caride. Aru cõmaje árojarivũre coyũyũbu iye yávaiye méne, Jümenijicũ meaðaiyede põevare. ⁶ Aru torojubi ñai ju arĩ ðajocabescu yure, arejame náre Jesús.

⁷ Ina daroimara ne nuriburu yóboi, Jesús Juan Bautistai borore yávarĩ búyũ arejame ina obedivũ põevare noi cürivũre:

—Jáve járanumeteavũ muja cõriáre ùmevũ japuiyede põescubenoĩ. ⁸ Aru jáve járanumeteavũ muja põescu cuitótecaje meacajede doyure máre põescubenoĩ. Majivũ muja ina doivũre cuitótecaje meacajeare cürivũre cainũmũ jabovai cüramiai. ⁹ Quénora jáve járanuavũ muja cüinácu Jümenijicũ yávaiyede coyũcaipõecure. Jáve coyũyũbu mujare: Jáquemavũ muja Jümenijicũ yávaiyede coyũcaipõecure pueno meacu bajure. ¹⁰ Juan Bautistabe ñai Jümenijicũ toivaicõjeimũ mácu úre coyũcaipõescu bácure:

Jarõivũ yure coyũcaipõecure mi jipocai, ùi meaðaiyepere ayũ põevare, ne copũ etarãjiyepere ayũ mũre, nopedeca põeva ne meaðaiyepere cuimare ñai ùmu, ne pueðaimũ, ùi ðaquiye jipocai, arĩ coyũicõjenezajquemavũ Jümenijicũ.

¹¹ Jáve coyũyũbu mujare: Cũbebi apecũ Jümenijicũ yávaiyede coyũcaipõescu meacu baju Juan Bautista pueno, ina ijãravũre põeteivũ jëneboi. Ùbenita caivũ Jümenijicũ jaboteimara ùi mearo ðacaimaramu Juan

Bautista pueno. Aru nácacu ũbeni cücü máre Jūmenijicui mearo đacaimume Juan Bautista pueno, arejame Jesús.

¹²Aru yópe arī, buede nurejame:

—Ānijāravu bācarō Juan Bautista Jūmenijicui yāvaiyede ũi coyurī buijāravumata pu caride máre, obedivu pōeva parurō đadama, ecoiyurivu Jūmenijicui jaboteinore. Aru pōeva Jūmenijicure ju abevu parurō đadamatedama, cūinē đaiyurivu ũi jaboteinore. ¹³Juan Bautista ũi curinūmure curejaquemavu Jūmenijicui đaicōjeiye Moisés bācure toivaicōjeni bueiye báque aru ina Jūmenijicui yāvaiyede coyucaipōeva mácavu toivarī bueiye báque Jūmenijicu jabotecuyure ũi pōevare. ¹⁴Aru ji coyuiyede muje ju aiyuru, coyuyubu mujare: Juan Bautistarecabe ñai Jūmenijicui yāvaiyede coyucaipōecu Elíape páyu dacuyu Jūmenijicui epequimū ũi daquiye jipocamia. ¹⁵Me jápiajarā muja iye ji bueiyede, arejame Jesús.

¹⁶Aru yópe arī, buede nurejame:

—¿Yéque jēvari coyuji ina pōeva ijāravucavure? ¿Aipe ārōjari na? Juedova tãibui dobarivupebu, yajurājivū nácavūque. Aru yópe aivupebu: ¹⁷“Japuvū ñuja yurriainore. Ūbenita upabetevu muja. Yurriavu ñuja chīore đaiyede. Ūbenita obetevu muja”. Aru nópe ijāravucavu máre cãrijijāma na. ¹⁸Que baru Juan Bautista ũi daiyede, ũi āmeni aru ũcumeni teiyede, “Abujucure cuvabi”, ũra ũbenina aivubu muja. ¹⁹Aru Jūmenijicui daroimū mácū ũmure, ji daiyede, āri aru ũcui teiyede yópe caivu apevure, “Ñai ũmū ũrarō āri ũi vainī tuiyeta, aru ũrarō ũcui ũi pacoteiyeta, yóvaibi āmenare aru jabovare tãutura ĩcaipōevare máre”, yurā ũbenina aivubu muja. Que baru muja máre, ijāravucavupedeca cãrijivubu. Ūbenita Jūmenijicui majiēde pōeva jáđama ũre ju aivūque, arejame Jesús.

**Apeĩmaroacavu ne ju abeno
Jūmenijicure**

(Mt 10.15; Lc 10.12-15)

²⁰Apeĩmaroai ure pōeva ne đarī majibede đarejame Jesús. Ūbenita

nócavu chīomeni ne āmeina teiyede, oatvabedejaima ne đaiyede. Que baru Jesús, yópe arī, jijatani búrejame ina ĩmaroacavure:

²¹—iMuja, judíova, Corazícavu, āmeno ñájinajaramu muja! iAru muja, judíova, Betsaidacavu máre, āmeno ñájinajaramu muja! Pōecu ũi đaru pōeva ne đarī majibede yópe ji đaiyepē muje jáiyede, judíova āmevu Tirocavu aru Sidócavu máre ne jáiyede, nócavu jave chīori ne āmeina teiyede, oatvajeju ne đaiyede. Āmenicajeare dorī, ũapenare tuorī ne jipobui, jáđovajeju ne chīori dápiaiye. ²²Ūbenita yu coyuyubu mujare: Muja ñájinajaramu Tirocavu aru Sidócavu pueno baju, Jūmenijicui ñájiyoaquiijāravu baquinóre pōevare, ne āmeina teiye boje. ²³Aru muja, judíova, Capernaucavu, jáve nūmenajaramu muja cavarō mearo Jūmenijicui curōi. Quénora muja nūrajaramu toabo cūiméboi. Ina Sodomacavu bācavu āmena bajuvacari, jáivu bācavu baru pōeva ne đarī majibede, yópe ji đaiye bāquepe Capernaui, chīori ne āmeina teiyede, oatvajeju ne đaiyede. Aru na mácavure bíjare đabejeju Jūmenijicu. ²⁴Ūbenita yu coyuyubu mujare: Ina Sodomacavu bācavu pare āmeina teivureca, ne pueno ñájinajaramu muja, Jūmenijicui ñájiyoaquiijāravu baquinóre pōevare, ne āmeina teiye boje, arejame Jesús.

Jesús ũi jabuóvare đaiyue pōevare

(Lc 10.21-22; Jn 1.18, 3.35, 10.15)

²⁵Dinūmūmareca Jesús, yópe arī, coyurejame Jūmenijicure:

—Mu, jipacu, cavarō mearocavu ne jabocu aru ijāravucavu ne jabocu máre, mearore jivu mure, mi jáđovame boje caiye iye ji coyuiyede ina majidivure aru mi jáđovaiye boje caiye iyede ina majibevure. ²⁶Mu, jipacu, mearore jivu mure mi nópe đaiye boje, arejame Jesús.

²⁷Jūmenijicure coyurī buōjarī, Jesús arejame ñujare, ũque curivure:

—Jipacu Jūmenijicu yure majide đaiibi caiyede, aru parure đaiibi máre.

Ñame majibema yure, quénora majibi jipacáva. Ñame majibema jipacure quénora majivu yu, aru na máre ina ji majide ñaimara. ²⁸Caivu mña uetuvu mñe ñariduiye boje yópe Jñmenijicui ñaicójeiyepe, ñajarã ji yebai. Jabuóvare ñaquijivu mñjare diede jocarí, mñje cãrijimenajiyepes ayu. ²⁹Ju ajarã yure aru ji coyuyede máre. Buejarã yáque ji bueiyepe. Majicaicójejara mñjare yure, ñarãjivu ji ñaiyepes. Yu cõmaje ñroje jãñumu põevare. “¿Meacu bárica yu?” arí ñápiabevu. Que baru yu jabuóvare ñaquijivu mñjare mñje ñmene. ³⁰Ju arí yure, ji coyuyede máre, maiyójabevu mñjare. Mñje ñaiye majibede ñaicójemevu mñjare, arejame Jesús.

**Jesúí bueimara ne puyoino oteiyepe
jabuóvairavui**

(Mt 9.13; Mr 2.23-28; Lc 6.1-5)

12 ¹Apejaravu, judíovai jabuóvairavuvu sábadoi, ñña Jesúsã vaidéjarã oteiye curói. Ñña ñi bueimare ñvúé ijidejavú. Que baru die oteiyepe jeni puyorí ñrejarã ñña. ²Aru apevu fariseovacavu ññje nópe ñaiyede jãri, arejaima Jesúsre:

—Jãjacu. Mi bueimara maja judíovai mñje ñaicójemeno ñarí, ñmeno ñavubu jabuóvairavure, arejaima.

³Ubenita Jesús, ñi ñápiaye boje ñña ñmeno ñabevure, arejame náre:

—¿Jãve ñrumetenaru mña yo David bácu ñaino mácarõre ñvúé ijidé ñre aru ñque curivure máre? ⁴U mácu ecõrejaquemavu Jñmenijicui cñrami. Aru ñrejaquemavu páure, Jñmenijicure jýe báquede, ina sacerdoteva ne ñiyede, sacerdote ñmecu bácvacari. Aru jídejaquemavu ñque curivure máre, sacerdoteva ñmenvu bácvareca. Ubenita Jñmenijicu ñãjine ñabedejaquemavu na mácvare. ⁵¿Aru jãve ñrumetenaru mña Jñmenijicui ñaicójeiyede sacerdotevare ñi toivaicójeiye báquede Moisés bácu? Ina sacerdoteva memevuvacari Jñmenijicui cñrami jabuóvairavure, ñmeno ñabema na. ⁶Yu coyuyubu mñjare: Ji cuede

mñje jñeboi mearotamu mñjare, mñje Jñmenijicui cñramine cñvae pñeno. ⁷Mña ji bueimara “Ñmeno ñavubu” abejebu, majidivu bácvu baru aipe ayurõre iye Jñmenijicui yáviyede toivaicójeiye báquede: “Uvu yu mñje cõmaje ñroje jãrajiyepes ayu apevure, mñje yure jícaiye pñeno”, arí toivaicójejemaquemavu Jñmenijicu. ⁸Yu, Jñmenijicui ñaroimvú mácu ñmure, jabocubu yu. Que baru ñaicójei buoiaivu yu põevare ne ñaiyede cajãravure aru jabuóvairavure máre, arejame Jesús.

**Jesús ñi meadaino ñmuvu ñmuve
jiacubecure**

(Mr 3.1-6; Lc 6.6-11, 14.5)

⁹Nore jocarí ñrejarã ñña, Jesúsã. Aru cññãdamí judíovai cõjjiñami ecõrejarã. Noi cñrejame cññãcu ñmuvu, ñmuve cññãpñravu jiacubecu. ¹⁰Apevu fariseovacavu jñiari jãrejaima Jesúsre:

—¿Mi ñápiaru, meadãicójeini Jñmenijicu jabuóvairavuvu sábadoi? arejaima na.

Nópe arejaima, boro coyurí ñaiyuriduvu ñre.

¹¹Jesús arejame náre:

—¿Ácu mñjacacu ñi oveja turu cobe jívu, cññã jñi ñmeje bárica ñre judíovai jabuóvairavuvu, mñjare memecójemejãravure? ¡Põecu bojecucutame oveja pñeno! ¹²Que baru Jñmenijicu mearore ñaicójeimi põevare jabuóvairavuvu sábadoi. Aru yu meadavu baru ñai ñmure caride, mearo ñajebu yu, arejame Jesús.

¹³Nópe ayuva, ñai ñmuvu ñmuve jiacubecure arejame:

—Jabióvacu mi ñmuvede, arejame.

U jabióviyede, meatedejavú ñi ñmuve, yópe apenñravu ñmuvepe.

¹⁴Que teni ina fariseova etavuvu bácvu cõjjiñejaima. “Boarí jaruvãjavuvu”, arí ñápiavuvu barejaima Jesúsre.

Isaiás bácu coyucaimvú Jesús

¹⁵Jesús coreóvavu ina fariseova ne boarí jaruvãvede ñre, náre ñajocarí

nurejame nore jocarí. Obedivu pöeva cujurejaima ñi yóboi. Aru caivu nácavu ijimarare meadarejame Jesús. ¹⁶ Yávaicōjemenidurejame náre arevure, ne coreóvabenajiyere ayu ñi ðaiyede. ¹⁷ Caiye iye nópe vaidéjavū cūináturu Jūmenijicui coyucōjeiye báqueredeca ñai Isafas āmicucu ñi yávaiyede coyucaipōescu bācure. Yópe arí, toivaicōjenejaquemavu ñi máscure Jūmenijicu:

¹⁸ Jápiajarā. Ñaime yure memecayu, ji beoimū mácu. Érecabe ji umu. Éque torojuvu yu ji ũmei. Ére darocuyumu ji Espíriture, ñi cōjequiyere ayu yure memecayu ñi dápiayede, ñi coyuiyede, aru ñi ðaiyede máre. Que baru coyucuyume yure memecayu judíova ānevure aipe ðarí buojaivure, boropatebenajivuva ji jáinore. ¹⁹ Érecabe ādamatebecu, coðobobobescu mái, aru órejabescu ímaroacarō tāibui. ²⁰ Napiñu cadatecuyume ina parubevure. Aru cōmaje āroje jáñu meadacuyume ina ijimara yaijurorivure. Nópe ðacuyume pu ñi vainí turíburu yóboita āmenore jaravari, ñi jaboteiyeta. ²¹ Érecabe pöevare meadarí buojayu. Que baru ére napini corenajarama ina judíova ānevū, ñi meadaquiyere aivu náre, arí toivaicōjenejaquemavu Isafas bācure Jūmenijicu.

“Abujuvai jabocui paruéde cuvabi ũ” arí, ne boro coyurí adaríduino Jesúre
(Mt 9.34, 10.25; Mr 3.20-30, 9.40; Lc 11.14-23, 12.10)

²² Dinumure apevu davarejaima cūinácu ũmure, abujucu ñi ímatmure, Jesús yebai. Ñai ũmu jári eabescu aru yávaiye majibescu barejáme. Aru ére meadarejame Jesús. ²³ ũi que ðaiyede, caivu ina pöeva, nócavu, cuedumari arejaima:

—¿David bācui pāramecu, Jūmenijicui epeimū mácu maje jabocu bacuyú bārīca ñai? jēniari járejaima ne bajumia.

²⁴ ũbenita ina fariseova, jápiaivu pöeva nópe ne coyuiyede, yópe arejaima:

—Ñai ũmu cuvabi Beelzebúre. Que baru abujuvai jabocui paruéque jaetovaibi abujuvare, arejaima na.

²⁵ Jesús coreóvayu ne dápiayede, arejame náre:

—Cūináro jaborōcavu ādamateivu baru ne bajumia, ina jaborōcavu cūinájarama na. Aru nopedeca cūináro ímarocavu o cūinádami cūramicavu máre ādamateivu baru ne bajumia, díímarocavu o díñamicavu máre cūinájarama na. ²⁶ Aru nopedeca bájebu ñai abujuvai jabocu, jaetovayu baru abujuvai jabocure. Ádamateyu bájebu ñi bajuma. Aru jaetovayu baru abujuvare, joe parucu cubejebu ũ. ²⁷ ¿Ji jaetovaru abujuvare ne jabocui paruéque, ñamei paruéque jaetovaidi mujacavu abujuvare? Que baru mujacavu, abujuvare jaetovaiyu, jáðovadama mujare muje borocuede yure ũbenita. ²⁸ ũbenita Jūmenijicui Espiritu Santo ñi paruéque jaetovayubu yu abujuvare. Que baru jáðovaiyu yu Jūmenijicu jaboteyure mujare.

²⁹ ũbenita buojaino ānevū ecoivu ñai ũmu parucui cūramine, ñavarajivu ñi cuvade. Mamarumure ére buorí, que ðaivu bācavuta buojaivu ñavaiyu ñi cuvade, arejame Jesús.

Nópe ayu, Jesús yópe ayucu barejaquemavu: ũvacari parubi abujuvai jabocu pueno, ñi jaetovaiye boje abujuvare pöevare jocarí.

³⁰ Aru Jesús arejame:

—Ñai yóvabescu maucuvabi yure. Aru ñai arevure yóvare ðabebi yure, náre maucuvare ðaibi yure.

³¹ Que baru coyuyubu mujare:

Jūmenijicu ārumetecuyume caiye iye muje āmeina teiyede, aru caiye iye ére āmeina yávaiyede máre. ũbenita ácu pōescu ñi yávaru āmeina ñai Espiritu Santore, aipinumu Jūmenijicu ārumetebecube ñi āmeina teiyede. Quédata boropatecuyume, bíjacuyu Jūmenijicure jocarí cainumua. ³² Que

baru caivu ina ãmeina yávaivure yure, Jümenijicui daroimu mácure ñmure, Jümenijicu ãrumetecuyume ne ãmeina teiyede. Æbenita ina ãmeina yávaivure ñaine, Espíritu Santore, Jümenijicu ãrumetebecube ne ãmeina teiyede, ijáravure aru daquijáravu baquinóre máre, arejame Jesús.

**Jesús ñi bueino maje majinore
jocucu jéidure**

(Mt 3.7, 7.20, 15.18, 23.33;
Lc 3.7, 6.43-45)

³³Cojedeca Jesús, yópe arí, buedejame:

—Jocucu meacu cuvavu jéidua mearure. Æbenita jocucu ãmecu, ãmedure cuvavu. Que baru coreóvaivubu iye jocucure dicuá jéiyeque. Nopedeca muja coreóvarí buojaivubu yure ji ñaiyeque. ³⁴iMuja, jujovaiyu, ãdavape paivubu muja! Mujarecabu dápiayu ãmene. Que baru ãme matuiyede yávaivubu muja. Aru méne yávarí buojabevu muja. ³⁵Ñai pöecu meacu yávayube méne, ñi ñmei mearo cue boje. Aru ñai pöecu ãmecu yávayube ãmene, ñi ñmei ãmeno cue boje. Que baru pöecu yávaibi ñi jijecamuque ñre cuede ñi ñmei. ³⁶Coyuyubu mujare: Ñijáravu daquijáravu baquinó Jümenijicui ñájiovaquijáravu baquinóre pöevare, ne ãmeina teiye boje, caivu ñbenina yávaivu bácvure ñájine ñacuyume Jümenijicu, ne nópe yávaive báque boje. ³⁷Muje yávaiveque jáðovaiyubu aipe muje dápiayede. Que baru Jümenijicu bojedacuyume mujare yópe muje yávaivepe. Muje ména yávaru, mujare boropatebevure jácuyume Jümenijicu. Æbenita muje ãmeina yávaru, mujare boropateivure jácuyume ñ, arí buedejame Jesús.

**Pöeva ne ñarí majibenore Jesúsre
ñaicójeniduo**
(Mt 16.1, 4; Mr 8.11-12; Lc 11.16, 29-32)

³⁸Dinumure apevu ina Jümenijicui yávaive báquede bueipöevacavu

aru apevu fariseovacavu máre yópe arí durejaima Jesúsre:

—Mu, bueipöecu, Jümenijicui majiéque ñarí jáðovajacu pöeva ne ñarí majibenore, arí durejaima.

³⁹Æbenita Jesúsapúravu yópe arejame náre:

—Ámena bajutamu muja. Jümenijicure dajocaiyurivubu muja yópe nomió ãmeco ñi dajocaiyepere jímarepacure jocarí. Que baru jénariduiyubu ji jádovaquiyepere aivu Jümenijicui majiéque ñainore, pöeva ne ñarí majibenore. Æbenita jámenamu apenore Jümenijicui ñainore mujare, quénora yo Jonás mácure vaino mácaröre.

⁴⁰Yópe Jonás mácui cue báquepe moacu uracui yapibu jívui yóbecurijáravua aru yóbecuríñamia máre, nopedeca yu, Jümenijicui daroimu mácu ñmure, cucusuyumu joboró jívui yóbecurijáravua aru yóbecuríñamia máre.

⁴¹Aru Jümenijicui ñájiovaquijáravu baquinóre pöevare, ne ãmeina teiye boje, ina ñmuva mácvu, Nínivecavu bácvu, nacajarajarama muja ijáravucavunque, aru ñmecororájarama mujare, yure muje ju abe boje. Aru ina Nínivecavu bácvu chíori ne ãmeina teiye báquede oatvarejaquemavu, jápiayu bácvu Jonás mácui coyuiyede Jümenijicui yávaivepe. Æbenita Jonás mácui majié pueno baju bueyubu yu. ⁴²Aru Jümenijicui ñájiovaquijáravu baquinóre pöevare, ne ãmeina teiye boje, ico jaboco, aviá daino cácopúravucaco báco, nacajacoðome muja ijáravucavunque aru ñmecorocoðome mujare, yure muje ju abe boje. Ñ máco darejaquemavu joaró joboröre jocarí, jápiacoðo ñai Salomón mácui coyuiye báquede ñi majiéque. Æbenita Salomón mácui majié pueno baju bueyubu yu, arejame Jesús.

Jesús ñi coyüino abujucui copainore
(Lc 11.24-26)

⁴³Bediöva cojedeca Jesús, yópe arí, buedejame:

—Abujucu etayu bácu ñmure jocarí, voibi ñi jabuóvaino penenoi, pöecubenoí.

⁴⁴ Ûbenita jabuóvaino eabecu baru, copaiyubi ñai ùmu, ùi etaimu máscrecata. Aru copaini dayu, eaibi ñai ùmu meacure, yópe cūrami oeni meadaiñamipe páyure. ⁴⁵ Que teni nuñu, nuvaimi apevu siete paivu abujuva ùi pueno ámenare. Aru ne ecoiyede ñai ùmure, ámedadama úre pueno baju. Nopedeca vaiquiyebu ijāravucavu ámenare. Ñájinajarama yóbocajārvuare ne mamarum ñájiye báque pueno, arejame Jesús.

Jesús ù jina ne voino úre

(Mr 3.31-35; Lc 8.19-21)

⁴⁶ Jesús ùi coyuyede ina pōevare, jípacu aru ùi yóva máre úque boroteiyurivu edarejaimada ùi curói. Ûbenita jedevamia mautedejaimada na. ⁴⁷ Aru cūinacu nore cucu arejame Jesúsre:

—Mipacu aru míyova máre, mure járadaivu, jedevai núma, arejame.

⁴⁸ Ûbenita Jesúcapūravu arejame úre coyuyú bácu:

—¿Namema jípacu aru jíyova? jēniari járejame ù.

⁴⁹ Aru ùi purure jabióvarí jáđovacuñu ñujare, ùi bueimarare, arejame:

—Yuibu jípacope paivu aru jíyovape paivu máre. ⁵⁰ Que baru caivu ina ñaivu jípacu, cavarō mearocacu, ùi nrōpe, nárecabu jíyocupe páyú, jíyocope páđo, aru jípacope páđo máre, arejame Jesús.

“Oteipōecure” jári dápiarí ne ñarājiyepe aino

(Mr 4.1-9; Lc 5.1-3, 8.4-8)

13 ¹ Dijāravumareca cūramine etarí, macajitabu urabu écarui nuri, dobarejame Jesús. ² Obedivu pōeva cójjidejaima ùi yebai. Que baru jíadocū écaru joabenoí curicūre jári, jaturí, dobarejame dicūra, buecuuy pōevare. Aru caivu ina pōeva cūrejaima macajitabu urabu écarui. ³ Jesús buedejame ñujare jári dápiarí ñuje ñarājiyepe ayu caije apejēne. Yópe arí, buedejame:

—Yui oteipōecu otecunquemavu. ⁴ Ûi oteiyede, ape oteiyete tuquemavu ma

écarui. Aru míjina darí, āradaquemavu caiye iye oteiyede. ⁵ Ape oteiyete tuquemavu joborō edubenoí, cūraboa puenoí. Nore joborō yaurijje cubeniburu, maumejiena píarí etaquemavu. ⁶ Ûbenita aviá ùi boiyede, équemavu. Aru nuomua ùmujurimua cubeni, yaiquémavu. ⁷ Ape oteiyete tuquemavu miucua jēneboí. Aru yóboi miucua bucuní, chíquemavu iye oteiyede. ⁸ Aru ape oteiyete tuquemavu mearo joborói. Aru die jēquemavu, apeñu jēiñu cien paivua, apeñu jēiñu sesenta paivua, aru apeñu jēiñu treinta paivua, caiye oteiyabea coapa. ⁹ Me jápiajarā muja iye ji bueiyede, arejame Jesús.

Aipe aiyurōre Jesús ùi jári dápiarí ne ñarājiyepe aino

(Mt 25.29; Mr 4.10-12, 25; Lc 8.9-10, 18, 10.23-24, 19.26)

¹⁰ Dinumure ñuja, ùi bueimara, ùi yebai nuri, jēniari járejacarā Jesúsre:

—¿Aipe teni bueyurū mu jári dápiarí ñuje ñarājiyepe ayu mi coyuyeyequé? arejacarā.

¹¹ Aru Jesús coyurejame ñujare, yópe arí:

—Mujare coyurí majide dayubu iye Jūmenijicu ùi coyucōjeme máquede. Û jaboteibi mujare, ùi pōevare. Ûbenita ina apevu, iyede majibevure, quéda jári dápiarí ne ñarājiyepe ayu, bueyubu yu náre. ¹² Nopedeca ina jápiaivure Jūmenijicui yávaiyede, Jūmenijicu pueno baju majide ñacuyme náre. Ûbenita ina jápiabevure Jūmenijicui yávaiyede, iye ne quíjino majiède, Jūmenijicu náre ícuyme. ¹³ Jáivnvacari ji ñaiyede, coreóvayubema yure. Aru jápiaivnvacari ji coyuyede, ju aiyubema yure. Yéde majibema na ji yávaiyede. Que baru jári dápiarí ne ñarājiyeque coyuyubu yu náre. ¹⁴ Ne ñaiye nópe vaidéjaquemavu cūináturu Jūmenijicui coyucōjeiye báquepedeca ñai Isaías ámicucu ùi yávaiyede coyucaipōecu bácu. Yópe arí, toivaicōjenejaquemavu ù mácu:

Jāve jápiarídurājaramu muja.

Ûbenita yu jápiarí eabenajaramu.

Jāve jārīdurājaramu mūja.
 Ūbenita ye jāri eabenajaramu.
 15 Mūja coreóvaivūbevu, mūje yávaiyede jāvene jāpiarī eaiyūbe boje. Mūja jāpiabevū, mūje yávaiyede jāvene jāpiaiyūbe boje. Mūja bieivū mūje yacorūare, mūje jāvene jāiyūbe boje. Yūre jāri coreóvaivū baru mūje yacorūaque, ju ajebu mūja. Yūre jāpiaivū baru mūje cāmucobeaque, ju ajebu mūja. Yūre jāpiarī adaivū baru mūje ūmeque, ju ajebu mūja. Que daivure, meadajebu yu mūjare, toivaicōjenejaquemavū Jūmenijicū Isaiás bācure.

16 Ūbenita torojūmājaramu mūja, ji bueimara. Ji daiyede jāri coreóvaivūbu mūje jāiyede. Aru ji coyūiyede jāpiarī, ju aivūbu diede. Que baru Jūmenijicū mearo đacaimaramu mūja. 17 Jāve coyūyūbu mūjare: Obedivū Jūmenijicū yávaiyede coyūcaipōeva aru meara pōeva máre jāiyūrīduquemavū caiye iye mūje jāiyede. Ūbenita jāmetequemavū. Aru jāpiaiyūrīduquemavū caiye iye mūje jāpiaiyede. Ūbenita jāpiabetequemavū, arī coyūrejame űjare Jesús.

**Jesús űi coyūino aipe aiyūrōre
 “oteipōecure” jāri dāpiarī ne
 đarājiyepe aino**
(Mr 4.13-20; Lc 8.11-15)

18 Yópe arī, Jesús coyūrejame űjā űi bueimarare:

—Yo jāri dāpiarī mūje đarājiyepe ayū ji aino mácarō yópe coyūiyūrōmu mūjare: Iye oteiye Jūmenijicū yávaiyepe paiyebu űi jaboteinoque yávaiye. Aru űai oteipōecu Jūmenijicū yávaiyede bueipōecure páyūbe. 19 Aru inamu ma ēcarūi oteiye turīduiye báquepe paivū. Náre coyūiyede Jūmenijicū yávaiyede jāpiađama, űbenita coreóvarī eabevūva. Que baru ne jāpiarīburu yóboi, űai abujuvai jabocu darī, ārūmetede đabi Jūmenijicū yávaiyede, ne jāpiaiyē bāquede. 20 Aru inamu joborō edubenoī, cūraboā pūenoī, oteiye turīduiye báquepe paivū. Jūmenijicū yávaiyede

jāpiarī, torojūma me. 21 Ūbenita diede ju arīduyama na. Que baru quījino yóboi, pōeva ne cārijovaru aru űājine đaru náre, ne ju aiye boje, maumena đajocađama ne ju aiyede Jūmenijicū yávaiyede. Que teni ju abema na.

22 Aru inamu miucūa jēneboi oteiye turīduiye báquepe paivū. Na máre jāpiaivū Jūmenijicū yávaiyede, űbenita cārijijīnāma ijāravūquede. Aru torojūma tātūraque. Que baru dāpiađama caiye diede. Ūbenita dāpiabema Jūmenijicū yávaiyede. Que baru Jūmenijicū cadatebebi náre űi yávaiyeque yópe űi urōpe. 23 Ūbenita inamu mearo joborōi oteiye tuiye báquepe paivū. Jūmenijicū yávaiyede jāpiađama. Aru diede jāpiarī coreóvāđama. Nárecabu ju are đaiivū apevū pōevare, apevū cien paivūre, aru apevū sesenta paivūre, aru apevū treinta paivūre, arī buedejame Jesús űjā űi bueimarare.

**“Āmecōria oteiye jēneboi” jāri
 dāpiarī ne đarājiyepe aino**

24 Apeno jāri dāpiarī űjē đarājiyepe ainoque buedejame Jesús:

—Jūmenijicū jaboteino yópe painomu. Cūinácū űmu űi oteiye méne, trigo āmicūede, otequemavū jioi. 25 Ūbenita űami, pōeva ne cāiyede, űi maucu dupini darī, otequemavū āmecōriare űi oteiye jēneboi. Aru que đarī buojarī, űuquemavū űai űi maucu. 26 Que baru oteiye me pīarī bucūiyede, āmecōria máre pīarī bucūquemavū. 27 Dinūmure űai jio upacu űre memecaivū űi yebai nurī, aquemavū: “Mū, űjē jabocu, ¿otebetecurū oteiye méne jioi? Jājacu. Mī oteiyeque āmecōria máre cuvū”, arī coyūquemavū. 28 űai jio upacu náre coyūyū: “Ji maucu que đayūme”, aquemavū. Ūre memecaivū jēniari jāquemavū: “¿Iye āmecōriare ĩnajidi űjā?” aquemavū. 29 Ūbenita űai jio upacu aquemavū: “Bítamu. Mūje űyede āmene, méne máre ĩnajichūvū mūja. 30 Bucūicōjejara caiyede, oteiye méne aru āmecōriare máre, pū jējāravū eaiyeta. Jējāravū eaiyede, yópe

coyucnyumtu yu ji oteiyede ícaipõevare: ‘Mamarumũ ijara mũja iye ãmecõriare. Ìni, tóroa ðarĩ, ditoroa coapa buorĩ, juajarã mũja. Ëbenita iye oteiyede méne trigo ãmicuẽde ñiniburu, epejarã ji epeiñami jívui’, coyucnyumtu náre”, aquemavũ ñai jio upacu, arĩ buedejame Jesús.

“Oteiyabe mostazare” jári dápiarĩ ne ðarãjiyepe aino

(Mr 4.30-32; Lc 13.18-19)

³¹ Apeno jári dápiarĩ ñuje ðarãjiyepe ainoque buedejame Jesús:

—Coyuqijivũ mũjare aipe ãrojarore yo Jũmenijicui jaboteinore. Yópe mostaza ãmicuriyabe oteiyabepebu. Cũinácũ ãmu diyabede ñni, oteibi ãi jioi. ³² Diyabedecabu oteiyabe quĩjiyabe caiye oteiyede pueno. Ëbenita ãi oteniburu yóboi, bucũrĩ mũivũ uracu ape oteiyede pueno. Aru dicũ cavabua uracavabua mũivũ, dicũ taino cãchinois mĩjina ne juaiboa ðaðama, arejame Jesús.

Nopedeca mamarumũre Jũmenijicui jaboteino quĩjinotamu, põeva obebevu ne cue boje noi. Ëbenita Jũmenijicui yávaiye méne coyurĩburu yóboi, urarõtamu no Jũmenijicui jaboteino, obedivũ põeva ne cue boje noi.

“Páure bucure ðaiyede” jári dápiarĩ ne ðarãjiyepe aino

(Lc 13.20-21)

³³ Bediõva diede buedejame Jesús apeno jári dápiarĩ ñuje ðarãjiyepe ainoque, yópe arĩ:

—Jũmenijicui jaboteino yópebu nomió õi páure bucure ðaiyede. Diede ðarĩ jívaiyepubu yóbecuricubua páu ðaicurubua. Aru caino jívai bore bucuvainopebu, arejame Jesús.

Aipe teni Jesús ãi bueno jári dápiarĩ ne ðarãjiyepe aiyede

(Mr 4.33-34)

³⁴ Caiye iye jári dápiarĩ ne ðarãjiyepe aiyede coyurejame Jesús ina obedivũ põevare. Coyure curejame cainumua jári dápiarĩ ne ðarãjiyepe aiyede ãi

bueinore. ³⁵ Nópe vaidéjavũ cũináturu Jũmenijicui coyucõjeiye báquepedeca cũinácũ ãi yávaiyede coyucãipõescu bácuere. Yópe arĩ, toivaicõjeneaquemavũ ãi mácuere Jũmenijicui:

Jári dápiarĩ ne ðarãjiyepe ainoque coyucnyumtu yu põevare. Iye yávaiye jáðovame máquede Jũmenijicui járavũre cuedaquiye jipocamata coyucnyumtu yu náre, arĩ toivaicõjeneaquemavũ.

Jesús ãi coyũino aipe aiyurõre “ãmecõria oteiyede jẽneboi” jári dápiarĩ ne ðarãjiyepe aino

³⁶ Dinumũ ina obedivũ põevare ðajocarĩ, cũrami ecorejame Jesús. Aru noi ñũja, ãi bueimara, ãi yebai nurĩ, yópe arejaraã úre:

—Mu, bueipõescu, coyujacu ñũjare aipe aiyurõre yo jári dápiarĩ ñuje ðarãjiyepe ayu mi aino mácarõre, ãmecõria oteiyede jẽneboi, arejaraã.

³⁷ Yópe arĩ, coyurejame ñũjare Jesús:

—Ñai jio upacu oteiyede méne oteicõjeũpe páyubu yu, Jũmenijicui ðaroimũ mácu ãmũpe. ³⁸ Ëi jio ijãravũre painomu. Iye trigo ãmicue oteiyebu Jũmenijicui jaboteimarape paivũ. Aru iye ãmecõriamũ abujuvai jabocui jaboteimarape paivũ. ³⁹ Ñai jio upacui maucube, ãmecõriare oteyũ, abujuvai jabocupe páyũ. No járavũ oteiyede jẽijãravũ ijãravũ cũiquĩjáravũre painomu. Aru ina oteiyede ícaipõevamũ ángelevape paivũ. ⁴⁰ Yópe ne ñni juaiyede toaque iye ãmecõriare, nopedecca vaiquĩyebu ijãravũ cũiyede.

⁴¹ Yu, Jũmenijicui ðaroimũ mácu ãmũpe, darocnyumtu ji ángelevare ji jaboteimara yebai. Ina ángeleva ñnajarama caivũ ina ji jaboteimara jẽneboi ãmeina ðaivũre aru apevũre ãmeina ðare ðaivũre máre. ⁴² Náre ñni jarorãjarama toabo cũiméboi. Chõioivũ orĩ curãjarama nore. Aru jaraã cõpi curãjarama na. ⁴³ Dinumũ maquinõre ina põeva meara, ina ðaivũ yópe Jũmenijicui urõpe, curãjarama majepacu Jũmenijicui jaboteinoi, miadãre ðaivũre

yópe aviá ùi boiyepe. Me jápiajarā mña iye ji bueiyepe, arejame Jesús.

**“Bojecue yaveiyede” jári
dápiarī ne ðarājiyepe aino**

⁴⁴ Apeno jári dápiarī ñuje ðarājiyepe ainoque buedejame Jesús:

—Jūmenijicui jaboteinomu yópe bojecuede yaveiye báquepe jioi. Cūinácu ūmu memēñu, ùi ūiyede joborō jívui eayū baru bojecuede yaveiye báquede noi, epeni yaveyube diede cojedeca. Aru jiore copainuri, caiye ùi cūvaede jíni bojedarī, no jiore bojedayube, cuvacyu iye bojecuede, arejame Jesús.

**“Perla āmicurijībo cūrajibo
pare bojecurijibore” jári
dápiarī ne ðarājiyepe aino**

⁴⁵ Apeno jári dápiarī ñuje ðarājiyepe ainoque buedejame Jesús:

—Jūmenijicui jaboteinomu yópe bojedaiþōecui voiyepe cūrajiboa perla āmicurijībo bojecurijīboare. ⁴⁶ Ñai ūmu eayū baru cūinájibo perla āmicurijībo cūrajibore, bojecurijībo caiboa apeboa pñeno, caiye ùi cūvaede jíni bojedacunuñume, ñni bojedacuyū nijibore, arejame Jesús.

**“Pápicu uracure” jári dápiarī
ne ðarājiyepe aino**

⁴⁷ Apeno jári dápiarī ñuje ðarājiyepe ainoque buedejame Jesús:

—Jūmenijicui jaboteinomu yópe pápicu uracu ne jaboáicu jia uradaí, obedivu moa ne coiyepe dicui. ⁴⁸ Dicu buiyede, ina moa boaiþōeva dicure nvari, jabuborī écaruita, noi dobarī, jári beorī adaivubu caivu ina moa mearare ne pñeá jívui. Aru caivu ina āmenare jaruvavubu na. ⁴⁹ Nopedeca vaiquíyebu ijāravu cūiyede. Ina ángeleva darī, jári beorī ñajarama ina þōeva āmenare ina meara jēneboi. ⁵⁰ Ina āmenare jararājarama toabo cūiméboi. Chōivū orī curājarama nore. Aru jararī cōpi cūrajarama na, arejame Jesús.

Bueiye mamae aru javeque máre

⁵¹ Yópe arī, jēniari járejame ñujare Jesús:

—¿Caiye iye ji coyuiyede mñjare jápiarī eaivurū mña? arejame ñujare.

Aru arejacarā úre:

—Jápiarī eaivubu ñuja, arejacarā.

⁵² Que arī, Jesús arejame ñujare:

—Caivu ina Jūmenijicui yávaiye báquede bueiþōeva bueivū baru Jūmenijicui jaboteiyede ùi þōevare yópe ji coyuiyepe, bueni buojarājarama Jūmenijicui yávaiye báque javede aru Jūmenijicui yávaiye mamaene máre, cadatenajivū ina jápiaivure, ne majinajiyeye aivu aipe ðaiye jaurōre. Nopedeca cūrami upacu davaibi ùi cuvae javequede aru mamaene máre ùi epeiye báquede ùi cūrami jívui, cadatecuyū diñamicavure ne ðaiyede, arejame Jesús.

Jesús Nazarei ùi nuino

(Mr 6.1-6; Lc 4.16-30; Jn 4.44)

⁵³ Caiye iye jári dápiarī ne ðarājiyepe aiyede coyurīburu yóboi, nñrejame Jesús nore jocarī. ⁵⁴ Copainñrejame ùi joborōi. Aru judíovai cōjjiñami buedejame þōevare. Úre jápiaivu cuēcumari arejaima:

—¿Ároqueba caiye iye ùi majié aru iye ùi ðaiye þōeva ne ðarī majibede? ⁵⁵ ¿Ñai āmeni jocure memeiþōecui mácu? ¿Ico María āmicuco āmeni jípacu? ¿Úi yóva āmeni Santiago, José, Simón, aru Judas máre? ⁵⁶ ¿Aru ùi yórōmiva máre cubedi majaque yui? Que baru, ¿ároqueba caiye iye ùi ðaiye ñai ūmu, majape páyu? jēniari járejaima na.

⁵⁷ Que arī, āmeina járejaima úre. Ubenita Jesúsapūravū náre arejame, ne ju abe boje úre:

—Cubebi Jūmenijicui yávaiyede coyucaipōecu ne pueðaimū ùi joborōcavū aru ùi cūramicavū máre, arejame.

⁵⁸ Aru obebejie þōeva ne ðarī majibede ðarejame nore, ne ju abe boje úre.

Juan Bautista bácu ùi yaino

(Mr 6.14-29; Lc 3.19-20, 9.7-9)

14 ¹ Dinumu ñai Herodes, ñuja Galilea āmicurijiborōcavū ñuje

jabocu, jápiarejameđa Jesúí borore.

²Jápiayũ, úre memecaivure arejameđa:

—Ñaime Juan Bautista. Nacajacube yainore jarũvarí. Que baru yópe parucube ũ, ũbenina arejameđa.

³Nópe dápiarejameđa Herodes, Juan Bautista bácu arucure cãreja, ũi yaiquiye jipocai, Herodes ũi buoicõjeiye báque boje úre. Aru buoicõjenejameđa, jacocuyũ ãmeina teivure jëni jacoĩnami, yópe Herodei márepaco Herodíai urõpe. Nópe urejacođa, õi jorojĩye boje ũi ãmecoroie báquede Herodede, ũi cuvae boje óre, ímacu Felipei márepacore. ⁴Javede Juan Bautista bácu ávarejameđa Herodede: “Jũmenijicui ðaicõjeiye Moisés bácu ũi coyuiye báque cuvaicõjemevũ mure apecui márepacore”, ávarejameđa úre.

⁵Herodecapuravu Juan Bautista bácu boarí jarũvaiyucuvacari, jidurejameđa ina obedivũ põevare, “Jũmenijicui yávaiyede coyũcaipõecube Juan Bautista”, arí dápiaivure. ⁶Ūbenita cūinájáravũ ũi árũrijáravũ eaiyede, Herodei põetejáravũ bácarõre, torojuve teino ðarejameđa ũ. Dijáravure Herodíai máco nuri, uparejacođa caivũ ina Herodei cutuimara ne jáiyyede. Que teni Herodede pare coyũarejacođa õ. ⁷Que baru parúque arejameđa óre:

—Jíquiivũ mure yéde mi urõre. Yũre ñájine ðajacurí Jũmenijicu, ji ðabedu yópe ji ainope, arejameđa.

⁸Jípaco jëniaicõjenejacođa óre. Aru ico nomiõ bojũyo arejacođa Herodede:

—Jíjacu yũre carijie Juan Bautistai jipobure jororũque, arejacođa õ.

⁹Õi jëniainore jápiarí, chíorejameđa ñai jabocu. Ūbenita ũi aiye báque boje parúque ũi cutuimara ne jápiaiyede, jícaicõjenejameđa óre. ¹⁰Boaipõecure jarorejameđa ãmeina teivure jëni jacoĩnami jívu, ũi burarí jarũvaquiyepẽ ayũ Juan Bautistai jipobure. ¹¹Burarí buojarí, jororũque nuvari, jídejameđa ico nomiõ bojũyore. Aru jídejacođa jípacore, õi majicojiyepẽ ado Juan Bautista bácu jáve yaivyá bácu.

¹²Aru Juan Bautista bácuí bueimara

nuvarejaimađa ũi baju bácarõre, jarũvarájivũ cũracobe jívu. Que teniburu yóboi, coyũrãnurejaimađa Jesúre die borore.

Jesús ũi ãre ðaino cūinápũrũpe paimil baju ũmũvare

(Mr 6.30-44; Lc 9.10-17; Jn 6.1-14)

¹³Jesús dieđe jápiayũ bácu, nore jocarí nurejame jíadocũi, ina põeva obedivure ðajocarí, pũ põecubenoita. Ūbenita nuñũre majidejaimađa na. Aru mái ũi yóboi nurejaima na, obedivũ ímaroacavũ. ¹⁴Ūi jataiyede, êcarũ marí, ina obedivũ põevare cõmaje ãroje járejame Jesús. Nácavũ ijimarare meadarejame ũ. ¹⁵Nainúta ñũja ũi bueimara ũi yebai nuri, coyũrejagará úre:

—Nainútamu majare yui põecubenoí.

Põeva ne ãrajiyede bojedaránũicõjejacũ mu. Noi ímajinoai jarorí, náre “Áranũjara” ajacu mu, aridurejagará Jesúre.

¹⁶Ñũjare arejame:

—Ne ãrajiyede bojedaránũiye jaubevũ náre. Jíjará muja ne ãrajiyede, arejame ñũjare.

¹⁷Úre arejagará:

—Páuboa cūinápũrũpe paiboa aru moa pũcará cuvavũ ñũja, arejagará Jesúre.

¹⁸—Dieđe ðavajará ji yebai, arejame Jesús.

¹⁹Dinũmũre cõríá pũenora põevare dobaicõjenejame Jesús. Aru die páuboa cūinápũrũpe paiboa aru moa pũcarãre jëni, cavarõí jáñũ, torojuede jídejame Jũmenijicure. Ūi cotũvaríburu yóboi páuboa, ñũja ũi bueimara jídejagará dieđe ina põevare, yópe Jesús ũi jícõjeiye báquedecã ñũjare. ²⁰Aru caivũ ãri, yapidejaima na. Ári bubaríburu yóboi, iye cotũvaiye báquede, ne ãri oabede, ñni, meadãrí, pũebua doce paibua, judíovai pũebua, buivárejagará ñũja. ²¹Aru ina áivu bácvũ ũmũva cūinápũrũpe paimil baju barejáima. Apevũ, nomiva aru juedova máre, ãrejaima na.

Jesús ũi cuino oco pũenora

(Mr 6.45-52; Jn 6.16-21)

²²Dinũmũ Jesús jatuicõjenejame ñũja ũi bueimare jíadocũi, ñũje nuñũjeyepẽ

ayu ñi jipocai macajitabu urabu apeduve. Que teni copaicōjenezamedā ina pōevare ne cūramiai. ²³Ne nūriburu yóboi, Jūmenijicure coyucunūrejamedā cūinácūva cūracūi. Noi ñi coyuiyede Jūmenijicuque, ñami marejávūya. ²⁴Dicū, ñuje jiadocū, macajitabu urabu coricai curejavū. Pācaiboa uraboa jarururejavū dicūre. Aru ũmevu cobarejavū ñujare.

²⁵Aru jāravucapūravui aviá ñi daquie jipocai, Jesús curi macajitabu urabu puenora darejame ñuje yebai.

²⁶Ūbenita ñuja jáivu ũ cuyre macajitabu urabu puenora, jidūrivu baju cođoboborejara:

—iPōe decocu bācutame! arī cođoboborejara ñuja, jidūrivu.

²⁷Ūbenita maumena ñujare coyurī, arejame Jesús:

—Paréque dápijarā. Yútamū Jesús. Jidūbejarā muja, arejame ũ.

²⁸Dinūmūma Pedro arejame ũre:

—Mū, ji jabocu, jáve mū maru, yure daicōjejacu mi yebai, oco puenora, arejame ũ.

²⁹Aru Jesús arejame ũre:

—Dajacu, arejame.

Que jápiayu, Pedro etarejame dicūre jocarī. Aru vaivárejame oco puenora, nūriducuyū Jesús yebai. ³⁰Ūbenita ũmevu pare japuiyede jári, jidūrejamedā ũ. Jidūcu, corī búrejame. Que baru cođoboborejame:

—iMū, ji jabocu, cađatejacu yure! arejame.

³¹Maumejiena Jesús jabióvarejame Pedroe ũi pūru. Aru arejame ũre:

—¿Aipe teni jidūcurū mu? ¿Aipe teni “Jesús meadacuyame yure”, abecurū mu? arejame Pedroe.

³²Ne jatuiyede dicū jiadocūi, ũmevu bíjarejavū. ³³Aru ñuja dicūi curivu mearore jídejarā Jesúsre.

—Jāve mútamū Jūmenijicūi mácu, arejara ũre.

Jesús ũi meadaino Genesarecavu

ijimarare

(Mr 6.53-56)

³⁴Jatarīburu yóboi, earejara Genesaret āmicurijoborōi. ³⁵Aru dicūre

jocarī etaivu bācavure, obedivu pōeva coreóvarejaima Jesúsre. Que baru ñi borore jarorejaimada caino ne ĩmaroi, ne davarājiyepe aivu ijimarare. ³⁶Ūre jēniarejaima, jēni járijivu ũi cuitótecaje turūvarā. Aru caivu jēni jáivu meateivu barejāima na, ijimara mácavu.

Iye pōevare āmeina tede ñaiye

(Mt 12.34; Mr 7.1-23; Lc 6.39)

15 ¹Dinūmū fariseovacavu apēvu Jūmenijicūi yávaiye báquede buiepōevaque, Jerusalēn āmicurīmarore jocarī daivu bācavu, járadarejaima Jesúsre. Aru ũre yópe arī, jēniari járejaima:

²—¿Aipe teni mi buemara ne pūruáre cojabedi ne ārajiye jipocai, Jūmenijicūi me jáquiepe aivu náre? Yópe ne āiyede, majeñecuva mácavu ne ñaicōjeiye báquede vainí tūyama na, arejaima.

³Jesús náre yópe arī, coyurejame:

—¿Mūja máre, aipe teni vainí tuivurū Jūmenijicūi ñaicōjeiye, ñarājivu yópe mujeñecuva mácavu ne ñaicōjeiye báquere? ⁴Jūmenijicu yópe aicōjenezajuemavu: “Mipacure aru mipacore máre urī, ju ajarā. Ūbenita ñaine āmeno coyuyure jípacure o jípacore máre, muje jabova boarī jaruvajarāri ũre”, arejaquemavu Jūmenijicu, ũi ũe boje pōeva ne cađatequiepe ayū nébucūvare.

⁵Ūbenita muja bueivūbu yópe: “Cūinácū pōecu jípacore o jípacore ayū baru, ‘Mure cađateyu buojabevū. Ji tāuturare, muje jacorpūroede, javeita jícacu yū Jūmenijicure’, ayū bájebu ũ. ⁶Ñai pōecure cađateiye jaubevu ũi bucūvare”, aivūbu muja. Que baru muje ñaiye boje yópe mujeñecuva mácavu ne ñaicōjeiye báquere, Jūmenijicūi yávaiyede bojecubede ñaivūbu muja. ⁷Muja, jujovaiyu, jáve Jūmenijicu, yópe arī, coyucaicōjenezajuemavu ũi yávaiyede Isaías bācure mujara:

⁸Ina pōeva yure ju adama ne jijecamuque. Ūbenita ñabema yópe ji urōpe. ⁹Bojecubenoque

mearore jíniduyama yure.
Bueniduyama pōeva ne
bueinore Jūmenijicui yávaiyepe,
arejaquemavū.

Que arejame Jesús ina fariseovare
aru ina Jūmenijicui yávaiye báquede
bueipōevare.

¹⁰ Jesús órejarejame ina pōevare ũi
yebai. Aru arejame náre:

—Caivu yure jápiaivū dápijarā.

¹¹ Caiye iye ecoiye pōeva ne jijecamui
jedevaque āmeina tede dābevū náre.
Ūbenita caiye iye etaiye pōeva ne
jijecamure jocarī ne ũmeque āmeina
tede dāivū náre, arejame Jesús.

¹² Dinūmure ñūja, ũi bueimara, ũi
yebai nūri, arejarcā Jesúre:

—Ina fariseova jorojñāma mure, ne
jápiayede mi coyūiyede, arejarcā ũre.

¹³ Yópe arī, coyurejame ñūjare:

—Yópe jio upacui ĩni jaruvaiyepe
caiye āmene bucuiyede ũi jioi, ũi oteiye
báque āmene, nopedeca jipacu, cavarō
mearocacu, ĩni jaruvacuyme ũre jocarī
caivu ina ũre coyūcaipōevape teivure
ūbenina. ¹⁴ Náre cārījovaicōjemejara
mūja. Námu jári eabevūpe paivū
jipocateiyurivū apévure, ūbenita jāve
ñamene cadateni majibevū. Cūinácu
jári eabecu buojabebi nuñ māi apecu
jári eabecuque. Que baru caipūcarā jári
eabevū baru, tūjebu na cobei, arejame
Jesús.

¹⁵ Pedrocāpūravū arejame ũre:

—Coyūjacu ñūjare aipe aiyūrōre yo
jári dāpiarī ñūje darājiyepe ainore,
arejame ũ.

¹⁶ Aru arejame:

—¿Mūja máre jápiarī coreóvabenaarū?

¹⁷ ¿Coreóvabenaarū caiye iye ecoiyede
pōeva ne jijecamui jedevaque, ne
yapibui earī etaiyede ne bajure jocarī?

¹⁸ Ūbenita caiye iye etaiye pōeva ne
jijecamure jocarī ne ũmeque, diedecabu,
ne dāpiaye, āmeina tede dāiye
náre. ¹⁹ Ne ũmei āmeina dāpiādama
apévure. Boarī jaruvadama pōevare.
Nomicurivūvacarī apocoque suma.
O nomiva máre ũmūcūrivūvacarī
apecuque suma. Nomicūbevū, aru

ũmūcūbevū máre, dađama caiyede
āmeina dāiyede apévūque. Ñavadama
apévū ne cūvaede. Borocuma apévui
borore. Aru coyūyama āmenore apévui
borore caivu ne jápiayede. ²⁰ Caiye iye
āmene etaiye pōeva ne ũme jívūquede,
āmeūme cure dāivū náre. Ūbenita ne
āiyede ne puruáre cojabevūva, dābevū
yópe mūjeñecuva mácavū ne dāicōjeiye
báquepe, āmeina tede dābevū náre,
arejame Jesús.

**Cūináco nomió, judíoiva āmevūcaco,
ó i ju aino Jesúre**
(Mr 7.24-30)

²¹ Dīimarore jocarī, Jesús nūrejame
apejaborōi, Tiro aru Sidón āmicūriimarōa
yebai. ²² Aru cūináco nócano, judíoiva
āmevūcaco, Canaán āmicūriyajubocaco,
ũi yebai darī, yópe arī, codoboborejaco:

—Mū, ji jabocu, David bácuī pāramecu,
judíoiva jabocu bacuyá, cōmaje āroje
jájacu yure. Jímacobe abujucu ũi ĩmamo.
Pare ñājiñome ō, arejaco ō.

²³ Ūbenita Jesúcapūravū bi ayū,
yéde coyūbedejame óre. Aru ñūja ũi
bueimaracāpūravū Jesús yebai nūri, ũre
jaroicōjenidurejarcā óre.

—Maje yóboi codoboborī daibico
ō. Que baru óre copainure dajacu mū,
arīdurejarcā.

²⁴ Jesús arejame:

—Jipacu Jūmenijicu daroibi yure, ji
cadatequiyepe ayū ñūja Israecavure
quévura. Námu yópe ovejava
mamateivūpe paivū, náre coreipōecu
cūvabevūpe, arejame Jesús.

²⁵ Ūbenita ō darī, ñūatutarī ũi jipocai,
puedacodo ũre, arejaco:

—Mū, ji jabocu, cadatejacu yure,
arejaco.

²⁶ Jesúcapūravū arejame óre:

—Meamevū ĩnu juédova ne āiyede,
jínajivū yavimivare, arejame ũ.

Que arī, aiyūcu barejaquémavū
judíoivare Jūmenijicui mārāpe aru
judíoiva āmevūre yavimivare.

²⁷ Aru ócapūravū arejaco:

—Mū, ji jabocu, jāve coyūivū mū.
Ūbenita yavimiva máre āđama náre

upacü jivü ne äri jarüvayie tuiye báquede tuoivare jocarí, arejaco Jesúre.

²⁸ Jesús arejame:

—Mü, ji ümo, urarõ ju adobu yure.

Que baru ðacaivü müre yópe mi ürópe, arejame óre Jesús.

Aru cüiná meatedejaquemavü õi máco.

Jesús üi meadaino obedivü ijimarare

²⁹ Jesús nürejame nore jocarí.

Vaidéjame macajitabü urabü Galilea ämicurijitabü écarü. Aru cüracü uracüü müri nuriburu yóboi, dicü pñenoí dobarejame ü. ³⁰Noi dobacure, obedivü pöeva darejaima üi yebai. Davarejaima cuiye majibevüre, jári eabevüre, purü ijimarare, yávayie majibevüre, aru apévure máre. Náre jüarejaima Jesúü cuboba yebai. Aru náre meadarejame ü. ³¹Que teni caivü ina obedivü pöeva cuicumarejaima ne jáiyede ina yávayie majibevü bácvü yávaivüre, ina ijimara mácvü meadaimarare, ina cuiye majibevü bácvü vaiváivüre, aru ina jári eabevü bácvü jáivüre. Aru caivü ina pöeva mearore jídejaima Jümenijicure, maja Israecavü maje mearore jímure.

Jesús üi äre ðaino yóvaicuvaimil baju

ümüvare

(Mt 8.1-10)

³² Dinümü Jesús órejarejame ñüja üi bueimarare üi yebai. Aru arejame:

—Cómaje äroje jáivü yü ina pöevare. Ina obedivü cüma yúque yóbecurijárvava. Aru äiyede cuvabema. Apevü ne cüramía joarótamu. Que baru copaicójeiyübevü yu náre. Máí müri, mamaðajebu, ne ävüé ñájiye boje, arejame Jesús.

³³ Ñüjacapüravü jëniari járejacarä úre:

—¿Äri earäjidica ñüja äiyede yui pöescubenoí, jínajivü caivü ina obedivü pöevare? arejacarä ñüja.

³⁴ Jesúcapüravü jëniari járejame ñüjare:

—¿Aipino páuboare cüvaräru müja? arejame ü.

Aru arejacarä:

—Siete paiboabu. Aru obebejina moajinare máre cuvavü, arejacarä.

³⁵Que aiyede, ina pöevare dobaicöjenezame joboröi. ³⁶Diboá páuboa siete paiboare ini, aru ina moajinare máre ini, torojuede jídejame Jümenijicure. Üi cotüvaríburu yóboi páuboare, ñüja üi bueimara jídejarä diede ina pöevare, yópe Jesús üi jícójeiyie báquepedeca ñüjare. ³⁷Que ðaiyede, äri yapidejaima caivü. Aru äri bubaríburu yóboi, iye cotüvayie báque páu aru moa máre, pöeva ne äri oabede ini, meadarí, pueá siete paipuea, judíova änevü ne pueäre, buivárejarä ñüja. ³⁸Ina äivu bácvü ümüva yóvaicuvaimil baju barejáima na. Aru apevü, nomíva aru juedova máre, ärejaima na. ³⁹Jesús üi copaicöjeniburu yóboi ina pöevare ne cüramiai, jádocüü jaturí, nürejacarä úque apejoboröi, Magadán ämicurijoboröita.

Fariseovacavü aru saduceovacavü ne jëniaino pöeva ne ðarí majibede

(Mt 12.38-39; Mr 8.11-13;

Lc 11.16, 29, 12.54-56)

16 ¹Apevü fariseovacavü aru saduceovacavü máre jüjovaiyürädjarejaima Jesús yebai. Jëniarejaima üi jádovaquiyepe äivu náre pöeva ne ðarí majibede, cavarõ mearo Jümenijicüi curóquede. ²Jesús, yópe arí, coyürejame náre:

—Aviá üi doiyede, “Ocopenibobu jüaripenibo. Que baru javena meajárvavü baquiyébu”, aiyavü müja. ³Aru aviá üi cóaiyede, “Ocopenibobu jüaripenibo. Que baru cari járvavü ocaquiyebu”, aiyavü müja. Cavaróquede coreóvaivüvacari, übenita pare coreóvabevübu müja jjaravüi vaiyede. ⁴Müja ämena bajutamü, dajocaiyürivü Jümenijicure yópe nomió ämeço õi dajocaiyepere jímarepacure jocarí. Müjarecabu jëniaridivüü jádovaiye pöeva ne ðarí majibede. Übenita jámenamu müja apenore Jümenijicüi ðainore müjare, quénora yo Jonás mácure vaino mácaröre, arejame Jesús.

Que arí, náre dajocarí nürejame ü.

Fariseova ne ämeno dápiyaiye

(Mt 14.17-21, 15.34-38; Mr

8.14-21; Lc 12.1)

⁵Jataivü bácvü macajitabü urabü apeduveita, ñüja Jesúü bueimara

coreóvarejacadā ārumeteivū bācavū páure. ⁶Jesús arejame ñujare:

—Me ñajará. Me jājara ina fariseova aru ina saduceova máre ne páure bucúovare ñaiyede, arejame ũ.

⁷Que teni yávarejacadā ñuje bajumia:

—Ū yópe aibi, maje páure cāvabe boje, arejacadā.

⁸Ūbenita Jesús coreóvarejaquemavū ñuje yávainore. Que baru arejame:

—¿Aipe teni yūre ju abenaru mūja? ¿Aipe teni coyūivurū mūja, “Páure cāvabevū maja” aivū? ⁹¿Coreóvabenaru mūja? ¿Aru ārumenaru mūja? ¿Ji cotūvacaiye báquede cūinárurūpe paiboa páuboare ina cūinárurūpe paimil baju ũmūvare, doce paibua puebua baju cotūvaiye báqueque ímetecarāru mūja? ¹⁰¿Aru ji cotūvacaiye báquede siete paiboare ina yóvaicvaimil baju ũmūvare, siete paipuea baju cotūvaiye báqueque ímetecarāru mūja? ¹¹Que baru mūjare jauéde, mūje ārajiyede, jíyū majivū yū. Ūbenita, “Me jājara ina fariseova aru ina saduceova máre ne páure bucúovare ñaiyede” ji ainore, coyūbetevū yū páure. Qué Nora coyūyūbu yū ne dápiayede. Que baru me jājara, mūje dápiabenajiyere aivū yópe ne dápiayere, arejame ñujare Jesús.

¹²Dinumū coreóvarejacadā coyūyere ina fariseova aru ina saduceova máre ne bueiye. Yópe páure bucūre ñaiye jīvaiyere, caiye iye páu ñaiyede, nopedeca ne bueiye jāve āmeque jūjovādama obedivū pōevare, arejame Jesús.

Pedro ũi “Cristobu mū” aino

(Mt 14.1-2, 18.18; Mr 6.14-15, 8.27-30;

Lc 9.7-8, 18-21; Jn 6.68-69, 20.23)

¹³Jesús, ũi eaiyede Cesarea de Filipo āmicarōi, ñuja ũi bueimare jēniari jārejame:

—¿Aipe aidi pōeva yūre, Jūmenijicūi daroimū mácure ũmūpe? arejame ũ.

¹⁴Ūre arejacadā:

—Apevū adama, “Juan Bautistabe”. Aru apevū adama, “Elíabe”. Aru apevū

adama, “Jeremíame”. Aru apevū adama, “Cūinácū Jūmenijicūi yávaiyede coyūcaipōescube ũ”, arejacadā ũre.

¹⁵Aru arejame ñujare:

—¿Ūbenita aipe aivurū mūja yūre? arejame Jesús.

¹⁶Aru Simón Pedro arejame ũre:

—Mū Jūmenijicūi daroimū mácūbu, ñujare jabotecuyū. Cristobu mū. Jūmenijicūi apūcūi mácūbu mū, arejame Pedro Jesúre.

¹⁷Aru Jesúcapūravū, yópe arī, coyūrejame Pedrore:

—Mū, Simón, Jonái mácu, torojūcuyūmū mū. Jūmenijicūi mearo ñacaimūmū mū. Pōescu cubebi coreóvare ñayū mūre diede. Qué Nora jipacu, cavarō mearocacūrecabe coreóvare ñayū mūre diede. ¹⁸Coyūyūbu mūre: Mí āmiámū Pedro. No āmiá cūravacarō aiyūrōmū. Mí coyūiyebu yūre yópe cūrava ũrava parūrivape paie cūrami cāchinoi. Caivū ju aivure yūre, aru caivū ju arājivure yūre máre, coyūiyē javū yūre mi coyūiyere paie. Aru caivū ina yaibénajarama ne ũmei. Que baru coatebenajarama Jūmenijicūre jarūvarī. ¹⁹Yópe ñai cūvacū cūramine voainore, llavede, ũi ecoicōjeiyere pōevare ñāmine, nopedeca coyūicōjeivū mūre ji yávaiye méne pōevare, ne ecorājiyere ayū Jūmenijicūi jaboteinore, diede ne ju aru. Mi jacopūbemarare ijārvūi jacopūbecuyūme Jūmenijicūi cavarō mearo ũi cūrōi. Aru mi jacopūimarare ijārvūi jacopūcuyūme Jūmenijicūi cavarō mearo ũi cūrōi, arejame Jesús.

²⁰Aru parúéque ñujare “Jesúbe ñai Cristo, Jūmenijicūi daroimū mácu”, arī coyūicōjemenejame apevure.

Jesús ũi coyūino ũi yaiquínore

(Mt 10.38-39, 25.31; Mr 8.31-9.1; Lc 9.22-

27, 14.27, 17.33; Jn 12.24-25; Ro 2.6)

²¹Dinumumata Jesús jáðvari

būrejame ñuja ũi bueimare ñājicūnūcuyūre Jerusalén āmicrūīmaroi. Yópe arī, buedejame ñujare:

—Javū yūre ũrarō ji ñājiquino. Ina judfōva bucūva, aru sacerdotevare

jaboteipõeva, aru Jümenijicui yávaiye báquede bueipõeva máre yüre ñájjine ñarãjarama. Yüre boarí jaruvarãjarama. Aru yóbecurijãravua yóboi nacajacuyumu yu yainore jaruvarí, arí coyurejame ñujare.

²²Pedro úre ñuwarejame apevu ñujare jocarí. Aru yópe arí, jararidurejame Jesúre: —iMu, ji jabocu, mi que aiyepo vaicõjemejacurí mure Jümenijicu! arejame Pedro.

²³Ûbenita Jesús copedini, arejame Pedroro:

—Mu, Satanás, jujovarídubecacu yüre. Ñujacu mu yüre jocarí. Murecabu maucuvacu yüre mi nópe ayeque. Dápiavü mu pøevape. Aru dápiabevü mu Jümenijicu jiede, arejame Jesús.

²⁴No yóboi Jesús, yópe arí, coyurejame ñuja úi bueimarare:

—Ácu pøescu daiyucu yúque, dajocajacurí pøeva ne mearo jáiyede úre, cuyebecacurí yüre yóvaiyede, aru jidubecacurí úi ñájjiquyede. Nópe ñabecu baru, ñ buojabebi jícu bacuyú. ²⁵Ñai pøecu úi baju urøpe ñarí, meadaiyucu baru úi bajure, coatecuyume úi bajure Jümenijicure jaruvarí, yópe yaiyú bácupe úi úmei. Ûbenita ñai pøescu, “Ye baju ámevü, ji yaidú Cristore boje” ayü, úi baju urøpe ñabecuna quénora ji urøpe ñarí, úrecabe ji meadaquimü, cuscuyü Jümenijicunque cainumua. ²⁶Ñai pøescu cuvacu baru caiye ijãravuquede, Ûbenita bíjauyü baru úi úmene, ñájjicuyume cainumua toabo cüiméboi. ²⁷Que teni yu, Jümenijicui daroimü mácu úmure, meacu baju dacuyumu jipacuí mearoque aru ji ángelevaque, bojedacuyü caivü pøevare yópe ne ñaiyepo. ²⁸Jãve coyuyübu mujare: Apevu curivü yui, ne yainájjie jipocai jãrajarama yüre, Jümenijicui daroimü mácupe úmure, jaboteyure, arejame ñujare Jesús.

Jesús úi baju oatuvaino

(Mt 3.17, 11.14, 12.18; Mr 1.11, 9.2-13; Lc 3.22, 9.28-36; 2 P 1.17-18)

17 ¹Seis paijãravua yóboi, Jesús ñuwarejame Pedroro, aru

Santiagore, ímacü Jüare máre. Jipocatedejameða náre cüracü úmujuricü puenoi, apevure jocarí.

²Aru na járejaimada úi oatuvaiye me bajure. Úi jiva pøorejavüya, yópe avia úi pøoiyepo. Úi cuitótecaje máre pøorejavüya, pare boricaje yópe miadárope. ³Aru járorejaimada Elías Moisémaque. Núrejaimada boroteivü Jesúque. ⁴Aru Pedro arejameða Jesúre:

—Mu, ji jabocu, mearotamu ñuje curu yui. Mi uru, ñacaquijivü yu yóbecuríñamia cüramia quijíñamia maquiyéde. Cüinádami míñami maquinóre, aru apeðami maquinóre Moiséde, aru apeðami maquinóre Elíare ñacaquijivü yu, arejameða Pedro.

⁵Úi coyuiyedeca, oopenibo miadáripinibo émeni, taorejavüya náre. Aru jápiarejaimada apeno yávainore, oopeniboi etaiyede: “Ñaime jímacü, ji umü. Me torojvü yu úre. Que baru jápiajará úi coyuiyede”, arejaquemavü Jümenijicu.

⁶Ina yóbecurá Jesúí bueimara ne jápaiyede diede, jidurí, mori turejaimada joborói. ⁷Ûbenita Jesús ne yebai nuri, náre tuorí, arejameða:

—Nacajajara muja. Jidubekarã, arejameða Jesús.

⁸Ne jáiyede, járejaimada Jesúre cüinácüra. ⁹Aru émeni daiyede dicü cüracüre jocarí, Jesús apevure coyucõjemenejameða náre ne jáino mácaröre. Yópe arejameða:

—Me jápiajará muja. Coyubekarã apevure no muje jáino mácaröre cüracü úmujuricü puenoi pu ji nacajariburu yóboita yainore jaruvarí. Yúbu Jümenijicui daroimü mácu úmure, arejameða náre Jesús.

¹⁰Aru ina úi bueimara, coreóvaivü úre Jümenijicui daroimü mácupe, úre jëniari járejaimada:

—¿Aipe teni aivüba ina Jümenijicui yávaiye báquede bueipõeva, “Mamarumü Elías dacuyume, ñai Jümenijicui daroimü úi daquiyepo jipocai”? arejaimada na.

¹¹Aru Jesús arejameða náre:

—Jāve Elíarecabe meadacudacuyū caiyede, Jūmenijicūi daroimū ūi daquiye jipocai. ¹²Jave dāme Elías, ayūbu yū mūjare. Ūbenita pōeva ūre coreóvabeteima na. Quénora ne urōpe daima ūre. Quédecabu yūre, Jūmenijicūi daroimū mácure ūmūpe. Yūre máre pōeva nájine darājarama, arejameđa Jesús.

¹³Dinumūre ina ūi bueimara coreóvarejaimađa ūi coyūiyede náre Juan Bautista bācure.

**Jesús ūi meadaino juedocure,
abujuca ūi imamūre**
(Mt 21.21; Mr 9.14-29, 11.23;
Lc 9.37-43; 1 Co 13.2)

¹⁴Jesúja ne eaiyede obedivū pōeva yebai, cūinācu ūmū nūrejame Jesús yebai. Nūatutarī ūi jipocai, pueđacuyū ūre, arejame:

¹⁵—Mū, ji jabocu, cōmaje āroje jājacu jīmacūre. Bidini, aru aburi etarī ūi jījecamūre, pare nájimi ū. Apenūma taibi toaboi. Aru apenūma jiai turī coibi ū. ¹⁶Ūre đavavu yū mi bueimara yebai, ūbenita meadaiye majibetema na, arejame Jesúre.

¹⁷Jesús arejame:

—Mūja, ijāravucavu, Jūmenijicure ju abevū aru āmeina teivū máre, ¿aipijāravua cuquidi yū mūjaque? ¿Aru aipijāravua nájiquidi yū mūjaque, mūje ju arājiyepe ayū ji coyūiyede? Davajacu mīmacūre ji yebai, arejame Jesús.

¹⁸Que teni Jesús nāi abujucure jararī, jaetovarejame juedocure jocarī. Aru maumejiena meatedejame ū.

¹⁹Que đarīburu yóboi, nūja ūi bueimara jēniari jāre nūrejacarā Jesúre cūinācura, yópe arī:

—¿Aipe teni nūja jaetovarī majibetedi nāi abujucure? arejacarā nūja.

²⁰Aru Jesús arejame nūjare:

—Quíjino mūje ju aiye boje yūre, que baru jaetovarī majibetevū mūja. Jāve coyūyūbu mūjare: Oteiyabe mostaza āmicuriyabe quíjiyabetamu. Ūbenita pīarīburu yóboi, jocusū uracūtamu. Nopedeca mūje ju aru yūre quíjino, nópe

quíjiyabe oteiyabepe, Jūmenijicu urarō mearore đajebu mūjare. Mūja me ju aivū Jūmenijicure mūje cōjenu icū cūracū uracūre yópe: “Nūjacū yore jocarī pu ānoita”, dicū ju ajebu mūje cōjeiyede. Jāve ju aivū baru yūre, caiye đaiyede majinajaramu mūja. ²¹Jūmenijicure jēniaye javū āmevūva āiyede, abujucu nāipe páyure mūje jaetovarājiyepe aivū, arejame nūjare Jesús.

**Jesús ūi coyūino cojedeca ūi
yaiquínore**

(Mr 9.30-32; Lc 9.43-45)

²²⁻²³Nūje cōjijiyedeca Galilea āmicurījoborōi, Jesús, yópe arī, buedejame nūjare:

—Yūre, Jūmenijicūi daroimū mácure ūmūpe, jēni jīnajivūbu ji mauvare, ne boarī jarūvarājiyepe ayū yūre. Aru yóbecurījāravua yóboi, Jūmenijicu nacovacuyūme yūre yainore jarūvarī, arejame Jesús.

Ūi nópe aiyede, pare cārijivū barejacrā nūja.

**Jūmenijicūi cūramine coreivū ne
pōevare jīcaicōjeino tātūrare**

²⁴Nūje copaidaiyede Capernaum āmicurīmaroi, Pedro yebai darejaimađa ina Jūmenijicūi cūramine tātura ícaipōeva. Ūre jēniari jārejaimađa, yópe arī:

—¿Jībedi nāi mi bueipōecu tātūratūravare, Jūmenijicūi cūramine meadaiye boje? arejaimađa.

²⁵Aru Pedro ju arejameđa náre:

—Jūju, jībi ū, arejameđa.

Aru cūrami copaiyede, mamarūmūre Jesús jēniari jārejameđa ūre, yópe arī:

—Mū, Simón, ¿aipe dápiayūgū mū? ¿Nāmene jocarī tātūrare īni ijāravucavu jabova? ¿Īni ne jaboteimarare jocarī o apevūre jocarī? arejameđa Jesús.

²⁶Pedro arejameđa:

—Tātūrare ĩnāma apevūre jocarī, arejameđa.

Jesús arejameđa:

—Que baru ne jaboteimarare jíye javbevū tātūrare ne jabovare.

Quédeca táuturare jíye jauvevu yure, Jūmenijicui mácre, ne meadarājiyepe jipacui cūramine. ²⁷Ūbenita ne jorojīmenajiyepa majare, jajovacunujacu mū macajitabu urabu ēcarui. Nāi mamaramū mi ímu moacu ūi jijecamure voarī, eacuyumu mū cūináturava táuturatavare, jicacuyū yure aru mure máre. Diturava cūináturu baquiyébu maja pucarā majare jíye jaué Jūmenijicui cūramine meadaiyede, arejamedā Jesús.

Aru yópe Jesús ūi daicōjeiyepe ðarejamedā Pedro.

¿Namema parucu maje jēnebore?

(Mr 9.33-37, 10.15; Lc 9.46-48, 18.17, 22.24)

18 ¹Dinūmure ñuja, ūi bueimara, nurejacařā Jesús yebai. Aru jēniari járejacařā ūre:

—¿Namema parucu apevu pūeno Jūmenijicui jaboteinore? arejacařā.

²Jesús órejarejame cūinácu juedocure. Nūvarejame ūre ñuje coricai. ³Aru arejame:

—Jāve soyuyubu mujare: Juedova “¿Meara márica ñuja?” arī dápiabevupe dápijařā mūja. Oatuvabevu baru mūje dápiaiyede, Jūmenijicui jaboteimara teivu buojabenajaramu mūja. ⁴Ácu pōecu “¿Meacu bárica yu?” abecu baru, yópe ñai juedocure, ūrecabe parucu apevu pūeno Jūmenijicui jaboteinore. ⁵Cūinácu pōecu coru etayu baru cūinácu juedocure ji amíai, ji cōjeiyepe, que ðayu coru etaibi yure, arejame Jesús.

Jidojarō maje āmeina teino

(Mt 5.29-30; Mr 9.42-48; Lc 17.1-2)

⁶Ñujare yópe arī, buede nurejame Jesús:

—Ácu pōecu ūi āmeina tede ðaru apesu yure ju ayure parubecureca, ūi ðajocaquiyepa ayū ūi ju aiyede yure, meajebu ūre jaruvavu ūi ñamemui buorī cūinábo cūrabo uraboque jia uraðai. ⁷Chiori āmeno ñájinajarama ina ijāravucavu jujoivaivū apevure,

ne āmeno ðarājiyepe aivu. Jāve jujovarājarama mujare. Ūbenita ñai jujovare ðayu apevure chīori āmeno ñájiycuyūme ū. ⁸Aru mū āmeno ðayu baru mi pūgūque o mi cubobaque, burarī jaruvajacu ðipūgūre o dibare. Meaquiyebu mure, mi earu Jūmenijicui curōi cūinápūgūque o cūinába cubobaque. Ūbenita meamequiyebu mure, mi nuru toabo cūiméboi caipūcarūgūaque o caipūcaba cubobaque. ⁹Aru mū āmeno ðayu baru mi yacorūque, ñi jaruvajacu ðidure. Meaquiyebu mure, mi earu Jūmenijicui curōi cūináru yacorūque. Ūbenita meamequiyebu mure, mi nuru toabo cūiméboi caipūcarūa yacorūaque, majicarī arejame Jesús.

“Oveja mamateyure” jári dápiarī ne ðarājiyepe aino

(Lc 15.3-7, 19.10)

¹⁰Jesús, yópe arī, buedejame bedióva cojedeca juedovarā:

—Cavarō mearo Jūmenijicui curōi ina ángeleva juedovare coreivu cūma cainūmua Jūmenijicui jivateinoi. Que baru cūinájicu ina juedovacacure ye āmeina jámejara mūja. Yéde āmeina ðabejarā cūinájicure. ¹¹Yu, Jūmenijicui daroimu mácu ūmūpe, meadacudaivu ina bĵare ðaivure Jūmenijicure jocarī. ¹²¿Aipe dápiaivurū mūja iye ji soyūquiyede mujare? Cūinácu ūmū, ovejavare coreipōecu, cuvacu baru cien paivu ovejavare, aru cūinácu náscu ūi mamatedu, ñai ðajocajebu ina noventa y nueve paivu ovejavare caracūai, vocūñū ñai bĵayu bácure. ¹³Aru jāve soyuyubu mujare: Eayu baru ñai mamateyū bácure, torojūjebu ūque ina noventa y nueve paivu mamatebevu pūeno. ¹⁴Quédeca cūinájicu ina quĵinacacu ūi bĵaiyede ūbebi jipacu cavarō mearocacu, arejame Jesús.

Aipe ārumeteiye jauřō majecu ūi āmeina ðaiyede

(Mt 16.19; Lc 17.3-4; Jn 20.23)

¹⁵Yópe arī, buedejame ñujare Jesús:

—Apecu ñi ãmeina ðaru mure, apevu ne jápiabenoí coyujacu úre ñi ãmeina ðaiyede. Mí coyuiyede jápiaru, ãrumetejacu ñi ãmeina ðaiyede. Aru cãrijimene ðajarã muja. ¹⁶Ûbenita mi coyuiyede jápiaiyubedu, nuvajacu ñi yebai cûinácu mujecure, ñi majiquiyepa ayu, o pucarã mujevure, ne majinajiyepa ayu, aipe mi coyuiyede úre aru aipe ñi coyuiyede mure máre, ne majicarãjiyepa ayu úre. ¹⁷Ne coyuiyede máre jápiaiyubedu, coyujacu ñi ãmeina ðaiyede caivu ina yure ju aivure ne cójijinoi. Aru ne coyuiyede máre jápiaiyubedu, ðajacu úre yópe mi ðaiyepa ina judíoiva ãmevure aru ina jabovare tãuturã ícaipõevare. ¹⁸Jãve coyuyubu mujare: Caivu muje jacopubemarare ijãravui jacopubecuyume Jãmenijicu cavarõ mearo ñi curõi. Aru caivu muje jacopuimarare ijãravui jacopucuyume Jãmenijicu cavarõ mearo ñi curõi.

¹⁹Bediõva cojedeca coyuyubu mujare: Pucarã mujacavu cûináturu baru muje ñmei, muje jëniayede jipacu cavarõ mearocacure, úcapûravu ðacuyume yópe muje jëniayepa. ²⁰Pucarã o yóbecurã ne cójijidu, jëniarajivu ji ãmiái, ji paruéque, yávacari cuvã ne jëneboi, arí buedejame Jesús.

²¹Dinumure Pedro jëniari járejame Jesúre:

—Mu, ji jabocu, ¿aiyiye baju majecu ñi ãmeina ðaiyede yure ãrumeteji? ¿Siete baju ñi ãmeina ðaiyede ãrumeteji? arejame Pedro.

²²Aru Jesús arejame úre:

—Siete baju abevu yu. Quénora corevabecava ãrumetejacu ñi ãmeina ðaiyede cainumua, arejame Jesús.

“Memecaipõecu ãrumeteiyubecure apecu ñi ãmeina ðaiyede” jári dápíarí ne ðarãjiyepa aino

²³Yópe arí, buedejame Jesús, jári dápíarí ne ðarãjiyepa ayu, põeva ne ãrumetenajiyepa ayu apevure ne ãmeina ðaiyede:

—Jãmenijicui jaboteino yópebu cûinácu jabocu meaðaiyucu úre

memecaivu ne bojecube ðaiyede. ²⁴Ûi corevarí buiyede, apevu davaquemavu ñi yebai cûinácu úre memecaipõecure, bojecube ðayure obedimillones tãuturare. ²⁵Ûi bojecube ðaiyede ye bojedayu buojabetequemavu. Que baru ñai jabocu, yebacavure teni, bojedaicõjequemavu úre, aru jímarepacore, aru némarare máre. Caiye ne cãvaede máre bojedaicõjequemavu, ícuyu ñi bojecube ðaiyede. ²⁶Ñai memecaipõecu puedarí ñai jabocure, ñuatutaquemavu ñi jipocai. “Mu, ji jabocu, napíjacu yure. Aru caiyede bojedacuyumu mure”, aquemavu. ²⁷Que baru ñai jabocu, cómaja ãroje jári, ãrumetequemavu caiye iye ure bojecube ðaiyede. Aru jodeicõjequemavu úre.

²⁸Ûbenita ñai memecaipõecu etayu bácu, apecu memecaipõecu ñi yóvaimure copuquemavu. Ñai ñi copuimu majiëda bojecube ðaquemavu úre, obebecentenaes tãuturare. Ñai ñi copuimure ñi ñamemui jëni, yaiváiyurõduquemavu úre. “iMi bojecube ðaiyede jíjacu yure!” aquemavu. ²⁹Que ðayure, apecu ñuatutaquemavu ñi jipocai. “Napíjacu yure. Caiyede bojedacuyumu mure”, aquemavu. ³⁰Ûbenita apecu jápiaiyubetequemavu úre. Quénora jaruvaicõjequemavu úre ãmeina teivure jëni jacoñami jívu, pu ñi bojedaiyeta caiye iye bojecube ðaiyede. ³¹Apevu ñai jabocure memecaivu ñi ðaiyede jári, chíori, coyurãnuquemavu diede ne jabocure. ³²Ne coyuiyede ñi jápiaríburu yóboi, ñai jabocu órejaicõjequemavu ñai ñi ãrumeteimu mácure. Aru aquemavu: “iÁmecu bajutamu mu! Yúcapûravu ãrumetevu caiye iye mi bojecube ðaiye báque urarõ bajure, mi jëniayepa báque boje yure. ³³Que baru mure máre, cómaja ãroje jáiye javvu micure, yópe ji cómaja ãroje jáiyepe mure”, aquemavu. ³⁴Pare jarayu, ñai jabocu ãmeina teivure jëni jacoñami coreipõevare nuvaicõjequemavu úre, ñi ñájiyepa ayu, pu ñi bojedaiyeta caiye iye bojecube ðaiyede, arejame Jesús.

³⁵ Aru arejame Jesús:

—Quédeca ðacuyume mujare jipacu, cavarõ mearocacu, muxe ãrumetebedu mujecure ñi ãmeina ðaiyede, arejame ñujare, majicayũ Jesús.

Jesús ñi bueino nomi jaruvainore

(Mt 5.31-32; Mr 10.1-12; Lc 16.18; 1 Co 7.10-11)

19 ¹ Jesús caiye iyede coyũri bhojarĩ, nurejame Galilea ãmicurijoborõre jocarĩ. Aru ecorejame Judea ãmicurijoborõi, Jordã ãmicuriya jia apedũvei. ² Obedivũ põeva darejaima ñi yõboi. Aru noi ijimarare meãdarejame. ³ Fariseovacavũ mãre nurejaima ñi yebai. Ûre jujuvayuvũ, jẽniari jãrejaima: —¿Cũinãcu ãmũ jaruvayũ baru jímarepacore, apejĩe õi ðaiye boje, ðaidi yõpe maje ðaicõjeiyepe? arejaima na.

⁴ Jesús arejame náre:

—Jãve buedavũ mũa. Mamarumũre Jũmenijicu cuedarejaquemavũ caiyede, “Ûmũ macuyũre aru nomio macodõre mãre ðarejaquemavũ Jũmenijicu”. ⁵ Aru arejaquemavũ: “Que baru caride ãcu põescu, jímarepaco bacodõ cuvacyũ, ñi bucavare ðajocacyume. Aru jímarepacore cuvãri, õmaque cũinãvũpetamu na Jũmenijicu jãinore”. ⁶ Que baru pũcarã ãmema. Quénora cũinãvũpetamu na. Que baru põescu Jũmenijicu cõjjiovaimara mãcavũre coavabejacurĩ ñi, arĩ buedejame Jesús.

⁷ Jesũre jẽniari jãrejaima na:

—¿Aipe teni Moisés bácu jícõjenejaquemari jímarepacure cũinãyoca, “Mũre jaruvayubu yũ” aiyocare, jímarepacore? arejaima.

⁸ Aru Jesús arejame náre:

—Moisés bácu jaruvaicõjenejaquemavũ mujare mujemarepacore, muxe Jũmenijicu ðaicõjeiyede jãpiayube boje. Ûbenita mamarumũmata nõpe ãmenejaquemavũ. ⁹ Aru yãcarũravũ coyũyũbu mujare: Æcu põescu jímarepacore ãmeina ðãbcoreca jaruvãrĩburu yõboi pũrũbuoyũ baru apescoque, ãmeina ðãibi õre ñi mamarumũcacore jaruvãri, arejame Jesús.

Nõpe ayũ, “Nomi jaruvainore ubevũ yũ”, aiyũcu barejaquemavũ Jesús. ¹⁰ Que ayũre, ñũa ñi bueimara arejacarã ãre:

—Nõpe mi coyũiyepe baru, meamequiyebe pũrũbuoie majare, arejacarã.

¹¹ Ûbenita ñujare yõpe arĩ, coyũrejame Jesús:

—Cãivũ põeva cũinãcva curivũ majibema. Quénora na quénãra Jũmenijicu torojure ðaimara curivũ cũinãcva coapa majima na. ¹² Apevũ põeva nomicurĩ, ãmũcurĩ mãre, buojabema, ne nõpe põeteiye báque boje. Que baru pũrũbuobema na. Aru apevũ põeva ne baju burãicõjeiye boje, nomicurĩ buojabema na. Que baru pũrũbuobema na. Aru apevũ põeva ne baju burabevũvacari, burãivũ bácvũpe paivũ tedama na, ne memecarãjĩye boje Jũmenijicure cainũmũ ñi jaboteinore. Que baru na mãre pũrũbuobema, ne baju nõpe ðaiyue boje. Æcu põescu Jũmenijicure torojure ðaimũ cacũ cũinãcva, que ðajacurĩ ñi, arĩ buedejame Jesús.

Jesús ñi mearore jino juedovare Jũmenijicuque

(Mr 10.13-16; Lc 18.15-17)

¹³ Põeva davare cuivũ barejãima nẽmarare Jesús yebai, ñi tuoquiyepe aivũ náre ñi pũrũãque, ñi jẽniaiyede Jũmenijicuque náre boje. Que teni ñũa ñi bueimara davaicõjemenidurejacarã nẽmarare. ¹⁴ Ûbenita Jesús arejame: —Ina juedova ðajarãri ji yebai.

Jũmenijicu jabotecuyume põevare nápe paivũre. Que baru, “Davabejarã juedovare”, abejarã náre, arejame Jesús.

¹⁵ Aru náre coapa tuorĩ ñi pũrũãque, jẽniarejame Jũmenijicuque náre boje. Que teniburu yõboi, nurejacarã ñũa, Jesũjã.

Cũinãcu bojũyo cãve cãvacũ

Jesũmaque ne boroteino

(Mt 20.16, 25.31; Mr 10.17-31; Lc 13.30, 18.18-30, 22.30)

¹⁶ Cũinãcu bojũyo, Jesús yebai nũri, jẽniari jãrejame:

—Mũ, bueipõescu meacu, ¿aibe ðaiye me jaurĩ yũre, cãvacuyũ jãravũ cũimẽjãravũ baquinõre cavarõ mearo Jũmenijicu curõi? arejame ñi.

¹⁷ Jesús arejame ãre:

—¿Aipe teni jēniari jāñuḡu mu yure daiye ména? Cūinácunabe meacu baju. Jūmenijicunacaribe. Cuvaiyucu baru jāravu cūiméjāravu baquinóre, đajacu yópe Jūmenijicui đaicōjeiyepe, arejame Jesús.

¹⁸—¿Ádeba đaicōjeiye? jēniari járejame.

Aru Jesús arejame:

—Pōevare boarí jaruvabejacu.

Cuvabejacu apcore mimarepacore jaruvarí. Navamejacu apesu ũi cūvaede. Borodabejacu apesure. ¹⁹Ju ajacu mipacure aru mipacore máre. Aru mícure, mi bajure jecuépedeca, ũre máre jecujacu mu, arejame Jesús.

²⁰Que ayure, ñai bojuyo arejame:

—Đaivu caiye iye mi cuyiyede. ¿Ároma yure jaurō cāreja? arejame.

²¹Jesús ũre arejame:

—Jaubecuna cuiyucu baru Jūmenijicui jāinore, nujacu aru jini bojedajacu mi cūvede. Aru mi iquiyede jíjacu ina cōmaje ārojarivure. Que teni cūvacuyumu mu mi boje méne cavarō mearo Jūmenijicui cūrōi. Aru đajacu yáque, arejame Jesús.

²²Ūbenita iyede jāpiari, urarōreca chīorejame, đajocaiyubecu ũi ure cūvede. ²³Que baru Jesús arejame ñuja ũi bueimarare:

—Jāve cuyuyubu mujare: Ina pōeva cūve cūvarivure pare maiyójavu ne ju aipe Jūmenijicure, ũi meadaquiyeye aivu náre aru ne ecorājiyepe aivu ũi jaboteinore, cavarō mearo ũi cūrōre.

²⁴Bedióva cojedeca cuyuyubu mujare: Cūinácun aimacu uracu, camello āmicucu, ũi ecoru aviyo cobei, maiyójajebu ũre. Aru rueno maiyójavu cūve cūvacure ũi ecoquino Jūmenijicui jaboteinore, arejame Jesús.

²⁵Que ayure jāpiaivu ñuja, cūcumarejacarā pare. Aru arejacarā:

—¿Name bujarí ecorājidica Jūmenijicui jaboteinore, cūvarājivu jāravu cūiméjāravu baquinóre? jēniari járejacarā Jesúre.

²⁶Ūcapūravu ñujare jári, arejame:

—Pōeva ne đarí majibeno maiyójabevu Jūmenijicure. Ū cūinácuna bujarí meadayube pōevare, arejame Jesús.

²⁷Aru Pedro arejame:

—Đajocacarā ñuja caiye ñuje cūvaede, ñuje daiye boje máque. ¿Yéde earājidica ñuja? arejame Pedro.

²⁸Aru ñujare arejame Jesús:

—Jāve cuyuyubu mujare: Mamajāravu đaquijāravu baquinó yu, Jūmenijicui đaroimu mácu ũmure, dobacuyumu jabocui dobarō mearo, jabotecuyu pōevare. Aru muja máre, daivu bācavu yáque, dobarājaramu doce painoa jabovai dobarō mearo coapa, cuyurājivu ina doce paiyajuboacava Israecavure méne o āmene ne đaiyede.

²⁹Ácu pōescu đajocayu baru ũi cūramine, o jíbuřare, ĩmarare, jípacure, jípacore, mamarare, o ũi joborōre máre ji āmiá boje, ũi daiye boje yáque, memecacuyu yure, eacuyume rueno baju mearo bajure. Aru cūvacuyume jāravu cūiméjāravu baquinóre. ³⁰Ūbenita dīnumu maquinóre apenu, jaboteivu bācavu ijāravure, jabotebenajarama na Jūmenijicui jabotequiyede. Aru apenu, mujapedeca, jabotebevu bācavu ijāravure, jabotenajarama na Jūmenijicui jabotequiyede, arí buedejame Jesús.

“Memeipōevare” jári đapiarí ne đarājiyepe aino

(Mt 19.30; Mr 10.31; Lc 13.30)

20 ¹Jesús, yópe arí, buedejame:

—Jūmenijicui jaboteinomu yópe jio upacui memeipōevare vorí, earí bojedaiyepe náre ne memeiye. Javejīnara, seis baji, ñai jio upacu tībui vocunquemavu memeipōevare, ne jēnajiyepe ayu úyaiboare ũi jioi. ²Náre earí, “Cūináturava tāturataturava, cūinājāravu memeiye bojedaituravare jíquijivu mujare coapa”, aquemavu ũ. Aru ũi nópe aiyede, ju aquemavu na coapa. Ne ju aríburu yóboi, ñai jio upacu náre jaroquemavu jioi.

³Yóbecuriora vainíburu yóboi, nueve baji, bedióva tībui nquemavu ñai jio upacu. Noi jáquemavu apenu memeipōevare, ne memeino cūvabevure.

⁴Aru náre máre, “Memenanujara muja

ji jioi. Aru bojedacuyumtu mñjare me, yópe jaeépe”, aquemavu ñ. Que baru memenanququemavu na. ⁵No yóboi, jāravu corica baji, aru no yóboi tres baji máre, nopedeca ñaquemavu ñ. ⁶Bedióra cojedeca, cinco baji, cūináora ne memeióra jaeéde cāreja, nququemavu ñai jio upacu tāibui. Noi jáquemavu arevu memeiōdevare, ne memeiño cūvabevure. Náre jēniari jáquemavu, “¿Aipe teni curivurū mñja yui caijāravu memevūva?” aquemavu. ⁷Ūre aquemavu na, “Pōescu cubebi memeiōjeñu ññjare”, aquemavu. Náre máre “Memenanñjara ji jioi”, aquemavu.

⁸Aviá ñi doiyede, ñai jio upacu yópe arí, coyūquemavu ñi cūramine corecaipōescure: “Ina memeiōdevare órejarí bojedajacu náre. Ina memeni buivu bācavui yóbocavure bojedajacu mamarumū. Aru no yóboi ina mamarumū memeni buivu bācavure bojedajacu mñ”, aquemavu. ⁹Ina cūináora memeiñu bācavu ne ñaiyede, cūinátura va tāuturaturava, cūinájaravu memeiye bojedaituravare jacopuquemavu na coapa. ¹⁰Diede jári, ina javejñara memeni buivu bācavu dápiaríduquemavu ne baju jacopurājivure pñeno baju ne bojedaiyede. Ūbenita na máre quédeca, cūinátura va tāuturaturava, cūinájaravu memeiye bojedaituravare jacopuquemavu na coapa.

¹¹Ne jacopuiyede, jaraqquemavu ñai jio upacure. ¹²Ūre aquemavu, “Nácarūravu cūináora quénora memema. Aru ññjacapūravu memevñu caijāravu. Aviá ñi boiyede ñājivñu ññja. Ūbenita ñājimevñu bācavureca, náre bojedaiyvñu mñ cūinátura reca mi bojedaiyepere ññjare, ñājivñu bācavure”, aquemavu ina javejñara memeni buivu bācavu. ¹³Ūbenita ñai jio upacu aquemavu cūinácu nácacure, “Pacomá, mure āmeno ñabevñu yu. Mācarūravu ju avñu yure, ‘Cūinájaravu memeiye bojedaituravare jíquijivñu mure’, ji aiyede. ¹⁴Que baru ijacu iye mi bojede aru ññjacu mñ. Cūinátura iye ji jíyepere mure,

jíyuvñu yu ñai cūináora memecayure. ¹⁵Ūre jícojemeniduyurñi ji cūvavequede yópe ji urópe? Āmeina jámejacu yure, ji cadatequiyepere ayñu pōevare, ji mearo ñaiye boje”, aquemavu ñai jio upacu, arejame Jesús.

¹⁶Pōeva ne jári dápiabede yópe maje jabocu Jūmenijicui jári dápiayepere arí coyūrejame Jesús:

—Arevñu jabotebevñu bācavu ijāravure jabotenajarama na Jūmenijicui jabotequiyede. Aru arevñu jaboteivñu bācavu ijāravure jabotebenajarama na Jūmenijicui jabotequiyede, arí buedejame Jesús.

Jesús ñi coyūno bedióra cojedeca ñi yaiquínore

(Mr 10.32-34; Lc 18.31-34)

¹⁷Mái nuri, cuivñu barejacará Jerusalén āmicuríimaroí. Ññje ñuiyede, ññja ñi bueimare ñvarejame arevñu jocarí. Aru yópe arí, coyūrejame Jesús:

¹⁸—Jerusaléi ñuivubu. Nore curí, yure, Jūmenijicui daroimñu mácure ūmure, ji maucu jēni jíquijibi sacerdotevare jaboteipōevare aru Jūmenijicui yávaiye báquede bueipōevare máre. Ina pōeva arājivñu: “iBoarí jarñvicaōjeara ūre! iYaijācurí!” ¹⁹Que arí, jínajivñu yure ina judío va ānevñu. Que teni ina pōeva yurinajivñu yure. Jara popenajivñu yure. Aru yure pēvari jocusñjaravena, boarí jarñvarājivñu. Ūbenita yóbescuríjaravñu yóboi, jípacu, Jūmenijicui, nacovacuyñu yure yainore jarñvarí, arejame Jesús.

Santiago aru Juan népaco ñi jēniaino Jesúsre

(Mt 23.11, Mr 9.35, 10.35-45; Lc 22.25-27; Jn 13.12-15)

²⁰No yóboi Zebedeoi márai paco nurejacoða Jesús yebai mamaraque, Santiago aru Jūaque máre. Ūi jípacai ññatutarejacoða, ñi jēniayue boje apejñene ūre. ²¹Aru Jesús jēniari járejameða óre:

—¿Yéde ñacaji mure? arejameða. Ūre arejacoða:

—Dobaicōjejacu ina jímara pucarāre mi yebai, cūinácure meapūravui aru apēcure cācopūravui, mi jabotequinumū maquinóre, arejacoda ò.

²²Ūbenita Jesúcupūravū arejameða:

—Mi jēniaiyede coreóvabevu mu. Pōecu dobaiyucu baru yáque ji jabotequinumū maquinóre, mamarumū nájijye javvu úre yáque. ¿Ūcuri buojarājidica mūja ji ūcinore? arejameða náre Jesús.

Aru ju arejaimaða úre:

—Buojaivubu nūja, arejaimaða.

²³Aru Jesús arejameða náre:

—Ji ūcinore ūcurajivubu mūja. Ji que aiyede, yópe ayubu: Ji nájijyepedeca nájijnajivubu mūja. Ūbenita yávacari beobevu náre, dobarājivure ji meapūravui aru ji cācopūravui máre. Quénora dobarājarama nore ina jipacui beoimara mácvu, javeta ūi meaðaimara mácvu, arejameða Jesús.

²⁴No yóboi, jápiarejacarā ne borore apevu nūja caipucapuruarpe paivu Jesúi bueimara. Que baru jararejacarā inare.

²⁵Dinūmu Jesús órejarjame nūjare ūi yebai. Aru arejame nūjare:

—Mūja majivu ina jaboteivure judíova āmevure ne ðaiyede. Parúeque cōjeivubu ina ne jaborócavure, ne ðacarājijyepe aivu náre ne űrópe.

²⁶Ūbenita nápe ðabegarā mūja. Nāi mūjacacu parucu baiyucu baru, memecajacurī mūjare. ²⁷Aru nopedeca nāi mūjacacu jabocu baiyucu baru, yebacatejacurī caivure. ²⁸Nopedeca Jūmenijicui daroimu mácu ūmure, yu, dabedejacacu, pōeva ne memecarājijyepere ayu yure. Quénora darejacacu yu, memecacuyu apēvure aru boarī jaruvaicōjecuyu ji bajure, meaðacuyu obedivu pōevare, ji yaiquíyede náre boje, arejame nūjare Jesús.

Jesús ūi meadaino pucarā jári eabevure

(Mr 10.46-52; Lc 18.35-43)

²⁹Jerico ámicurīmarore etarejacarā nūja, Jesújā. Obedivu pōeva darejaima nūje yóboi. ³⁰Aru pucarā ūmva, jári

eabevu, ma écarui dobarejaima. Pōeva “Jesús Nazarecacube ū”, aivure jápiaivu, coðoboborejaima na, jári eabevu:

—Mu, David bácuī pāramecu, Jūmenijicui daroimu mácu, nūje jabocu bacuyú, cōmaje āroje jájacu nūjare, arejaima na.

³¹Ina obedivu pōeva náre arīdurejaima:

—Bi ajarā mūja, arīdurejaima.

Ūbenita pūeno baju coðoboborejaima cojedeca:

—Mu, nūje jabocu, David bácuī pāramecu, cōmaje āroje jájacu nūjare, arejaima na.

³²Que teni úre coðoboboivure jápiavu Jesús, dajocarejame. Aru apēvure cutuicōjenejame ina pucarā jári eabevure ūi yebai. Eaivure, Jesús jēniari járejame náre:

—¿Aipe ðacaji yu mūjare? arejame ū.

³³Ūre arejaima na:

—Mu, nūje jabocu, jári eabevubu nūja. Ūrarō jáiyurivubu nūja, arejaima.

³⁴Jesús cōmaje āroje jáñu, ne yacoruaire tuorejame ū. Aru cūiná járejaima na, jári eabevu bácvu. Que teni Jesúre yóvarī nūrejaima na máre.

Jesús Jerusaléi ūi ecoino

(Mr 11.1-11; Lc 19.28-40; Jn 12.12-19)

21 ¹Jerusalén ámicurīmaro joabejinoi curī, Betfajé ámicurīmajino baji, no cūracū Olivocū ámicuricū ēmeino baji, earejacarā nūja, Jesújā. Nore earī, pucarā nūja ūi bueimaracavure yópe arī, jarorejame Jesús:

²—No cōchinois curīmajinoi nūjara mūja. Cūiná earājaramu mūja pōevare ūmaiāimacure, burra ámicuco, mamacuque, nácacui buoimarare. Náre buoimeare jodeni, davajarā yure. ³Aru, “¿Aipe teni ina áimarare náre buoimeare jodeni, náre nūvaivurū mūja?” ne aruta, yópe ajarā: “Nūjare ícōjeni darobi maje jabocu. Ūre ūmacayu áimacu javui ū. Carijieneca mūjare jacopaiyovacuyume cojedeca”, ajarā, arejame Jesús.

⁴Caie iye nópe vaidéjavū cūináuru Jūmenijicui coyuicōjeiye báquepedeca

cūinácū ũi yávaiyede coyũcaipõescu bácure. Yópe arí, toivaicõjeneaquemavũ ũi mácure Jūmenijicu:

⁵ Coyũjacū ina Jerusalén
āmicũriĩmarocavũre. Jájara.
Mũje jabocū bacũyú mũjare
dacũyũme. “¿Meacū bārīca
yu?” abecube. Burrõre tubarĩ
dacũyũme. Burro bojũyovacarĩ
bacũyũme ũi tubamũ macũyú,
arĩ toivaicõjeneaquemavũ
Jūmenijicu.

⁶ Jesúĩ daroimara nũrejaĩma. Aru ðarejaĩmada yópe ũi aĩye báquepedeca náre. ⁷ Davacarejaĩma Jesúre ico burrare mamacũque. Aru ñũje doicajea pũenocacajearẽ burrare aru mamacũre máre tuorejagarã. Mamacũre tubarejame Jesús. ⁸ Dinũmũma ina obedivũ põeva, ñũjaque cũrivũ, ne pũenocacajearẽ jũarejaĩma mára. Aru apenvũ jocũcũ cavabũa yoca cũricavabũare burarĩ, jũarejaĩma mára, Jesúre meaðaiyũrivũ, ne pũedarĩ jacoyurãjĩyepẽ aivũ. ⁹ Ũre jipocateivũ aru ũi yóbojavũ máre coðoboborejaĩma na:

—David bácũĩ pãramecũ, maje jabocū bacũyũre torojũe bajadéni. Jūmenijicu mearo ðacaimũme ũi, Jūmenijicũĩ daroimũ mácũ. Carĩ jabocū bacũyũre ména borotenajarevũ, coðoboborĩ arejagarã ñũja caivũ.

¹⁰ Jesús ũi eaiyede Jerusalén āmicũriĩmaroĩ, caivũ nõcavũ etarĩ, jári, jēniari járejaĩma na, “¿Ñamema ñai?”

¹¹ Aru ina põeva ñũjare yóvaivũ arejaĩma náre;

—Ũtame ñai Jūmenijicũĩ yávaiyede coyũcaipõescu, Jesús Nazarecacũ, Galileacarõcacũ, arejaĩma ina põeva.

**Jesús ũi meaðaino Jūmenijicũĩ
cũramine**

(Mr 11.15-19; Lc 19.45-48; Jn 2.13-22)

¹² Jesús edarĩ Jūmenijicũĩ cũramĩ yebai, diñami tãibũ uratãibũĩ ecõrejame ũi. Aru nore diñami cũrivũ bojedaiipõevare jarũvarejame Jesús. Tãutũra oatũvaipõeva ne jáðovaire moarĩ najuárejame ũi. Aru jurevare

bojedaiipõeva ne dobarõare máre moarĩ najuárejame. ¹³ Náre yópe arejame Jesús:

—Yópe arĩ toivaicõjeneaquemavũ Jūmenijicu ũi yávaiyede: “Jĩ cũramĩ caivũ põeva ne yũre, Jūmenijicũre, coyũĩnamĩmu”, arĩ toivaicõjeneaquemavũ. Ũbenita diñamine tatorĩ ívũ ne dupiñamipe ðaquemavũ mũja, mũje pũeno urarõ tãutũra íye boje põevare jocarĩ, ne bojedaiyede mũje cũvaede, arejame náre Jesús.

¹⁴ Jári eabevũ darĩ, aru cuiye majibevũ máre daivũ barejáĩma ũi yebai no Jūmenijicũĩ cũramĩ. Náre coapa meaðarejame Jesús. ¹⁵ Apevũ fariseova aru Jūmenijicũĩ yávaiye báquede bueipõeva caiye iye põeva ne ðarĩ majibede Jesús ũi ðaiyede járejaĩma. Aru ina juedova noi cũrivũ, “David bácũĩ pãramecũ, maje jabocū bacũyũre torojũe bajadéni”, ne arĩ coðoboboyede jápiarejaĩma ina fariseovajã. Que baru jorojĩnejaima ũre. ¹⁶ Aru arĩdurejaĩma: —¿Jápiabecũrũ mũ ne aiyede? arĩdurejaĩma.

Ũbenita Jesús arejame náre:
—Jápiavũ yũ. ¿Ārũmetenaru mũja? Jūmenijicu ũi yávaiye báquede toivaicõjeneaquemavũ cūinácū ũi yávaiyede coyũcaipõescu bácure yópe arĩ yurã:

Mũ, ñũje jabocū, juedovare aru juedojĩnare máre mearore jícõjeivũ mũre, arĩ toivaicõjeneaquemavũ Jūmenijicu, arejame Jesús.

¹⁷ Que arĩburu yóboĩ, náre ðajocarĩ etarejagarã ñũja, Jesújã, diĩmarore jocarĩ. Cãranũrejagarã Betania āmicũriĩmajinoĩ.

**Jesús ũi āmecoroino higuercũ jēidũa
cũbecure**

(Mt 17.20; Mr 11.12-14, 20-26; 1 Co 13.2)

¹⁸ Cõmiáijãravũ javejĩnara copainũrejagarã Jerusalén āmicũriĩmaroita. Aru āvué ijidejavũya Jesúre. ¹⁹ Que baru ũi jáiyede cūinácū jocũcũ higuera āmicũricũre ma êcarũĩ,

jēidvare vocunuridurejame dicu yebai. Ûbenita yoca matuiyeda earejame. Aru arejame dicure:

—Cainumua jēmejadeni mi jēidua cojedeca, arejame ũ.

Aru cūiná dicu yaidéjavū. ²⁰Ñuja ũi bueimara diede jári, cuecumarejaca. Aru arejaca:

—¿Aipe teni cūiná yaidí dicu higuera? arejaca.

²¹Aru Jesús, yópe arí, coyurejame ñujare:

—Jāve coyuyubu mujare: Muja me ju aivu baru Jūmenijicure, aru “Jūmenijicu iye ðaiyede majibebi” arí dápiabevu baru, muja máre ðarí buojarājaramu yópe ji ðaiye báquepe dicu higuera. Aru pueno baju ðarí buojarājaramu muja. Icu cūracure “Ñujacū yore jocarí pu jia uradaita, cocunjacū” muje aru, nópe ðaquiyebu dicū. ²²Caiye iye muje Jūmenijicure jēniaiyede, “Jāve Jūmenijicu jícuyume yure” arí dápiaru, Jūmenijicu jícuyume mujare muje uede, arí buedejame ñujare Jesús.

Jesús ũi parué

(Mr 11.27-33; Lc 20.1-8)

²³Diede coyuyubu bácu, Jesús Jūmenijicui cūrami ecorejame cojedeca. Noi pōevare bueyure, sacerdotevare jaboteipōeva aru judfova bucava máre ũi yebai ñurejaima. Aru jēniari járejaima ũre:

—¿Ye paruéque ðayurū mu iye mi ðaiyede? ¿Ñame jídi mure iye paruéde mi nópe ðaiyede? arejaima na.

²⁴Jesús arejame náre:

—Yu máre jēniari jáquijivu mujare cūináro jēniari jáinore. Yure coyuru, yu máre coyquijivu mujare ji paruéque ji ðaiyede. ²⁵¿Juan Bautista bácu jáðovaquemari pōevare Jūmenijicu ũi paruéque o pōeva ne paruéque? Coyujarā yure, arejame náre Jesús.

Ûi que aiyede, ne bajumia boroteivu arejaimada yópe:

—Maje aru “Jūmenijicuque”, ũ aquijibi “¿Aipe teni ju abetecarā ũre?” ²⁶Ûbenita maje aru “pōevaque”,

jidué javu majare. Ina obedivu pōeva coreóvadama Juan Bautista bácu Jūmenijicui yávaiyede coyucaipōecu bácu. Que baru nácapūravu ámedajebu majare, arejaimada. ²⁷Que baru arejaima Jesús:

—Majibevu ñuja, arejaima.

Dinumure Jesús arejame náre:

—Yu máre coyubevu mujare ñamei paruéque ji ðaiyede, arejame Jesús.

“Paruá mamarare” jári dápiarí ne ðarājiyepa aino (Lc 3.12, 7.29-30)

²⁸Bedióva yópe arí, buedejame Jesús:

—¿Aipe dápiavurū muja iye ji coyquiyede mujare? Cūinácu ũmu paruá mamarare cuvacu yópe aquemavu cūinácu: “Mu, bucū, memescunjacu úyaimu jioi carí jaravu”, aquemavu jípacu. ²⁹Ûbenita ũcapūravu “Ñuiyubevu”, aquemavu jípacure. Ûbenita nópe aríburu yóboi, chíori dápiaquemavu ũi ju abe báquede jípacure. Aru jioi ñuquemavu ũ, mamacu. ³⁰Népacu ñai mamacure ũi coyuríburu yóboi, apesu mamacure quédeca aríduquemavu. Aru ñai mamacucapūravu “Báyu, memescunññmu yu”, ju aríduyvacari, ũbenita ye ñumetequemavu ũ, arejame Jesús.

³¹Náre jēniari járejame Jesús:

—¿Ácuba ina paruá mamaracacu jípacu ĩrópe ðayu bácu? arejame Jesús. Arejaima Jesús:

—Ûi mamarumu jēniaimu mácu ũi ĩrópe ðaquemavu, arejaima.

Aru Jesús arejame náre:

—Jāve coyuyubu mujare: Ina jabovare táutura ícaipōeva aru ina nomiva ámena ne bajure bojedavuvu ecorājarama Jūmenijicui jaboteinore muje jipocai.

³²Quédeca Juan Bautista bácu buescudame mujare aipe ðarí Jūmenijicu jáñre pōevare boropatebevure. Ûbenita mujacapūravu ũ mácu ju abetequemavu. Quéhora ina jabovare táutura ícaipōeva aru ina nomiva ámena ne bajure bojedavuvu ũ mácu ju aquemavu, arejame náre Jesús.

**“Āmena memecaiṗōevare” jári dápiarī
ne ḁarājiyepe aino
(Mr 12.1-12; Lc 20.9-19)**

³³ Jesús, yópe arī, buede nurejame náre:
—Apeno jári dápiarī muje ḁarājiyepe
aino ji coyṁquiyede jápiajarā muja.
Cūinácu cūrami upacu doaicōjequemavṁ
jiore úyaimuque. Doarī buojarī,
ḁaicōjequemavṁ biaidore jio turuvai.
Aru ūicōjequemavṁ cobede úyai
pipoicobede. Aru ḁaicōjequemavṁ
ūmujuriñami cūramine, jiore coreipōescu
ūi jáquiñamine máre. Caiye iyede
meadarī buojarī, vorī earī jiore
memeiṗōevare, epequemavṁ náre,
ne memecarājiyepe ayṁ úre. Ina
memecaiṗōeva ĩnajívu batequémavṁ
apeboa úyaiboare, ne memeie boje. Aru
nuquemavṁ ĩnai jio upacu apeno joborōi.
³⁴ Úyai jēijāravṁ yóboi, ĩnai jio upacu
jarorīduquemavṁ apenṁ ūi yebacavṁre
memecaiṗōeva yebai, ne ĩnajíyepe
ayṁ apeboa úyaiboare, ĩnai jio upacu
jiede. ³⁵ Ūbenita ina memecaiṗōeva
ina yebacavṁ eavṁre jēni, cūinácure
jara popequemavṁ, aru apescure
boarī jarṁvaquemavṁ, aru apescure
cūraboaque ḁavarī boarī jarṁvaquemavṁ
máre. ³⁶ ĩnai jio upacu jarorīduquemavṁ
apenṁ yebacavṁre. Ūbenita náre
quédeca ḁaquemavṁ ina memecaiṗōeva.

³⁷ No yóboi, ĩnai jio upacu
jarorīduquemavṁ mamacure
memecaiṗōeva yebai. “Jímacure
jáivu pueḁarājichuma na”, arī dápiarī,
que ḁarīduquemavṁ. ³⁸ Ūbenita ina
memecaiṗōeva jáivu ĩnai jio upacui
mácure, aquemavṁ ne bajumia, “ĩnai
ñuje jabocu bacṁyúme. Jírascu ūi
yainíburu yóboi, cṁvacṁyúme caiye ūi
cṁvaede. Járica, boarī jarṁvarājavṁ
úre, maja cṁvaburī caiye ūi cṁvaede”,
aquemavṁ na. ³⁹ Que arī, úre jēni
jaetovaquemavṁ jiore jocarī. Aru boarī
jarṁvaquemavṁ úre, arejame Jesús.

⁴⁰ Na ūi coyuiyede jápiaivṁre jēniari
járejame Jesús:
—Īnai jio upacu copaini ḁayṁ, aipe
ḁaquidi ina memecaiṗōevare? arejame ū.

⁴¹ Úre jápiaivṁ arejaima:

—Ina āmenare pare ĩájine ḁarī boarī
jarṁvaicōjecṁyúme ū. Aru epecṁyúme
apenṁ memecaiṗōevare noi, ūi jioi, úre
jínajivṁre ūi jēidṁare jēijāravṁ eaiyeta,
arejaima na.

⁴² Jesús arejame náre:

—Īrṁmetenarṁ muja iye Jūmenijicui
yávaiye ūi toivaicōjeiye báquede? Yópe
toivarejaquemavṁ yurā, Cristo ji borore:

Iva cūravare cūramine ḁaiṗōeva
ubeni jarṁvaquemavṁ. Caride
iva cūrava caiva apenṁ pṁeno
parurivabu. Nópe ḁaino mácarōre
ḁaquemavṁ Jūmenijicu. Que baru
pare mearotamu majare, maje
dápiaru, arī toivarejaquemavṁ.

⁴³ Que baru coyuyubu mujare: Muja judíova
muje ḁabe boje mearore yópe Jūmenijicui
urópe ūi jaboteimarare ḁaiye jauépe, apenṁ
ṗōeva, judíova ānevṁ, mearore ḁaivṁ
yópe Jūmenijicui urópe, ūi jaboteimara
marajárama na muje pṁeno. ⁴⁴ Ácu ṗōescu
tuyṁ baru divarā, turī yavacṁyúme ūi
bajure. Aru diva tuiva baru ṗōescu pṁenora
chitoquiyebu úre, arejame náre Jesús.

Yópe aiyurótamu no: Pōeva “Āmecube ū”,
arīdurājarama Jesúi borore. Ūbenita meacu
bajube ū, Jesús, caivṁ apenṁ pṁeno.

⁴⁵ Ina sacerdotevare jaboteiṗōeva
aru ina fariseova jápiaivṁ bácvṁ
Jesús ūi jári dápiarī ne ḁarājiyepe
aiyede, coreóvarejaimaḁa coyṁyure
nára, “Muja judíova muje ḁabe boje
mearore yópe Jūmenijicui urópe, judíova
ānevṁ ūi jaboteimara marajárama muje
pṁeno” ūi aiee báque boje. Que baru
jēni nṁvaiyurīdurejaima. ⁴⁶ Ūbenita ne
jēiyurīduiyede úre, obedivṁ ṗōeva “Jesúbe
Jūmenijicui yávaiyede coyṁaiṗōescu” arī
dápiaivṁre jidurejaimaḁa.

**“Purubuoivṁ ne torojuve teinore” jári
dápiarī ne ḁarājiyepe aino**

(Mt 8.12, 25.30; Lc 13.28, 14.15-24)

22 ¹ Bedíova cojedeca Jesús, yópe
arī, buedejame náre apeno jári
dápiarī ne ḁarājiyepe ainoque:

² —Jūmenijicui jaboteinomu
yópe cūinácu jabocui mácu

puruɓuoyure torojuve tede ɗainope. ³Nai torojuve teino upacu jarorí, “Nujara” aicōjeniduquemavu ɓi yebacavure ɓi cutuimarare. Ƴbenita ina cutuimaracapūravu nuɓyubetequemavu. ⁴Bediówa cojedeca jarorí, aicōjeniduquemavu apevu ɓi yebacavure yópe: “Coyujarā ina ji cutuimarare yópe: ‘Ji torojuve teinore meadaivu yu. Boaicōjeivu oteivescva ɓrarāre aru ina mamara jiacurivure máre. Caiyede meadaivu yu. Que baru āranujara cari, ajarā ji cutuimarare”, aquemavu ɓai jabocu. ⁵Ƴbenita ina cutuimara ɓai jabocure āmeina jári, yurini, nūmetequemavu ɓi torojuve teinore. Cūinācu memescnuquemavu ɓi jioi. Apecu memescnuquemavu ɓi bojedaitucubni. ⁶Aru apevu ina yebacavure jēni, cūyojarō ɗarí, boarí jarɓvaquemavu náre. ⁷Diede jápiarí, ɓai jabocu jaraqumavu. Churaravare jaroquemavu, ne boarí jarɓvarājiyepere ayu ina boarí jarɓvaivu bācavure ɓi yebacavure aru ne juarājiyepere ayu ne imarore.

⁸Dinūmure ɓai jabocu aquemavu apevu ɓi yebacavure, “Jímacu ɓi puruɓuoiye torojuve teino meadarí buojainomu. Ƴbenita ina ji cutuimara māvavu āmena bajure daiye jaubetedebu. ⁹Que baru ma ɓramai nujara mɓja. Nore caivu mɓje eaimarare cutujarā, ne darājiyepere aivu ji torojuve teinoi”, aquemavu ɓai jabocu. ¹⁰Ƴi que aríburu yóboi, ina yebacavu mái nuri cójjiovaquemavu caivu ne eaimarare, mearare aru āmenare máre, ne torojuve teitucubu buiquíyepere aivu. ¹¹Ƴbenita ɓai jabocu jácunuri ina ɓi cutuimarare no torojuve teitucubni, jáquemavu cūinācu pōcure puruɓuoino doiyede dobecva. ¹²Que baru ɓre jēniari jáquemavu, “Pacomá, ɓaípe teni eoyu buojacurū yore puruɓuoino doiyede dobecva?” aquemavu. Ƴbenita ɓai cutuimācapūravu bi aquemavu. ¹³Dinūmure ɓai jabocu ɓre caɗateipōevare yópe aquemavu, “Ƴi purɓáre, ɓi cūbobare máre buorí,

jarɓvajarā ɓre joai, ɓeminoi, ɓi ju abe boje yure, ɓi coatequiyepe aivu yure jarɓvarí. Chíoivu orí curājarama pōevare. Aru jararí cōpi curājarama na, aquemavu ɓai jabocu”, arejame Jesús.

¹⁴Jesús, yópe arí, buede nurejame:

—Obedivu pōevatamu ina Jūmenijicu ɓi cuturíduimara. Ƴbenita obebejīnatamu ina ɓi beoimara, ɓi jaboteimara mārājivu, arejame Jesús.

Jesús ɓi coyūino jabovare bojedainore

(Mr 12.13-17; Lc 20.20-26)

¹⁵No yóboi apevu fariseova ne bajumia borotedejaimada aipe ɗarí ne jujovarí jacotujuroede Jesúre ɓi coyuiyequede. ¹⁶Apevu ne bueimarare apevu Herodecavūque jarorejaimada na. Ƴi yebai edarí, ɓre yópe arejaima, mamadaiyurivu:

—Mu, bueipōescu, mure coreóvaivubu ɓija. Nurié yávaivu mu. Jáveneca bueivu mu pōevare, ne ɗarājiyepere ayu mearore yópe Jūmenijicu ɗaicōjeiyepere. Caivure cūinācamuara yávaivu mu. Coyubevu mu pōevare yópe ne ɗaiyepere. Quéhora jidubescva coyūivu mu náre yópe ne dápiayepere. ¹⁷Que baru coyujacu yéde mi dápiayede iye ɓuje jēniayede mure caride. ɓMaje jabocu César ɓi ícōjejuroede, ɓi jaboteiyepere boje, maje bojedaru, mearica die? ɓO bojedabejeba maja? arejaima na, ɓre jujovaiyuríduivu.

¹⁸Ƴbenita ne ɓre āmeina ɗájuroede majini, yópe arejame Jesús:

—Mɓja, jujovaivu, ɓaípe teni yure jujovaiyurídurāru mɓja? ¹⁹Jáɗovajara yure tauturatavare, arejame Jesús.

Que ayure, nācacu cūináturava tauturatavare davarejame ɓre. ²⁰Ƴre ɓi davarí jíyede, arejame Jesús:

—ɓNamema ɓai, dituravare jēnu? ɓAru ɓamei āmiá curituravaba diturava? arejame náre Jesús.

²¹—Nai jabocu Céσαι decocu aru ɓi āmiá máre curituravatamu, arejaima Jesúre.

Que aivure arejame Jesús:

—César jiede úre jacopaiyovajarã muja. Jíjarã úre táutura yópe ùi bojedacõjeiyepe mujare. Aru Jümenijicu jiede úre jacopaiyovajarã muja. Ðajarã yópe ùi urõpe, arejame náre, jëniari járadavure, Jesús.

²² Ùi que aiyede jápiarí, pare dápiarí cuecumarejaimada ina úre jujovaiyurídivu bácvu. Que baru úre dajocarí etarí nurejaima na.

Saduceova ne jëniari jáino Jesúre yainore jaruvarí nacajainore
(Mr 12.18-27; Lc 20.27-40; Hch 23.8)

²³ Dijárvumareca apenvu saduceova darejaima Jesús yebai. Saduceo âmícuriyajubobu judíovacavu ne yajubo cüináyajubo. Caivu saduceova “Yainore jaruvarí nacajaiye cubevu”, adama na. Jesúre jëniari járejaima ina saduceova yópe arí:

²⁴ —Mu, bueirõecu, Jümenijicui cõjeiyede Moisés bácu coyurejaquemavu: “Cüinácu némamicu yaidú, jueðocuvabescuva, yaiyú bácuí yócupe purubuoíye javvu nomiópecoque, jueðocuvacuvu. Aru ina jueðova bárãjivu yaiyú bácuí âmíare cvarãjarama na”, coyucõjenejaquemavu Moisés bácupe Jümenijicu. ²⁵ Javede cátequemavu siete paivu ùmva ñjacavu. Cüinácu ùmí mára matequémavu na. Aru némamicu purubuoquemavu. No yóboi yaiquémavu ù mácu, jueðocuvabescuva. ²⁶ Que baru apescu, némamicu bácuã cutuy, purubuoquemavu jíbcu bácuí márepacoque. Aru jíbcu bácupepedeca, yaiquémavu ù mácu máre, jueðocuvabescuva. Aru apescu, ù mácuã cutuy máre, popedeca, aru caivu ina siete paivu bácvu óque purubuoí, yaiquémavu na mácvu caivu jueðocuvabevuva. ²⁷ Caivu ne yóboi, ico nomío máco máre yaiquémavu. ²⁸ ¿Aru yainore jaruvarí nacajaijãrvu baquinóre, ñamei márepaco bacoðóba ico? Ijãrvu caivu ina siete paivu cuvatequemavu óre, arejaima na Jesúre.

²⁹ Ùbenita Jesús arejame ina saduceovare:

—Mamateivubu muja, muje majibe boje Jümenijicui yávaiyede. Aru Jümenijicui paruéde máre majibevubu muja. ³⁰ Yainore jaruvarí nacajaijãrvu baquinóre purubuoobenajarama. Aru jíbenajarama némaromivare, ne purubuoãjiyepe aivu. Quénora ángeleva, ina purubuobevü, cavarõ mearo Jümenijicui curõcavupe paivu, barãjarama ina yainore jaruvarí nacajarajivu. ³¹ ¿Iye yainore jaruvarí nacajaiyede, jápiarí eabenaru muja iye Jümenijicui coyuiye báquede Moisés bácupe? ³² “Yátamu Jümenijicu. Abraham, Isaac, aru Jacob ne mearore jímmu yu”, arejaquemavu Jümenijicu. Que arí, yaivu bácvu ne mearore jímu âmemi Jümenijicu. Quénora apurivu ne mearore jímutame ù, arí coyurejame náre Jesús.

³³ Ina obedivu põeva Jesús ùi nópe coyuiyede jápiaivu, pare dápiarí cuecumarejaimada, ùi nópe aye boje.

Ðaicõjeiye parué caiye püeno
(Mr 12.28-34; Lc 10.25-28)

³⁴ Apenvu fariseova ne jápiaiyede Jesús vainí tuyú bácupe ina saduceovare, bi are ðayú bácupe náre, cõjijidejaima ùi yebai. ³⁵ Aru cüinácu nácasu, Jümenijicui ðaicõjeiyede majicu, Jesúre jujovarí jacotuiyuríduyu jëniari járejame yópe:

³⁶ —Mu, bueirõecu, ¿ároma majare Jümenijicui ðaicõjeino püeno parurõ cõjeino? arejame ù.

³⁷ Jesús arejame úre:

—“Ûjacu mi jabocu Jümenijicure caino mi ùmeduque, caino mi ùmeque, aru caino mi majiéque”. ³⁸ Nótamu Jümenijicui ðaicõjeino püeno parurõ, püeno mearo máre. ³⁹ Aru no yóbo cãchijino parurõ ðaicõjeinotamu mamaro cõjeinope paino. “Mi bajure mi jecuépedeca jecuãcu mícupe máre”. ⁴⁰ Caiye Jümenijicui ðaicõjeiye ùi coyuiye báquede Moisés bácupe, aru caiye ina Jümenijicui yávaiyede coyucaipõeva mácvu ne bueiye báquede máre coyuiyetamu cünáturura

iye pique ðaicōjeiyeque. Pōevare ñe jaunv majepacu Jūmenijicure aru jesué jaunv arevñ pōevare máre, arí buedejame Jesús.

Cristo ñai jabocu David bácu pāramecu

(Mr 12.35-37; Lc 20.41-44)

⁴¹Ina fariseovacavñ cójijivureca cāreja Jesús yebai, náre yópe arí, jēniari járejame Jesús:

⁴²—¿Aipe dápiavñrū muja ñai Cristore? ¿Namei mácuña ñai? arejame. Ũre arejaima:

—David bácu pāramecu ñe, arejaima.

⁴³Náre arejame Jesús:
—Que baru, ¿aibe teni David bácvacari Espíritu Santoi paruéque coyicōjeimñ marejaquémari “mñ, ji jabocu” Cristorā? David bácu, yópe arí, coyurejaquemavñ Cristorā:

⁴⁴Jūmenijicu aquemavñ ji jabocure, “Dobajacu ji meapūravñi, mi cuvae boje paruéde yupeca. Aru yñ epecuyumu mi mauvare mi cuboba cāchinoi. Que teni mñre vaini jaruvare ðacuyumu yñ náre, mi jabotequiyepe ayñ náre”, arí toivarejaquemavñ David bácu Cristorā.

⁴⁵David bácvacari Cristoi borore arejaquemavñ, “Ũrecabe ji jabocu”. Que baru, ¿aibe teni David bácu pāramecuña ũ? arejame Jesús.

⁴⁶Ñame buojari cūiná coyubeteima ũre. Dijāravumata ñame yéde jēniari jámenejaima Jesúsre bediōva cojedeca.

Jesús ũi boro coyurí adaino fariseovare aru Jūmenijicui yávaiye báquede bueipōevare

(Mt 3.7, 5.34, 6.1, 12.34, 20.26-27; Mr 9.35, 10.43-44, 12.38-40; Lc 3.7, 11.37-54, 14.7-14, 18.14, 20.45-47, 22.26; Hch 23.3)

23 ¹No yóboi Jesús, yópe arí, coyurejame ina obedivñ pōevare aru ññja ũi bueimarare máre:

²—Jūmenijicui yávaiye báquede bueipōeva aru fariseova buedama

mujare Jūmenijicui ðaicōjeiye ñi coyuiye báquede Moisés bácu. Jūmenijicui yávaiye jāvene buedama na. Que baru ðajarā muja yópe ne bueiyepedeca. ³Ũbenita návacari ðabenama yópe ne bueiyepere. Que baru ðabejarā muja yópe ne ðaiyepe. ⁴Ne baju dápiaiyepe ðaicōjedama pōevare. Ũbenita yópe Jūmenijicui yávaiye báquepe dápiabenama na. Maiyójajebu iye ðaicōjeiye ne baju dápiaiye báque. Návacari caiye iyede ye ðabenama na. Aru ne ðaicōjeimarare ye ðadatebenama, ne ðarājiyepe aivñ die maiyójae ðaiyede. ⁵Caiye ne ðaiyede ðadama arevñre jáicōjenajivñ, “¿Meara márica na?” ne arí dápiarājiyepe aivñ. Que baru Jūmenijicui yávaiyequede ne toivaino mácarō yocarā, ne adaino mácarō quíjitōcua jívñi buodama na. Ditōcuare ne buoiyede ne títuva coapa aru ne āmuve cācopūravñcaāmuve coapa, ñramea buoimeaque buodama na, jáicōjenajivñ arevñre. Aru ne cuitótecajea coapa nareicōjedama turvacajea ñracajeare, jáicōjenajivñ arevñre. Que teni arevñre dápiare ðaiyuríduyama mearore jívaivñre Jūmenijicure aru jñ ávaivñre máre. Ũbenita nópe dápiajebu pōeva náre ũbenina. ⁶Torojuve teinore cuiyuma na ñai torojuve teino upacu yebai, arevñ ne pueðarājiyepe aivñ náre. Judíovai cójijijñamiare ũma na ne dobae mearoa baji, arevñ ne járajiepe aivñ náre paruvñre. ⁷Aru ũma na pōeva pueðari ne jacyuinore tãibñi aru “mñ, bueipōecu” ne ainore máre náre.

⁸Ũbenita mujacarpūravñ “mñ, bueipōecu” aicōjemejara arevñre muja coapa, muje dápiaiye boje meara arevñ pñeno. Yñ cūinácuratamu muje bueipōecu. Aru cūinátrñbu muja, caivñ cūinávñre paivñ. ⁹Aru ijāravñcasu cubebi “mñ, ññjepacu, ññje jabocu” muje aimñ. Nópe abejarā pōecure. Majepacu cūinácuratame cavarō mearocasñ. ¹⁰Aru “mñ, jabocu” aicōjemejara arevñre muja coapa. Yñ, Cristo, cūinácuratamu muje jabocu. ¹¹Que baru ñai mujacacu

parucú baiyucú baru, memecajacurí mujare. ¹²Nai cuiyucú me apevu pueno, parubescuyume pueno baju. Aru ñai parubede ñaiyucú ñi baju apevu cāchino, me cuscuyume pueno baju, Jūmenijicui mearo ñacaquiye boje úre, arí buedejame ñujare Jesús.

¹³Aru yópe arí, coyure ñurejame ñ: —Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Mujá ñadavú yópe pōescu ñi beiiyepe cūramine, apevu ne ecobenajiyeye ayú, aru ñ máre ecobescuyú. Mujá coreóvadavú Jūmenijicui yávaiyede. Ubenita diede ju are ñabevú apevure, ne ecobenajiyeye aivú Jūmenijicui jaboteinore, aru mujá máre ju abevú. Que baru ecobenajaramu nore.

¹⁴Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Jujovarí ñavadavú ina nomiópeva ne arejienne. Aru jēniadavú joe Jūmenijicucue, pōeva ne dápiarājiyeye aivú ubenina mujá me Jūmenijicure ju aivúpe. Caiye iyede mujé ñaiye boje, pueno uraró ñájinajaramu mujá, mujé ñameina teiye boje.

¹⁵Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Joai curānuñavú mujá jia uradai aru joboró máre. Cūinácú pōecure vorānuñavú, oatvvarājivú ñi dápiayede, ñi dápiacuiyeye aivú mujé dápiayeye. Aru ñi ñaiyede máre oatvavadavú mujá, ñi ñacuiyeye aivú pueno āmenore, ñi ñájiquiyeye aivú toabo cūiméboi mujé pueno.

¹⁶Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. “Jūmenijicui yávaiye báquede buení buojaiuvú ñujá”, ñadvú mujá pōevare ubenina. Yópe jári eabevú ne

jipocateiyeye pōevare, mujá Jūmenijicui yávaiye báquede buení buojabenamu. Yópe ubenina buedavú mujá: “Pōescu ayú baru ‘Ji aiyeye ñacuyumu yú, Jūmenijicui cūrami cue boje’, ñaiye jaubevú úre. Ubenita ayú baru ‘Ji aiyeye ñacuyumu yú, úru cue boje Jūmenijicui cūrami jívui’, ñaiye jauvú úre”, ñadvú mujá. ¹⁷Mujatamu jári eabevúpe paivú mujé ũmei. Mujatamu ārumevú. Coreóvabevú mujá Jūmenijicui cūramine pueno paruróre caiye iye úru pueno. Iye úrubu pueno me, die cue boje Jūmenijicui cūrami jívui. ¹⁸Aru yópe ubenina buedavú mujá: “Pōescu ayú baru ‘Ji aiyeye ñacuyumu yú, Jūmenijicure jícayede jícavá cue boje ñi cūrami jívui’, ñaiye jaubevú úre. Ubenita ayú baru ‘Ji aiyeye ñacuyumu yú, Jūmenijicure jícayé boje jícavá puenora ñi cūrami jívui’, ñaiye jauvú úre”, ñadvú mujá. ¹⁹Mujatamu jári eabevúpe paivú mujé ũmei. Coreóvabevú mujá Jūmenijicure jícavare pueno paruróre caiye iye jícayé pueno. Iye jícayebu pueno me, die cue boje Jūmenijicure jícavá puenora. ²⁰Que baru pōescu ayú baru “Ji aiyeye ñacuyumu yú, Jūmenijicure jícavá cue boje ñi cūrami jívui”, jāve aiyuró “Jūmenijicure jícavá aru caiye Jūmenijicure jícayé diva puenora”, aiyubi ũ. ²¹Aru pōescu ayú baru “Ji aiyeye ñacuyumu yú, Jūmenijicui cūrami cue boje”, jāve aiyuró “Jūmenijicui cūrami aru ñai cuscú noi”, aiyubi ũ. ²²Aru pōescu ayú baru “Ji aiyeye ñacuyumu yú, cavaró mearo cue boje”, jāve aiyuró “Jūmenijicui dobaró mearo aru ñai dobacu nore”, aiyubi ũ, arejame Jesús.

Uí que aiyede, Jesús yópe aiyucú barejaquémanu: Cainumua ñaiye jauvú pōevare yópe ne aiyé báquepedeca.

²³Aru yópe arí, coyure ñurejame Jesús:

—Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Caiye mujé oteiyoca, quíjiyoca

bojecubeyoca, caipucapucare
paiyocare cvarivũ, cuiináyocare
jýavũ Jũmenijicure. Æbenita mearo
ðavũre aprevũre, cõmaje ãroje jáivũre
aprevũre, aru ju aivũre Jũmenijicure
mãre ãrumevũ muja. Cairucapucare
paiye muje cvaede jocarĩ, cuiinãrore
Jũmenijicure jýe jauvũ mujare. Æbenita
pũeno baju jauvũ mujare muje mearo
ðaiye aprevũre, muje cõmaje ãroje jáiye
aprevũre, aru muje ju aiye Jũmenijicure
mãre. ²⁴Muja ðadavũ yõpe jári eabevũ
ne jipocateiyere põevare. Iye parubede
ðãpiadavũ muja. Que teni ðadavũ yõpe
põescu ñi íyere jujicure ñi ùcuidore
jocarĩ, ÷benita ñi járũóiyere camello
ãmicucu ãimacuc uracure.

²⁵Muja, Jũmenijicui yávaiye
bãquede bueipõeva, aru muja,
fariseova, jujovaivũ, chõrajaramu
muja. Jũmenijicu ñãjine ðacuyume
mujare. Muja joadavũ muje ùcuidoare
aru jorõrũre mãre pũenomã, põeva
ne jáinore. Æbenita mujavacari
tatoiyurivũbu aprevũ ne cvaede. Que
teni ãmeno baju ðadavũ muja. Que baru
mearo ðaiye aprevũre mearotamu joare
ðaicõjeiye pũeno. ²⁶Muja, fariseova,
ðadavũ yõpe jári eabevũre paivũ
ne ùmei. Muje joaru mamaramure
ùcuido jívũi aru jorõru jívũi mãre,
ùcuido pũeno aru jorõru pũeno mãre
docucubequiyebu. Quédeca ðãpiaivũ
baru me, ðarãjaramu me mãre.

²⁷Muja, Jũmenijicui yávaiye bãquede
bueipõeva, aru muja, fariseova, jujovaivũ,
chõrajaramu muja. Jũmenijicu ñãjine
ðacuyume mujare. Mujatamu yõpe
yavũ bãcavũ ne epeĩnamia borĩnamiape
paivũ. Diñamiare põeva ne járu jedevai,
meadamiare ãrojariñamiamu. Æbenita
diñamia jívũi, buidĩnamiamu yavũ
bãcavũ ne cũaõoque, aru docucueque
mãre. ²⁸Quédeca põeva ne járu
mujare, mearape aru mearore ðavũre
ãrojarivũbu muja ne jáiyede. Æbenita
muje ùmei ðãpiadavũ jujovavũre paivũ
aru ãmenore ðavũre paivũ mãre.

²⁹Muja, Jũmenijicui yávaiye bãquede
bueipõeva, aru muja, fariseova, jujovaivũ,

chõrajaramu muja. Jũmenijicu ñãjine
ðacuyume mujare. Muja ðadavũ
meadamia cũramiare ina Jũmenijicui
yávaiyede coyũcaipõeva mãcavũ ne
jobocobea bãque pũeno. Aru muja
meadadavũ ãruriñamia cũramiare ina
meara mãcavũre. ³⁰Yõpe borõcurĩ adavũ
muja: “Majeñecuva mãcavũ ne cõrĩnũmũ
cõrivũ baru maja, ne boarĩ jaruvaiye
bãquede ina Jũmenijicui yávaiyede
coyũcaipõeva mãcavũ cadatebejebu
maja”, adavũ muja. ³¹Æbenita mujavacari
jãdovadavũ ina Jũmenijicui yávaiyede
coyũcaipõeva mãcavũre boarĩ jaruvavũ
bãcavũre paivũre. ³²Maumejiena iye
ãmeina ðaiyede mujeñecuva mãcavũ ne
bũiye bãquede bubajarã muja, muje boarĩ
jaruvãrãjijiyede yure, Jũmenijicui darõimũ
mãcure.

³³iMuja, jujovaivũ, ðevavũre paivũbu
muja! Muje toabo cũimẽboi ñãjinajiyede
jocarĩ, dupini nuivũ buõjabenamũ muja.
³⁴Que baru yũ darõquijivũ muje yebai
Jũmenijicui yávaiyede coyũcaipõevare
aru ùmũva majidivũre, aru Jũmenijicui
yávaiye bãquede bueipõevare mãre.
Aprevũ nãcavũre boarĩ jaruvãrãjaramu
muja. Aprevũre jocucjaravena pẽvari,
boarĩ jaruvãrãjaramu. Aprevũre jara
popenajaramu maja judõova maje
cõjjijĩnamiai. Aru aprevũre cujurãjaramu
muja ìmaroa coapa. ³⁵Que baru
Jũmenijicu ñãjine ðacuyume mujare,
cavũ meara mãcavũ ne yaiye bãque boje
ijãravũre, apescu ñi boarĩ jaruvaiye bãque
boje ñai Abel bãcure, aru aprevũ ne boarĩ
jaruvaiye bãque boje cavũ Abel bãcui
yõbocavũ bãcavũre mãre, pũ Zacarías
bãcu bajita, Berequías bãcui mãcu bãcure,
ñai mujacavũ bãcavũ ne boarĩ jaruvaimũ
mãcure Jũmenijicui cũrami tãibũ
coricai. ³⁶Jãve coyuyubũ mujare: Muja
ijãravũcavũ ñãjinajaramu, muje ãmeina
ðaiye boje, arĩ buedejame Jesús.

Jesús ñi oino, Jerusalécavũre jescucũ

(Lc 13.34-35)

³⁷Yõpe arejame Jesús:

— iMuja, Jerusalécavũ, mujeñecuva
mãcavũ boarĩ jaruvãrejaquemavũ ina

Jūmenijicui yávaiyede coyucaipōeva mácavure! Cūraboaque dvarí boarí jaruvarejaquemavu ina Jūmenijicui daroimara mácavure ne yebai. Obedinũma cójijovaiyuríduvu yu mujare ji yebai, yópe cáyuco òi cójijovaiyepe mamarare òi caveba cāchinoi. Ūbenita ũbeteavũ mija. ³⁸Jájara. Dinũmu maquinó mije curõre Jūmenijicui dajocarí jaruvacuyme. ³⁹Aru coyuubu mujare: Yure jámenajaramu mija cojedeca pu jádovacu dayure meacu bajure jáivuta. Dinũmu maquinóre arājaramu yópe: “Torojue bjadéni ñai dayure Jūmenijicui amíai, ũi paruéque”, arejame Jesús.

Jesús ũi coyũino “Jūmenijicui cūrami tũquiyebu” arí
(Mr 13.1-2; Lc 21.5-6)

24 ¹Jesús etayu bácu Jūmenijicui cūramine jocarí, ñija ũi bueimara ũi yebai nurí, jádovarejacarā diñamia cūramiare, Jūmenijicui cūramicadāmiare. ²Aru ñijare arejame: —Caiñamia diñamia uradāmia cūramiare jáivubu mija. Jáve coyuubu mujare: Cūináva cūrava mautebequiye bu apeva puenora. Caiye iva cūrava tũquiye bu, arejame Jesús.

Jádovaiye jāravu cūiquíye jipocai
(Mt 10.22; Mr 13.3-23; Lc 17.22-24, 31, 37, 21.7-24; Ap 7.14)

³Jesús dobarejame cūracū Olivocū amicuricū puenoi. Ūi dobaede noi, ñija, ũi bueimara, jēniari járejacarā ũre yavenina, pōevare jocarí:

—Coyujacu ñijare: ¿Aipiye de tũquidi caiye iye cūramia uradāmia? ¿Aipe darí coreóvarājidica ñija mi copaidaquiyede? ¿Aipe darí majinajidica ñija ijāravu cūiquíyede? jēniari járejacarā ũre.

⁴Ñijare yópe arí, coyurejame Jesús: —Me jájara apecu jujovaiyucure mujare. ⁵Obedivu ũmũva darí arājarama “Cristobu yu”, jujovarājivu obedivu pōevare. ⁶Aru “Pōeva boadāma apevu pōeva que” ne borore jápiarí, aru “Pōeva boarājarama apevu pōeva que” ne

borore máre jápiarí, jidubejarā mija. Que baru caiye iye vaiye javvu, jāravu cūiquíye jipocai. Ūbenita cūimébu cāreja. ⁷Cūináyajubo pōeyajubocavu ādamatenajarama apeyajubo pōeyajubocavunque. Aru cūináro jaboteinocavu ādamatenajarama apeno jaboteinocavunque. Joboró cūjiquiyebu obedicurõare. Ñajinajarama āvũena. ⁸Iye ñájiye baquiye bu yópe jue docu pōteyure ñájiyepe. Yópe báquiye bu caiye iye āmeina ñajinajiye.

⁹Mujare jēni jīnajarāma, mije ñajinajiyepe aivu. Aru mujare boarí jaruvārājarama na. Mujare cainoa jaborōacavu jorojīni járajarama, yure mije ju aye boje. ¹⁰Dinũmu maquinóre obedivu yure ju aivu bácvu dajocarājarama ne yure ju aye báquede. Obedivu jēni jīnajarāma névure ne mavure. Aru obedivu jorojīni járajarama névure máre.

¹¹Obedivu borocurivu “Jūmenijicui yávaiyede coyucaipōecubu yu” arí, ũbenita coycaríduivu, pōevare jujovarādarājarama. ¹²Dinũmu maquinóre obedivu pōeva uraró baju āmenore darājarama. Que baru obedivu pōeva ũbenajarama apevu pōevare. ¹³Ūbenita ñai ju ayu yure ũi yainũmuita, ũ macyũme ji meadaimu. ¹⁴Mamarũmure yávaiye méne Jūmenijicui jaboteinora coyiye javvu cainoa joborōacavure, ne jápiarājīyepe aivu diede. Que baru cainoa joborōacavu iye yávaiye méne coreóvaivu barājarama. No yóboi jāravu cūiquíye bu.

¹⁵Ūbenita iye vaiquíye jipocai, ñai ũmu pare amecu núcyũme nore, Jūmenijicui cuicōjemenore ũre, yópe Daniel amicucu Jūmenijicui yávaiyede coyucaipōecu bácu ũi coyiye báquipedeca. Caivu jári boroteivu iye toivaiyede me dápijarārí caiye iyede. Ñai ũmure járajaramu mija. ¹⁶Judeacavu dupini ñujararí cūracūai, ne jidué boje ñai ũmure. ¹⁷Aru ñai cūrami puenora cuscuy, ũi dupini nuiyede, ēmeni, darí, ñavaríducuy

ñi apejijene, ecobejacurí ñi cūrami.
¹⁸ Aru ñai jiore memecuyu, ñi dupini
 nuiyede, copainumejacurí, ñiducuyu ñi
 cuitótecaje puenocacajede. ¹⁹ iCōmaje
 ārojarajarama ina nomiva micava
 bārājivū dijāravua baquiyéde! iAru ina
 nomiva nēmajina nuri dajocabevure
 cvarājivū märe pare ñājinajarama
 dijāravua baquiyéde! ²⁰ Jēniajara
 Jūmenijicuque iye vaibéquiyepe aivū
 ocorūmure aru jabūvāijāravū sábadore
 märe.

²¹ 'Dijāravua baquiyéde pōeva űrarō
 ñājinajarama. Nōpe paiye cubevū
 cāreja, mamarumumata Jūmenijicu
 ñi cuedarí bñinūmure pu caride
 märe. Aru cainūmua cubequiyebu.
²² Jūmenijicu ñi javaiyobedu dijāravua
 ñājiovaquijāravua baquiyéde, caivū
 yaijēbu. Meadaimara cubejebu. űbenita
 Jūmenijicu javaiyocuyume dijāravua
 ñājiovaquijāravua baquiyéde, ñi
 beoimara māvavure boje.

²³ 'Dijāravua baquiyéde apecu ñi
 aru mūjare yōpe, "Jājara. iÑainecabe
 Cristo!" o apecu ñi aru mūjare,
 "iÑñurecabe Cristo!" náre ju abejarā.

²⁴ Que teni obedivū borocurivū darí,
 coyurājarama "Cristobu yū". Aru
 apevū märe Jūmenijicui yāvaiyede
 coyucaridurājarama. űbenita
 Jūmenijicui yāvaiyede coyucaipōeva
 baju āmenajarama na. űrarō pōeva
 ne jāmene aru ne ñarí majibede
 märe ñarājarama, jujovaiyuridivū
 Jūmenijicui beoimara māvavure.

²⁵ űbenita me jājara mūja. Coyūyūbu
 mūjare ne borore, mūje majinajiyepē
 ayu, ne darājiye jipocai. ²⁶ Que baru
 apevū ne aru "Jājara. Ñai Cristo cubi
 pōecubenoí", nūmejara mūja nore.
 Aru apevū ne aru "Jājara. Ñai Cristo
 cubi tucubū jívūi", ju abejarā ne nōpe
 coyūiyede.

²⁷ 'Jūmenijicui daroimū māvū űmūpe,
 yaroinope nūquiyebu ji copaidaquijāravū
 baquinóre. Yōpe no yaroino pēoiyepē
 cavarōi, aviá dainocapūravure jocarí
 pu aviá doinocapūravūita, caivū pōeva
 ne jārajiyepē ayu nore, nopedeca

copaidacuyumu yū. Aru caivū
 pōeva jārajarama ji copaidaquiyede
 ijāravūi. ²⁸ Āri yayiyū bāvūi curōi, noi
 cōjjinajarama cavava. Nopedeca caiye
 iye ji coyūiyede jāivū, majinajaramu
 mūja ji copaidaquino joabenore, ji
 ñājiovaquinore pōevare, ne āmeina teiye
 boje, arí buedejame Jesús.

**Jūmenijicui daroimū māvū űmūpe ñi
 copaidaquino**

(Mr 13.24-37; Lc 12.39-40, 17.26-30,
 34-36, 21.25-33; Ap 1.7, 6.12-13)

²⁹ Bediōva cojedeca Jesús, yōpe arí,
 coyūrejame ñūjare:

— Cūinājāravū dijāravuacajāravū
 baquinói, iye űrarō ñājiniburu
 yōboi, aviá ñemitēcuyume. Aru
 aviá ñamicacū märe pēomēcuyume.
 Na abiácova turājarama cavarōre
 jocarí. Aru caivū ina parurivū curivū
 cavarōi cūjinajarama. ³⁰ Dinūmu
 maquinóre Jūmenijicui daroimū
 māvū űmūpe ji copaidaquiyede
 jādovaiye jāroquiyebu cavarōi. Aru
 caivū pōeyajuboacavū ijāravūcavū
 chīorí orājarama. Dinūmu maquinóre
 jārajarama yūre, Jūmenijicui daroimū
 māvū űmūpe, dayūre ocopeniboai,
 űrarō paruéque, jādovāñūre meacu
 bajure. ³¹ Que teni trompeta āmicuriyo
 japuiyore japuiye pare bñijéque, ji
 āngelevare darocuyumu yū. Nācapūravū
 cōjjiovarājarama Jūmenijicui beoimara
 māvavure, caivū aviá dainocavūre aru
 caivū aviá doinocavūre märe, cainoa
 joborōacavure.

³² 'Majijarā yo mūje jāinore. Icu jocusū
 higueraçu āmicuricūre yoca yuiyede,
 majivū mūja űjūgūmu joabenore.

³³ Nopedeca jāivū caiye iye teiyede,
 majinajaramu mūja jāravū cūino
 joabenore. ³⁴ Jāve coyūyūbu mūjare:
 Apevū ijāravūi curivū yaibédeca cāreja,
 vaiquiyebu caiye iye yōpe ji coyūiyepē.
³⁵ Caino cavarō, aru caino joborō märe
 cūiquiyebu. Yōpe ji yāvaiyepedeca jāve
 vaiquiyebu.

³⁶ 'űbenita dijāravū baquinóre
 aru diora baquinóre ñame majibema.

Ángeleva, ina curívũ Jūmenijicũque cavarõ mearoi, aru yu, Jūmenijicũ mácu máre, majibevũ ñũja. Quénora jipacu majibi dijāravũ baquinóre.

³⁷ Dijāravũ baquiyéde,

Jūmenijicũ daroimũ mácu ũmũpe ji copaidaquijāravũ jipocai, cũquiyebu nópe ānijāravũ Noé mácu curijāravũ báquepe. ³⁸ Ānijāravũ báquede, muiváibo daquiye jipocai, caivũ pōeva āivũ barejaquémavũ, aru ũcuivũ barejaquémavũ. Ũmũva purũbuoivũ barejaquémavũ. Aru jivũ barejaquémavũ némaromivare, ne purũbuorājiyepe aivũ. Nópe tedejaquemavũ, Noé mácu jiađocũ uracũre ecoijāravũ bácarõita. ³⁹ Ũbenita ne bjarājiyede coreóvabedejaquemavũ, pũ muiváibo daiyeta. Aru caivũ ina pōeva corĩ bjarējaquemavũ na mácavũ. Nopedeca baquiyébu Jūmenijicũ daroimũ mácu ũmũpe ji copaidaquiyede. ⁴⁰ Dinũmũ maquinóre pũcarā ũmũva memenajarama ne jioi. Cũinácu nũvaimũ macũyáme, yũre ũi jũ aiyẽ boje. Aru apescu mautescũyũme, yũre ũi jũ abe boje. ⁴¹ Pũcarā nomiva jĩorajarama ne cũrami jivũ. Cũinácu nũvaimo macođóme, yũre õi jũ aiyẽ boje. Aru apesco mautescođome, yũre õi jũ abe boje.

⁴² Que baru me jájara mũja. Mũja majibevũ ji copaidaquijāravũre, ji jabotequiyede mũjare. ⁴³ Ñai cũrami upacu majibebi aipiyede ñavaipõescu dacũyũre. Majicu baru ñavaipõescu ũi daiyede, coreni, ecoicõjemeni, ñavaicõjemejebu ũi cũramiquede. ⁴⁴ Aru mũjare máre meadaiye janvũ. Que baru yu máre, Jūmenijicũ daroimũ mácu ũmũpe, dacũyũtu mũje corebeorai yũre, arĩ buedejame Jesús.

“Memecaiřõescu jũ ayũre aru memecaiřõescu jũ abecũre” jári dápíarĩ ne đarājiyepe aino
(Lc 12.41-48)

⁴⁵ Bediõva jári dápíarĩ ñũje đarājiyepe arĩ, buedejame Jesús:

—Coyũquijivũ mũjare ũi borore ñai memecaiřõescũre jũ ayũre ũi

jabocũre aru majicũre máre. Ñai cũrami upacu coreicõjescũyũbe ñai memecaiřõescu majicũre, ũi jíquiyepẽ ayũ yebacavũre ne ārajivẽva caijāravũ.

⁴⁶ Ñai cũrami upacu copaini dayũ earu ũre memecaiřõescũre đayũre yópe ũi cõjeinope, torojucũyũbe ñai memecaiřõescu, cũrami upacu ũi jíquiyẽ boje ũre bojedaino mearore. ⁴⁷ Jáve coyũyũbu mũjare: Ñai cũrami upacu coreicõjescũyũbe ñai memecaiřõescũre caiye ũi cũvaede. ⁴⁸⁻⁴⁹ Ũbenita ñai memecaiřõescu, jũ abescu baru ũi jabocũre, “Ji jabocũ maume dabecũbe” arĩ, aru āmeina đayũ baru ũi yebacavũre aru yebacarõmivare máre, urarõ āri aru ũcuri pacotecũyũbe ũ.

⁵⁰ Que teiyede ũi jabocũ dacũyũbe ñai memecaiřõescu ũi corebejāravũ baquinói aru ũi majibeora baquinói máre. ⁵¹ Aru ñai jabocũ jarũvaicõjescũyũbe ũre jũjovavũre ne jarũvainoi, ũi ñájiquiyepẽ ayũ noi. Nore chĩoivũ orĩ, cũrājarama pōeva. Aru jararĩ cõpi cũrajarama na, arĩ buedejame Jesús.

“Caiřõescũre paivũ bojurõmivare” jári dápíarĩ ne đarājiyepe aino
(Lc 12.35, 13.25)

25 ¹ Yópe arĩ, jári dápíarĩ ñũje đarājiyepe ainoque buedejame Jesús:

—Dijāravũ baquinói, ji copaidaquijāravũ, Jūmenijicũ jaboteino yópe baquiyébu caiřõescũre paivũ bojurõmiva ne đaiye báquepe. Ina bojurõmiva, ne pẽoibũare náre coapa ĩni, copũ etaquemavũ ñai purũbuoyũre ũi daiyede. ² Cũinápũrũpe paivũ nácvũ majibevũ batequémavũ. Aru apenvũ cũinápũrũpe paivũ nácvũ majidivũ batequémavũ. ³ Ina majibevũ, ne nũvaiyede ne pẽoibũare, neore nũvametequemavũ. ⁴ Ũbenita ina majidivũ, ne nũvaiyede ne pẽoibũare, nũvaquemavũ ne neobũare máre neoque. ⁵ Ñai purũbuoyũ ũi dabe boje cãreja, caivũ ina bojurõmiva cãquemavũ.

⁶ Ũbenita ñami corica baji cođoboboyede jápiaquemavũ na.

“Jájara. Ñai p̄r̄ub̄uoy daibi. Ére copu etajarā m̄ja”. ⁷Diede jápiarī, caiv̄u ina bojur̄ōmiva coedaquemav̄u. Aru ne p̄oib̄uare meadaquemav̄u na. ⁸Que teni ina majibev̄u, yópe arī, j̄eniaridudemav̄u ina majidiv̄uare, “Ñuje p̄oib̄uare cođaibuatamu. Que baru j̄járā ñujare majiówarijino m̄je neoquede”, aridudemav̄u na. ⁹Ūbenita ina majidiv̄u, yópe arī, coȳquemav̄u náre, “Bi, j̄ibev̄u m̄jare. Neo eabequiyebu ñujare aru m̄jare máre. Quénora neore bojedaino bojedar̄ñujara m̄ja, ñajiv̄u m̄jeva”, aquemav̄u na. ¹⁰Ne neore bojedar̄ñuiyede, ñai p̄r̄ub̄uoy daquemav̄u. Ina bojur̄ōmiva meadaiv̄u b̄acav̄u ecoquemav̄u éque, ārajiv̄u toroj̄uve teinoi. Aru no c̄rami jedevacobede biequemav̄u. ¹¹No yóboi ina bojur̄ōmiva meadabev̄u b̄acav̄u edaquemav̄u toroj̄uve teiñami máre. Aru yópe arī, “M̄, ñuje jabocu, voacajacu ñujare”, j̄eniaridudemav̄u. ¹²Ūbenita ñai p̄r̄ub̄uoy yópe aquemav̄u náre: “J̄ave coȳyubu m̄jare: J̄iv̄u ānev̄u m̄ja. M̄jare coreóvabev̄u ȳ”, aquemav̄u ñi ina bojur̄ōmiva majibev̄uare, arejame Jesús.

¹³Aru buede n̄rejame Jesús:

—Que baru meadaimara m̄jara m̄ja, m̄je majibe boje ye j̄arav̄uare aru ye órare máre ji copaidaquiyede, m̄jare meadaive jauquinore, arejame Jesús.

“T̄aturare” jári d̄apiarī ne đar̄ajiyep̄e aino

(Mt 8.12, 13.12, 22.13; Mr 4.25;

Lc 8.18, 13.28, 19.11-27)

¹⁴Yópe arī, jári d̄apiarī ñuje đar̄ajiyep̄e ainoque buedejame Jesús:

—Dij̄arav̄u, ji copaidaquij̄arav̄u baquinói, J̄ūmenijicui jaboteino yópe baquiyébu c̄inác̄u ñm̄u areno jaborōi n̄sc̄ȳu ñi đaiye b̄aquepe. Ūi n̄quiȳe j̄ipocai, órejaquemav̄u ére memecaip̄ōvare, epec̄ȳu ñi c̄vaede náque, ne jári coreñajiyep̄e aȳu diede. ¹⁵C̄inác̄u n̄ac̄ure epequemav̄u c̄inár̄p̄ure paimil turava t̄aturaturavare. Apec̄u

n̄ac̄ure epequemav̄u p̄scamil turava t̄aturaturavare. Aru ap̄c̄ure epequemav̄u c̄inámil turava t̄aturaturavare. Ne majiépe epequemav̄u náre coapa. Caiye iyede epeniburu yóboi, n̄quemav̄u ñai ñm̄u. ¹⁶Ñai memecaip̄ōescu jacop̄ȳu b̄acu c̄inár̄p̄ure paimil turava t̄aturaturavare bojedac̄n̄quemav̄u dieque. Aru eaquemav̄u ape c̄inár̄p̄ure paimil turava t̄aturaturavare. ¹⁷Quédeca ñai memecaip̄ōescu jacop̄ȳu b̄acu p̄scamil turava t̄aturaturavare bojedac̄n̄quemav̄u dieque. Aru eaquemav̄u ape p̄scamil turava t̄aturaturavare. ¹⁸Ūbenita ñai memecaip̄ōescu jacop̄ȳu b̄acu c̄inámil turava t̄aturaturavare ūc̄n̄quemav̄u jaborōi, yavesc̄ȳu diturava, ñi jabocu t̄aturaturavare.

¹⁹Obedij̄arav̄u yóboi, ñai jabocu copaidaquemav̄u. Corevac̄uquemav̄u ne bojedaiyede ñi epeiye b̄aquepe náre. ²⁰Ñai jacop̄ȳu b̄acu c̄inár̄p̄ure paimil turava t̄aturaturavare n̄quemav̄u ñi jabocu yebai. Navaquemav̄u caip̄sc̄ap̄sc̄ure paimil turava t̄aturaturavare. Aru aquemav̄u, “M̄, ji jabocu, m̄ epeáv̄u c̄inár̄p̄ure paimil turava t̄aturaturavare yure. Diede bojedarī, ív̄u ȳu ape c̄inár̄p̄ure paimil turava t̄aturaturavare”, aquemav̄u ñi. ²¹Que baru ñai jabocu aquemav̄u ére, “Mearo đarebu m̄. Đaiv̄u m̄ yópe đaiye jauépe. Mi mearo đaiye boje quíjinoque, epequijiv̄u m̄re p̄ueno baju. Caride toroj̄usc̄ȳu m̄ m̄, yópe ji toroj̄upe”, aquemav̄u ñai jabocu. ²²Aru ñai jacop̄ȳu b̄acu p̄scamil turava t̄aturaturavare n̄quemav̄u ñi jabocu yebai. Ūi jaboc̄ure aquemav̄u, “M̄, ji jabocu, m̄ epeáv̄u p̄scamil turava t̄aturaturavare yure. Diede bojedarī, ív̄u ȳu ape p̄scamil turava t̄aturaturavare”, aquemav̄u ñi. ²³Que baru ñai jabocu aquemav̄u ére máre, “Mearo đarebu m̄. Memecaip̄ōescu meacubu m̄. Đaiv̄u m̄ yópe đaiye

janépe. Mi mearo ðaiye boje quíjinoque, erequijivü müre püeno baju. Caride torojüncuyümu mü, yöpe ji torojüneré”, aquemavü ñai jabocu.

²⁴ Ûbenita ñai jacopuyü bácu cüinámil turava täuturaturavare nüquemavü üi jabocu yebai. Üi jabocure aquemavü, “Mü, ji jabocu, jidojacübu mü. Mü ñümu apescu üi epeiye báquede. Aru mü jēñümu apescu üi oteiye báquede. ²⁵ Que baru jidüvü yü müre. Aru yavecaca mi täuturare joborō jívüi. Yüi cüvavü mi täuturare”, aquemavü ü. ²⁶⁻²⁷ Ûbenita ñai jabocu aquemavü üre, “Mü, memecaipöescu ämecübu. Jüracücübu mü. Yü ñüre apescu üi epeiye báquede aru jēñüre apescu üi oteiye báquede majicüvacari, epecünüri jaüridurebu müre ji täuturare täutura epeiñami. Mi que ðaru, copaini ðayü jacopüjebu yü ji täuturare püeno baju, diñamicavü ne bojedaiye báque cojióri”, aquemavü ñai jabocu. ²⁸ Que baru ñai jabocu apevüre ícöjeni aquemavü, “Íjara üre jocarí yo cüinámil turava täuturaturavare. Aru jíjarä ñai caipücapüruape paimil turava cüvacure. ²⁹ Caivü cüvarivü jacopüräjarama püeno baju, cüvaräjivü urarō baju. Ûbenita caivü dápiavüre cüvarivüpe apevü püeno, caiyede náre ícüyümu yü. ³⁰ Aru ñai memecaipöescu yure cadatebecure jaetovajarä joai ñeminoi, üi ju abe boje yüre, üi coatequiyepé aivü yüre jarüvarí. Noi pöeva chíoivü orí, cüräjarama. Aru jararí, cöpi cürajarama na”, arí buedejame Jesús.

Jesús üi bojedaino caivüre yöpe ne ðaiye báqupe

(Mt 16.27, 19.28; 1 Co 8.12; He 13.3)

³¹ Yöpe arí, coyürejame Jesús:

—Yü, Jümenijicüi daroimü mácu ümüre, meacu baju dacuyümu íjarävüi. Aru caivü ina ángeleva daräjarama yúque. Edaríburu yöboi, dobacuyümu jabocüi dobarō mearora. ³² Ji jípacai cójijinajarama caivü íjarävüi joborōacavü. Yöpe oteiäimarare coreipöescu üi boiyepe ovejavare ini

cabravare jocarí, popedeca beocuyümu yü ina pöevare. ³³ Yöpe üi epeiyepe ina ovejavare üi meapüravüi aru ina cabravare üi cäcopüravüi, popedeca beorí epecuyümu yü ina pöevare.

³⁴ Beoríburu yöboi, acuyümu yü, caivü ne jabocu, ina pöeva meara ji meapüravüi curivüre, “Dajarä müja. Müjamu jípacüi mearo ðacaimara. Ji jaboteimara májara müja. Jípacü Jümenijicü üi cuedaiye báquedata caiyede, meadacarejaquemavü yo jaboteinore müjare boje. ³⁵ Yüre ävüé ijiteavü. Aru äiyede jivävü müja yüre. Yüre cüiñóavü. Aru ücuiyede jivävü müja yüre. Joai cucüdacacu müje yebai. Aru yüre copü etavü müja. ³⁶ Cuitótecaje cüvabotecacu yü. Aru ji doiyeva jivävü müja yüre. Íjimü matecácu yü. Aru ji yebai curädavü müja. Jabova ne buoimü matecácu yü ämeina teivüre jēni jacoíñami jívüi. Aru yüre járadavü müja noi”, acuyümu müjare. ³⁷ Que ayüre, ina pöeva meara, ji meapüravüicavü, yöpe aräjarama yüre: “Mü, nüje jabocu, çaipiyede müre äuyaiyüre jári, äiyede jiarí nüja? çAipiyede müre cüiñóimüre jári, ücuiyede jiarí nüja? ³⁸ çAipiyede müre joai cucüdayüre jári, copü etarí nüja? çAipiyede müre cuitótecaje cüvabecüre jári, mi doiyeva jiarí nüja? ³⁹ çAipiyede müre íjimüre aru müre ne buoimüre jári, járadarí nüja?” aräjarama yüre. ⁴⁰ Aru yü, caivü ne jabocu, acuyümu náre: “Jäve coyüvübu müjare: Müje cadateiyede cüinájicu ina jívücacure parübecureca, yüre müje cadateiyepébu”, acuyümu yü.

⁴¹ Dinümu maquinóre ina pöeva ämenare, ji cäcopüravüi curivüre yöpe acuyümu yü: “Nüjara müja yüre jocarí. Müjamu jípacüi ämedaimara. Nüjara müja toabo cüiméboi. No meadaino mácaröre abujuvai jabocüi curöre üi ángelevaque. ⁴² Yüre ävüé ijiteavü. Ûbenita äiyede jíbeteavü müja yüre. Yüre cüiñóavü. Ûbenita ücuiyede jíbeteavü müja yüre. ⁴³ Joai cucüdacacu müje yebai. Ûbenita yüre copü etabeteavü müja. Cuitótecaje cüvabotecacu yü. Ûbenita ji doiyeva

jíbeteavū mūja yure. Ijimu matecácu yu. Aru jabova ne buoimū matecácu yu āmeina teivure jēni jacoĩnami jívui. Ëbenita yure járadabeteavū mūja”, acuyūmu yu. ⁴⁴Que ayure, ina pōeva āmena, ji cācopūrāvucavu, yópe arājarama yure: “Mū, ñuje jabocu, çaipiyede mure āuyaiyure, o cūinómure, o joai cucūdayure, o cuitótecaje cuvabecure, o ijimure, o jabova ne buoimure jári, ùbenita mure cađatebetearı ñūja?” arājarama na. ⁴⁵Aru yu acuyūmu náre: “Jāve coyūyubu mujare: Mūje cađatebede cūinájicu ina jívucacure parubecureca, yure mūje cađatebepedecabu”, acuyūmu yu. ⁴⁶Aru nácapūravu nurajarama toabo cūiméboi, ñájinajivu cainumua. Ëbenita ina meara ecorājarama ji jaboteinore, me curājivu cainumua, arí coyurejame Jesús.

Jesús ũi coyūino ne jēnainore ũre yóboimia

(Mr 14.1-2; Lc 22.1-2; Jn 11.45-53)

26 ¹Caiye iyede Jesús coyurí buojarí, yópe arejame ñūja ũi bueimarare: ²—Majivu mūja. Pascua āmicurijāravu aru páure bucure ðaiye cube āiye torojūve teinumu pucajāravua jipocai barejávū cāreja. Aru dinumu maquinóre yure, Jūmenijicui daroimū mácure ũmupe, jēni jínajarama ji mauvare, ji yaiquíyepa aivu jocucjaravena, arejame Jesús.

³Dinumure sacerdotevare jaboteipōecu Caifás āmicurejame. Apevu sacerdotevare jaboteipōeva aru judíoiva bucūva cōjjijidejaimada ñai Caifás ũi cūrami.

⁴Cōjjivū, ne bajumia majicarejaimada Jesúre hujovari jēni, boarí jaruvarājivu yavenina. ⁵Ne bajumia arejaimada:

—Torojūve teinumu ũre jēmenajarevu maja. ũre jēnu torojūve teinumu, pōevacapūravu jorojīni, majare boarí jaruvaivyūjebu, arejaimada ina judíoivai jabova.

Cūináco nomió ōi mumijue yuaino Jesúre

(Mr 14.3-9; Lc 7.37-38; Jn 12.1-8)

⁶⁻⁷Dinumure Jesús ũi cuede Betania āmicurīmajinoi, Simón pojeyu bácu

cūrami tuoiva yebai āivu barejacará ñūja. Que teni cūináco nomió darejaco Jesús yebai. Ico nomió davarejaco cūinábu ũmujūribu boribure, mumijūricoro curibure. Iye mumijue, nardo āmicue, pare mearo corajūrejavū. Aru pare bojecue barejávūya. Que ðarı ico nomió yuarejaco caiye iye mumijuede Jesúi jipoburá. ⁸Ëbenita ñūja Jesúi bueimara ōi nópe ðaiyede jári, jorojīni arejacadá:

—¿Aipe teni iye mumijuede jaruvadóba ō? ⁹Diede bojedarı, uraró boje ĩni, jíye jaujebu ōre cuve cuvabevure, arejacadá ñūja.

¹⁰Ëbenita Jesús, diede coreóvayu, arejame ñūjare:

—¿Aipe teni ico nomióre cārijovaiuvurū mūja? Ōi ðaiye yure mearotamu.

¹¹Cainumua ina cuve cuvabevu curājarama mūjaque. Ëbenita yu cubecubu mūjaque cainumua. ¹²Ōi yuayiede dicorore yurá, meadacaibico ji bajure, ne jaruvarājíyepa ado. ¹³Que baru jāve coyūyubu mujare: Cainoa joborōai ijāravui pōeva ne coyūiyede iye yávaiye méne ji meadaiyede pōevare, iye ōi yure ðacaiyede máre coyurājarama, ne ārurajíyepa aivu ōre, arejame Jesús.

Judas ũi jēni jino Jesúre

(Mr 14.10-11; Lc 22.3-6)

¹⁴No yóboi cūinácu ñūjacacu, doce paivu Jesúi bueimaracacu, ũi āmiá Judas Iscariote, nurejameđa ina sacerdotevare jaboteipōeva yebai. ¹⁵Ñai Judas náre jēniari jārejameđa:

—¿Ji Jesúre jēni jídu mujare, aipino jínajivurū mūja yure? arejameđa ũ.

Aru treinta paiturava plataque ðaiturava tauturatūravare jídejaimada ũre. ¹⁶Que baru dinumumata Judas jári, coreni búrejameđa yavenina, jēni jícyu Jesúre.

Jesús ũi āino ũi bueimaraque

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷Páure bucure ðaiye cube āiye torojūve teinumu mamabuijāravu

barejávã. Aru dijãravure Jesús yebai nuri, jëniari járejarã ñuja, ñi bueimara:

—¿Ari nuri, mure maje Pascua jãravuque ãiyede meadacarãjidica ñuja? arejarã úre.

¹⁸ Aru arejame Jesús:

—Jerusaléi nuri, ñai ñmu, ji aimu mácu, ñi cãrami ñujara muja. Úre yópe ajarã muja, “Maje bueipõecu aibi, ‘Joabëjñotamu ji yaiquino. Que baru mi cãrami ãquijivu yu Pascua jãravuquede ji bueimaraque’, aibi maje bueipõecu”, ajarã muja, ñujare arejame Jesús.

¹⁹ Úre ju arí, ñmaroi nuri, ðarejarã ñuja yópe Jesús ñi aiyede báquepedeca. Noi Pascua jãravuque ãiyede meadarejarã ñuja. ²⁰ Que teni meadarí bujarí, nainú baji, aviá ñi doríburu yóboi, darí dobarejame Jesús tuoiva yebai, ñuja ñi bueimara doce paivuque.

²¹ Ñuje ãiyedeca, Jesús arejame ñujare:

—Jãve soyuyubu mujare: Mujacacu cüinácu yure ji mauvare jëni jícyume ñi, arejame Jesús.

²² Que baru chioivã barejarã. Aru ñuja coapa yópe arí búrejarã Jesúre:

—iMu, ji jabocu, que ðabecubu yu! ¿Múcarí? arejarã ñuja coapa.

²³ Que arí, Jesús arejame ñujare:

—Cüinácu mujacacu jóyu páure jorotãmica yúque, ñ macuyúme ji mauvare yure jëni jíyu. ²⁴ Yu, Jümenijicüi daroimu mácu ñmure ijãravü, ji yaijãravüi nucuyumu yu, yópe Jümenijicüi toivaicõjeiye báquepedeca ñi yãvaiyede. Ubenita ámeno vaicuyume ñi, ñai yure jëni jíyu bacuyá. Ñai nópe ðacuyü, ñi põetebedu meajebu, arejame Jesús.

²⁵ Judas, úre jëni jícyu, arejame úre:

—Mu, bueipõecu, yu ámevu mi soyuimã nópe. ¿Múcarí? arejame Judas. Úre arejame Jesús:

—Mátamu ji soyuimã nópe, arejame Jesús.

²⁶ Ñuje ãiyedeca, páure ñni, Jümenijicure torojuede jídejame Jesús. No yóboi, páure cotãvarejame. Aru ñujare coapa jídejame.

—Páure ãjara muja. Diedecabu ji bajupe, jádovaiye ji yaiquino ñujare boje, arejame ñujare Jesús.

Aru ãrejarã ñuja.

²⁷ Úcuidore máre ñni, torojuede jñi Jümenijicure, ñujare jídejame Jesús, yópe arí:

—Jëni, úcuri, veorí, úcujara caivu muja coapa. ²⁸ Diedecabu ji jivepe, jádovaiye ji yaiquino ñujare boje, Jümenijicüi árumetequiyepu ayu muje ámeina teiyede. Jümenijicu “Yópe ðajarã muja, boropatebenajivu ji jáino”, ñi yóbocarõ soyuino mácarõre põevare árujarãmu muja, muje úcuiyede diede. ²⁹ Soyuyubu mujare: Quénora vino úyaicorore úcuñmu yu ijãravure. Ubenita ãnijãravü, jipacüi jabotequimã maquinóre, bedióva cojedeca úcuri jácyumu yu, arejame Jesús ñuja ñi bueimarare.

Aru úcurejarã ñuja.

Jesús ñi soyuino Pedroru ñi “Jesúre yu coreóvabevu” aquinore
(Mt 28.16; Mr 14.26-31; Lc 22.31-34; Jn 13.36-38)

³⁰ Ñuje áriburu yóboi, Salmos ámicue yuríayede yuríarejarã ñuja. Yuríarí bujarí, no cãracü Olivocüi ámicuricüi nurejarã ñuja, Jesújã. ³¹ Mái nuri, arejame Jesús:

—Yure dajocarí nurãjãmu muja. Yure vaiquiyede Jümenijicu toivaicõjeneaquemavu, yópe arí: “Ovejare coreipõecure boarí jaruvacuyumu yu. Aru coateni nurãjãma na, ovejava”, arí toivaicõjeneaquemavu. ³² Ubenita ji yainíburu yóboi, Jümenijicu ñi nacovaiyede yure yainore jaruvarí, muje jipocai nucuyumu Galileai, arejame Jesús.

³³ Que ayure, Pedrocãpãravü arídjarejame úre:

—Caivu apavu ne dajocarí ñuiyedeca, yúcapãravü mure jocarí ñmecu yu, arídjarejame.

³⁴ Aru Jesús arejame úre:

—Jãve soyuyubu mure: Carí ñani cáyu ñi órejaquiyepu jipocai, yóbecue baju

“Jesúre yu coreóvabevu” asuyutu mu,
arejame Pedrore Jesús.

³⁵ Ûbenita Pedrocapûravu soru ayu
barîdurejame:

—Máque yure ne boarí jarûvaruta,
“Jesúre yu coreóvabevu” abecubu yu,
arîdurejame Pedro.

Aru ñuja coapa nôpe arîdurejacaã.

Jesús Getsemaní ñi jëniaino

Jãmenijicuque

(Mr 14.32-42; Lc 22.39-46)

³⁶ No yóboi Jesús nurejame ñuja ñi
bueimaraque Getsemaní ãmicurô. Nore
earí, arejame ñujare:

—Yui dobarí corejarã muja ji
Jãmenijicuque boroteiyede ãnoi,
arejame Jesús.

³⁷ Ñujacavu Pedrore aru ina pûcarã
Zebedeoi mârare máre nuvarejame
Jesús. Chîoñu baju ãmeno vaidéjameã.

³⁸ Que teni arejameã náre:

—Yu ãmeno chîori dápiavu ji
yaiquínore. Yui mauteni, jári capujarã
muja, arejameã ñi.

³⁹ Jipojica báque nuñu Jesús, ñuatutari,
mori turejameã joborôita. Aru
Jãmenijicuque boroteyu barejameã ñi:

—Mu, jipacu, yure cari vaiquíye
vaibéjadeni. Caiyede ðaiye majicutamu
mu. Ûbenita ji urôpe ðabejacu. Quénora
mi urôpe ðajacu mu, arejameã jípacure
Jesús.

⁴⁰ Ina ñi bueimara yóbecurã ne yebai
copainuri, náre cáivure earejameã
Jesús. Aru arejameã Pedrore:

—¿Cúinãorajie cámevûva coreiye
majibenaru muja yáque? arejameã
Pedrore.

⁴¹ Caivu náre arejameã:

—Coreni, Jãmenijicuque borotejarã
muja, abujuvai jabocu mujare ñujovarí,
ãmeina tede ðabequiyepere aivu. Muje
ûme ue parurô mariduiyu. Ûbenita
muje baju ðaiye bajure parûbevû muja,
arejameã náre Jesús.

⁴² Cojedeca Jãmenijicuque
borotecunurejameã, yópe arí:

—Mu, jipacu, yure cari vaiquíye jaru,
mi urôpe ðajacu mu, arejameã Jesús.

⁴³ Ûi bueimara yóbecurã ne yebai
copainuri, náre cáivure earejameã
Jesús cojedeca. ãmei vuo ijidejavûya
náre. ⁴⁴ Que baru Jãmenijicuque
ñi boroteiye báquepedeca bedióva
borotecunurejameã, yóbecue
borotecuñu. ⁴⁵ Boroteni bujarí, ne yebai
copainuri, arejameã náre:

—¿Cáivurû muja cáreja? Jede,
quénoramu. Iora jave eaiyu. Ijaravui
dayu bácu, Jãmenijicui daroimû mácu
ûmupe, ãmeina teivu ne jëni jínajimûmu
yu. ⁴⁶ Nacajajara muja. Soru nurajarevu.
Yure ji mavure jëni jícuyu daibi,
arejameã Jesús.

Jesúre jëni ne nuvaino

(Mr 14.43-50; Lc 19.47, 21.37,

22.47-53; Jn 18.2-11)

⁴⁷ Jesús ñi boroteiyedeca, edarejame
Judas, ñujacacu, doce paivucacu.
Obedivu pôeva úque darí, boaicarovea
aru boaidua dururí edarejaima,
sacerdotevare jaboteipôeva aru judíova
bucva máre ne daroimara. ⁴⁸ Judas,
ñai Jesúre jëni jícuyu, ñi edaquíye
jipocamia nore, javeta Jesúre boarí
jaruvaiyurivure coyurejameã yópe: “Ji
jacyurí jiva nuimû macuyáme muje
jënajimû. Ûre jëjara”, arejameã náre
Judas. ⁴⁹ Jesús yebai nurí, cúiná Judas
úre earí, arejame:

—Aru, bueipôecu, arejame Jesúre
Judas.

Que arí, úre jiva nuri jacyurejame.

⁵⁰ Que teni Jesúcapûravu jëniari
járjame Judare:

—Mu, jícu, cáipe teni dacurû mu?
arejame Jesús.

Que teiyede, Judaque edaivu bácvu
Jesúre jënejaima na. ⁵¹ Nôpe teiyede
jáinata, ñujacacu cúinácu, Jesúsque
curivucacu, ñi boaicarovede tatorí,
duarí, ñni, sacerdotevare jaboteipôecu
ñi yebacacure juijórí, najuárejame ñi
cámucare.

⁵² Nôpe ðayure jári, Jesús arejame úre:

—Mi boaicarovede meadajacu
mu. Caivu boaicarovede ñni,
pôevare boarájivu, yainájarama na

boaicarovequedeca. ⁵³¿Coreóvabenaru muja yure jipacu cadateni buojayure? Ji jëniaru jipacure, cüiná darojebu yure doce paiyajuboa ángeleva obedivü ne yajuboare, ne cadatenajiyere ayü yure. ⁵⁴Ûbenita ji nópe daru, vaibéjebu yópe Jümenijicui toivaicójeiye báquepe üi yávaivede, arejame ñujare Jesús.

⁵⁵Dinümüre Jesús arejame ina obedivü pöevare:

—¿Tatorí ñavaipöecure jëivüpe yure boaicaroveaque aru boaiduaque jëni jacorádivüñü muja? Járavua coara muje jëneboi Jümenijicui cürami bueyu batecácu yu. Arurí mujaque cüsure, yure jëni jacobeteavü muja. ⁵⁶Ûbenita caiye iye vaivu yópe Jümenijicui toivaicójeiye báquedepedeca ina üi yávaivede coyucapöeva mácvare, arejame náre Jesús.

Que tedurata ñuja üi bueimara úre jocarí, dupini nurejarcá ñuja.

Jesúre ne ñuvaino judíovai jabova cójijivü yebai

(Mr 14.53-65; Lc 22.54-55, 63-71; Jn 2.19, 18.12-14, 19-24)

⁵⁷Jesúre Caifás yebai, ñai sacerdotevare jaboteipöecu yebai, ñuvarejaimada na, úre jëivü bávavu. Nore ina Jümenijicui yávaiye báquede bueipöeva aru judíova bucava ne baju cójijini borotenanurejaimada ne jabova baju. ⁵⁸Aru Pedrocápüravu joajienata Jesús yóboi nure nuñu mácu, sacerdotevare jaboteipöecui táibui ecorejameda ü. Nore ecorí, Jümenijicui cüramine coreipöevaque dobarejameda ü, jácuyü aipe vaiquíyede Jesúsre.

⁵⁹Na sacerdotevare jaboteipöeva aru caivu ne cójijinocavu Jesúsre ámechororájivure vorídurejaimada, úre boarí jarüvayüvü. ⁶⁰Ûbenita obedivü Jesúsre borocurí, ámechororídivürecu, eabedejaimada na. No yóboi, pucará darí, borocurí ámechororejaimada Jesúsre:

⁶¹—Ñai pöecu yópe arí coyuyure jápiacará ñuja: “Íñami Jümenijicui cüramine jarüvarí majivü yu. Yóbecurijárvua jarüvaríburu yóboi

apedámi dacuyümu”, áme Jesús, arejaimada na.

⁶²Que teni ñai sacerdotevare jaboteipöecu nacajari, arejameda Jesúsre: —¿Coyurí majibecurü mu? ¿Ne nópe ámechoroiyede, aipe ayurü mu? arejameda Jesúsre.

⁶³Ûbenita Jesúsapüravu bi arejameda. Dinümü arejameda Jesúsre sacerdotevare jaboteipöecu:

—Yu coyucójeivü müre Jümenijicui arücu cue boje. ¿Máru ñai Cristo, Jümenijicui mácu? Coyujacu ñujare, arejameda ü.

⁶⁴Aru Jesús ju ayu arejameda úre: —Quédeca mi aimütamu yu. Ûbenita yúcapüravu coyuyübu mujare: Jümenijicui daroimü mácvare ümüpe, yure, járajaramu muja, Jümenijicui parücü mearpüravü dobacure. Aru ji ocopeniboai jödari émeiyede máre járajaramu muja, arejameda náre Jesús.

⁶⁵Que ayure, ñai sacerdotevare jaboteipöecu jorojini, üi baju doiyede tatorí, jadevarí, arejameda:

—Ñai ümu Jümenijicure corü ámeina yávaibi. Quéhora üi ámeina teiyede coyujará muja. Apevu ne coyuiye jaubevu. Javeta muja jápiadavü. Jümenijicui uebebi ñai yópe yávayure.

⁶⁶¿Aipe adararu muja? arejameda ü.

Aru arejaimada na:

—Boarí jarüvaimü macuyüme ü, arejaimada na caivu, úre boarí jarüvaicójeivü.

⁶⁷Que arí, üi jivará jëcututurrejaimada na. Úre jara popedejaimada. Aru pëvavarejaimada máre úre. ⁶⁸Aru arejaimada:

—Mu, Cristo, coyujacu ñujare. ¿Ñame matedí pëvañu müre? úre pëvavavü arejaimada na.

Ûbenita Jesúsapüravu ye coyubedejameda.

“Jesúre yu coreóvavevu” arí, Pedro üi coyüno

(Mr 14.66-72; Lc 22.56-62; Jn 18.15-18, 25-27)

⁶⁹Pedro sacerdotevare jaboteipöecui táibui dobacu barejameda. Üi noi

dobaedeca, yebacarōmivacaco cūināco ũi yebai earejacoda. Aru arejacoda:

—Mu máre ñai Jesús Galileacacque cútevu mu, arejacoda ũre.

⁷⁰Ūbenita caivu ne jápiaiyede, Pedrocapūravu ju abedejameda ũre:

—iNācacu āmevu! Jesúre yu coreóvabevu. ¿Aipe arí, mu que adorú? arejameda.

⁷¹Que arí, táibui etarí, jedevai nuitenevei nurejameda Pedro. Aru apeco yebacarōmivacaco ũre jári, arejacoda náre, nore curivure coyuyo:

—Nai cútebi Jesús Nazarecacque, arejacoda.

⁷²Aru bedióva cojedeca Pedrocapūravu ju abedejameda:

—iNācacu āmevu! Jesúre yu coreóvabevu.

Jūmenijicu majibi jáve coyuyure, arejameda.

⁷³No yójiŕboi ina nore curivu Pedro yebai nuri, arejaimada ũre:

—Jāve mu máre nācacubu mu. Mi yávaiyeque majivu Galileacacure mure, arejaimada na.

⁷⁴Dinūmuma jáve ayure, náre pare baju arí, coyurejameda Pedro:

—iJāveneca Jūmenijicui jáinoi yu mujare coyuyutamu! iJāve ji coyubedu, Jūmenijicu āmedajacurí yure! Jesúre yu coreóvabevu, arejameda.

Ūi que aipe bajure, ũrejurejameda cáyu.

⁷⁵Ūi ũrejaiyede, ārurejameda Pedro Jesús ũi coyuiye báquede: “Cáyu ũi ũrejaiyede, jipocai, yóbecue baju Jesúre yu coreóvabevu, acuyumu mu”, arí coyuiye báquede ārurejameda. Aru ārucu, cūinā etarí, pare chíori orejameda ũ.

Jesúre ne nūvaino Pilato yebai

(Mr 15.1; Lc 23.1-2; Jn 18.28-32)

27 ¹Aviá ũi tucūmūiyede, caivu ina sacerdotevare jaboteipōeva aru judíoiva bucūva cójijidejaimada na, ne bajumia boroteni majicarājivu aipe ne boarí jarūvarājiyede Jesúre. ²Boroteni buojarí, Jesúre buorí, nūvari, jacobu ũi āmiá Pilato yebai jacorānurejaimada na.

Jesúre jēni jíyu bācu ũi yaino

(Hch 1.18-19)

³Judas, Jesúre jēni jíyu bācu ũi mauvare, coreóvayū ne boarí

jarūvarājiyede Jesúre, chíoni marejámada ũ. Chíori dápiarí, oatūvaiyurídurejameda ũi ðaiye báquede. Que baru iye tātuturavara treinta paiturava plataque ðaituravare nūvarejameda ina sacerdotevare jaboteipōeva aru ina judíoiva bucūva ne yebai. Diede náre nūvari jacopaiyovacūnūridurejameda Judas.

⁴Ne yebai earí, arejameda:

—Yūrecabu āmeina teyu bācu. Jēni jívu mujare pōecu meacure, āmeina ðabecure. Que baru muje tātuturare, muje jíye báquede yure jēni jíye bojede, jacopaiyovaquijivu mujare caride, arejameda Judas.

Ūbenita nācapūravu arejaimada ũre:

—Ye baquiyé āmevu; míyetamura die, arejaimada na.

⁵Que aivure, Judacapūravu iye tātuturare ðuarí jarūvarejameda Jūmenijicui cūrami jívu. Aru etarí, nuri, ũi ñamemure buorí, jocucu cavabui yuyurí boarí jarūvarejameda ũi baju.

⁶Die tātuturare ini, ina sacerdotevare jaboteipōeva arejaimada ne bajumia:

—Maje ðaicōjeiyepa iye tātuturare epeicōjememaramu maja Jūmenijicure jícaiyeque. Diedecabu bojedarí jíye báque pōecure ũi boarí jarūvare ðaiyede apecu pōecure. Que baru diede jíye jaubevū majare Jūmenijicure, arejaimada na.

⁷Que arí, ne baju boroteni majicarejaimada. Boroteni buojarí, iye tātuturacue jini, jiore bojedarejaimada. No jio jorodaipōecui jio bācarō marejávūya. “Apenocavu yaivu bācavure yore, ne yuarí jarūvarājinomu” arí, no jiore bojedarejaimada.

⁸No jiore bojedarejaimada tātuturacue, pōecu ũi jíye báque, apecu pōecure boarí jarūvaicōjesuyū. Que baru aivubu maja “Jivecurō” no jiore, pu caride máre. ⁹Nópe vaidéjavūya cūināturu Jūmenijicui coyūicōjeiye báquapedeca ñai Jeremías āmicucu ũi yávaiyede coyūaipōecu bācure. Yópe arí, toivaicōjenejaquemavu ũi mácure Jūmenijicu:

Ĩnama iye tãuturaturava treinta paiturava plataque ðaituravare. Apevu Israecavu bojedaicõjeneaquemavu nópe paiye bojede úre boje. ¹⁰Iye tãuturave jini bojedadama no jiore, jorodaipõecui jio bácarõre. Que teni yópe Jãmenijicui ðaicõjeino mácarõpedeca yure, ðadama na, arí toivaicõjeneaquemavu Jãmenijicu.

Pilato ùi jëniari jáino Jesúre
(Mr 15.2-5; Lc 23.3-5; Jn 18.33-38)

¹¹Jesús ùi eaiyede ñai jabocu Pilato yebai, núrejameða ùi jipocai. Ñai jabocu jëniari járejameða úre:

—¿Múru judíovai jabocu? arejameða.

Jesúcapúravu arejameða:

—Quédeca mi aimurecavu yu, arejameða.

¹²Ûbenita ina sacerdotevare jaboteipõeva aru ina judíova bucúva ne ãmecoroiyede úre, náre coyubedejameða Jesús. ¹³Dinũmure Pilatocapúravu arejameða úre:

—¿Jápiabecurũ caiye ne ãmecoroiyede mũre? arejameða.

¹⁴Ûbenita bi arejameða Jesús. Caiye ne ãmecoroiyede ye coyubedejameða ù. Aru ùi que yávabede cuedumañ urarõ ðápiarejameða Pilato.

Põeva ne boarí jaruvaicõjeino Jesúre
(Mr 15.6-20; Lc 23.13-25; Jn 18.38-19.16)

¹⁵No torojuve teinũmure, ñai jabocu Pilatocapúravu çjuá coapa etavavarejameða cüinácu jacoimu mácure, põeva ne etavaicõjeimure.

¹⁶Dinũmure, cüinácu ùi buoimaracacu, caivu ne coreóvaimu marejameða, Barrabás ãmicucu. ¹⁷Que baru põeva obedivu ne cójijiyede Pilato yebai, náre yópe arí, jëniari járejameða Pilato:

—¿Ñamene etavaji yu? ¿Barrabáre urivurũ mũja? ¿O Jesúre, Cristo ne aimure, urivurũ mũja? arejameða ù.

¹⁸Ina sacerdotevare jaboteipõeva Jesúre ne jorojyede majini, obedivu

põeva ne ùe boje úre, nópe náre jëniari járejameða Pilato. ¹⁹Pilato dobarejameða nore, coyucucu ina põevare ñamene ùi etavaquimure. Coyubecu cãreja, ùi dobaedeca, jímarepaco úre yópe arí, boro jarorejacoda: “Ñai ùmu Jesúre ãmedabecacu mu. Úrecabe meacu baju. Cari ñami marede decoboavu yu úre. Aru pare urarõ cãrijivu yu, iye decoboaiye báque boje. Que baru me ðajacu mu” arí, boro jarorí majicarejacoda jímarepaco Pilatore.

²⁰Ina sacerdotevare jaboteipõeva aru ina judíova bucúva máre ina obedivu põevare jëniacõjeneaimeða Pilatore, ùi etavaquiyepa aivu Barrabáre aru ùi boarí jaruvaquiyepa aivu Jesúre. ²¹Bedíova cojedeca ñai jabocu Pilato jëniari járejameða ina põevare:

—¿Ñamene ina pucará buoimaracacure jaetovaji? arejameða.

Aru arejaimaða:

—Barrabáre jaetovajacu mu, arejaimaða na.

²²Ne que coyurĩburu, arejameða náre Pilato:

—¿Dinũmu ñai Jesús, Cristo ne aimure, aipe ðaji yu? arejameða.

Caivu ina põeva arejaimaða:

—iÚre jocucujaravena pëvari boarí jaruvaicõjejacu mu! arejaimaða ñai jabocure.

²³—¿Yéde ãmeina tearĩ ñai? jëniari járejameða náre Pilato.

Ûbenita pueno baju coðoboborí, arejaimaða na:

—iÚre jocucujaravena pëvari boarí jaruvaicõjejacu mu! arí, coðoboborejaimaða na.

²⁴Ne que aiyede, Pilato coreóvarejameða úre ju abevure. Quédata pueno cãrijovari búrejaimaða na. Que baru ocoque joarejameða ùi pũuáre, yópe judíova ne ðaiyepa, ne jáðovaraiyepa ayu boropatebevure. ùi joaiyedeca arejameða:

—Yávacari boropatebecubu, mũje boarí jaruvavu ñai Jesúre, ùmu meacure ji jáinoi. Mũjemu die, arejameða Pilato.

²⁵Aru caivũ ina p̄eva arejaimada:

—Jau, ñajvacarĩ aru ñajemara máre boropatenajivũbu ñai ñmũ ñi yaiye boje, arejaimada na.

²⁶Ne que arĩburu yóboi, Barrabáre etavarĩ darorejamedá Pilato. Aru Jesúre jara popeicójenejamedá. No yóboi, ina churaravare Jesúre jocucjaravena p̄vaicójenejamedá Pilato.

²⁷Que teni ina churarava Jesúre ñni, ñvvari, ecovarejaimada ñai jabocu Pilatoĩ c̄urami. Nore ecovarĩ, aprevũ churarava caivure cójijovarejaimada Jesús jipocai. ²⁸Ëi cuitótecajeare Ëre duarejaimada. Jesúre p̄enocacaje, jabocui doicajepe paicaje ñemijuaricajede doarejaimada na. ²⁹Doarĩ buojarĩ, miumua c̄ateni, cainitarabu ñarĩ, ñi jipoburã ditarabure tuorejaimada na. Aru jocuyo, jabocui c̄ojeiyope paiyore, durure ñarejaimada Jesúre ñi meap̄ravũcap̄rui, yópe jabocui j̄eyepe. Ne que teimure yurivũ, jacyurejaimada na:

—Ména c̄ujacu m̄, judf̄ovai jabocu, arejaimada churarava Jesúre, ñbenita Ëre yurivũ.

³⁰Ëra j̄ecututuivũ barejaimada. Aru Ëre jipoburã iyo jocuyoque j̄adovaiũ barejaimada na. ³¹Que teni Ëre yurini buojarĩ, Ëre ne doicaje ñemijuaricaje bácarõre, no jabocui doicajepe paicajede ñni, duarĩ, ñi doicaje bácarõre bediõva Ëre doarejaimada cojedeca. Que teni, buojarĩ, Ëre ñvvari, jocucjaravena Ëre p̄vari j̄eoranurejaimada na, churarava.

**Jesúre ne p̄vari yuyaino
jocucjaravena**

(Mt 26.61; Mr 15.21-32; Lc 23.26-43; Jn 2.19, 19.17-27)

³²Ina churarava Jesúque ñvviũ, jocucjaravede ture ññũ maridurejame Jesús. Nuri, cop̄rejaima c̄uinácu ñmure, Cirene ñmicurĩmarocacure, ñi ñmiá Simón. Ëre Jesús ñi jocucjaravede tuino mácarõre tuicójenejaima na, churarava.

³³Ina churarava ñvwarejaima Jesúre c̄uracũ Gólgota ñmicuricũi. P̄e

jipobucũ aiyurõmu no. ³⁴Noi ñcuiye upiáteiyé báque curijororu c̄urejavũ vino ñyaicoro mirra ñmicue jocucu cuidóque, churarava ne ñvvaiye báquede. Die ñcuiyede j̄nidurejaima Jesúre, Ëre ijibequiyepe aivũ. Ëbenita ñ ñcuri j̄ari, ñbecu, ñcumenejame. ³⁵Que teni Ëre jocucjaravena p̄vari j̄eorejaima. Aru ne yajuiyede ñvwarejaima. Cainijidua etayede j̄ari, Jesús ñi doiyede náre coapa ñnejaima na, Ëre p̄vvaivũ bácvũ. ³⁶Que teniburu yóboi, dobarejaima, j̄ari cap̄rãjivũ Ëre. ³⁷Jocucjaravena ñi jipobu p̄enoĩ toivaino j̄enejavũ, aprevũ ne majinajiyepe aino Jesúre boarĩ jaruvaiũ ne dápiainore, “¿Aipe teni Ëre boarĩ jaruvarama na?” ne aino. Yópe aiyurejavũ no toivaino: “Ñaime Jesús, judf̄ovai jabocu”.

³⁸Ëque máre p̄vari boarĩ jaruvarejaima p̄carã tatorĩ ñvvaip̄evare, ape p̄carõa jocucjaravearã. C̄uinácu Jesús ñi meap̄ravui aru aprevũ ñi c̄acop̄ravui curejaima. ³⁹⁻⁴⁰Ina vainánuravũ j̄ari, ne jipobuare c̄ujjovari, ñmeina yávrejaima Ëre, yópe ari:

—Mu, J̄ümenijicui c̄uramine jaruvaiyvucacu aru yóbecurij̄aravũa yóboi diñamine meadaiyvucacu, mi bajure meadajacu m̄. Mu J̄ümenijicui mácu baru, caride jocucjaravede dajocarĩ, ñmeni, dajacu m̄, arejaima Jesúre ina vainánuravũ.

⁴¹Nopedeca ina sacerdotevare jaboteip̄eva, ina J̄ümenijicui yávaiye báquede buaip̄evaque, aru ina judf̄ova b̄vcuque máre, ne baju yurivũ Jesúre, yópe arejaima:

⁴²—Aprevure meadavacac̄vvacari, ñbenita ñi bajure meadarĩ majibebi ñ. Cristo, maja Israecavu maje jabocu baru, jocucjaravede dajocarĩ ñmeni dajacurĩ ñ. Que ñaru, maja ju arãjaramu Ëre. ⁴³Ë “Yábu J̄ümenijicui mácu”, ayu bateáme. Ërecabe ju ayu J̄ümenijicure aru “J̄ümenijicu yure cadatecuyume”, arĩ dápiayu. Que baru J̄ümenijicu, Ëre ucũ baru, cadatejacurĩ caride, arejaima na.

⁴⁴Aru ina p̄carã tatorĩ ñvvaip̄eva p̄vvaimara mácvũ máre Ëque, nopedeca ñmeina yávrejaima Ëre.

Jesús ùi yaino

(Mr 15.33-41; Lc 8.2-3, 23.44-49; Jn 19.28-30; He 10.20)

⁴⁵ Jāravu corica baji ñemié turī darejavū caino joborōi. Pū yōbecuriora yóboita vaidéjavū. ⁴⁶ Aru yōbecuriora bajita, iye ñemié tuyede dajocaiyede pare bujité coðoboborī, yávarī darorejame Jesús:

—Elí, Elí, ¿lama sabactani? Nópe aino: “Mu, ji mearore jímū, mu, Jūmenijicu, ¿aipe teni yre dajocarī, nuñuru mu?” aiyrō marejavū.

⁴⁷ Que ayure, apevu nore núrivicavū úre jápiarī, ũbenita jápiarī eabeni, arejaima:

—Jápiarā. Elfare órejaiibi ũ, arejaima na.

⁴⁸ Dinumure maumena nácacu cúyarī, jaubore ñni, uyovarejame vino úyaicoro upiáricoroque. Aru dijaúbore aboðorā buorī, jēori, jarurerejame Jesús ùi úcuquiyepa ayu. ⁴⁹ ũbenita apevu arejaima:

—Corejarā. Járarevū Elías jōðavacudayure úre, arejaima na.

⁵⁰ Cojedeca Jesús pare bujité coðoboborī, yaidéjame ũ. ⁵¹ Dinumu ùi yaitávabomica Jūmenijicui cūramicacaje uracaje coricópavaicaje bácarō quéda corica baji jaðeni nurejavūya, puenocatuvavai búrī pū cāchinocatuvavaita. Joborō cújidejavū. Aru cūraboa uraboa pārejavū máre.

⁵² Yaivu bácvu ne jaruvaino voarejavūya. Obedivu Jūmenijicui pōeva yaivu bácvu nacovaimara marejáimaða na, arurājivu bedióna cojedeca.

⁵³ Aru ina nacovaimara mácvu ne jaruvainoare jocarī etarejaimaða, Jesús ùi nacajariburu yóboi. Etarī buojarī, Jerusalén āmicurīmaroi ecorejaimaða. Obedivu pōeva járejaimaða náre, yaivu bácvu nacovaimara mácvure. ⁵⁴ Nore Jesús bácvure cocorī núrivu barejáima apevu churarava ne jabocūque. No joborō cújinore jári, aru caiye iye vaiye jidojaede máre, pare dápiavu cuicumarejaima. Aru arejaima:

—Jāveneca Jūmenijicui mácvu baju batecúbe ñai, arejaima na.

⁵⁵⁻⁵⁶ Obedivu nomiva máre cocorī núrivu joajēmia curejaima. Ne jēneboi curejaima cūináco nomió, Magdala āmicurīmarocaco, ōi āmiá María, aru apeco nomió, ōi āmiá María máre, ico Santiago aru José népaco, aru apeco máre, Zebedeoí mārāi paco. Jesús ùi cuede Galilea āmicurōi caðateivu barejáima úre. Aru apevu nomiva, ina daivu bácvu úque Jerusalén āmicurīmaroi, curejaima nore.

Jesús bácvu jaruvaimu ne pōe jaruvainoi

(Mr 15.42-47; Lc 23.50-56; Jn 19.38-42)

⁵⁷ Dijāravu bácarō, nainú, aviá ũi dorīburu yóboi, cūinácvu ũmu nurejameða Pilato yebai. Ũ marejáimeða cūve cūvcu, Arimatea āmicurīmarocacu, ũi āmiá José. Ũ máre Jesús bácvu bueimaracacu barejáimeða ũ. ⁵⁸ Pilato yebai nuri, Jesús bácvu baju bácarōre jēniacunurejameða ũ. Ũi jēniayede Pilato churaravavure jícōjenejameða Jesús bácvu baju bácarōre úre. ⁵⁹ Aru Jesús bácvure jocucujaravede jōðavari, ñni, meacaje docucubecaje lino āmicuricajeque ũ mácvure cūmarejaimaða Joséjá. ⁶⁰ Ũ mácvure nuvari, cūracobe mamacobe, José jicobei, Jesús bácvure jaruvarejaimaða Joséjá. Nore jaruvarīburu yóboi, apeturava cūratuvare ñni, jaturuvari, dicobede bidejaimaða. Aru bieniburu yóboi, nurejaimaða na. ⁶¹ Ne Jesús bácvure jaruvayede curejaimaða nore María Magdalacaco aru apeco María máre, dobarivu dicobe jipocai.

Churarava ne jári coreniduino Jesús bácvu baju bácarōre ne jaruvainore

(Mt 16.21, 17.23, 20.19; Mr 8.31, 9.31, 10.33-34; Lc 9.22, 18.31-33)

⁶² Dijāravu yóbocajāravui, maja judiova maje jabuóvaujāravu sábadoi, ina sacerdotevare jaboteipōeva aru fariseovacavu cójjidejaimaða Pilato yebai. ⁶³ Aru úre arejaimaða:

—Mũ, ñaje jabocu, ārurivubu ñija ñai jujovayu bācu ñi aiyede arucu cāreja, yópe arí: “Yóbescurijāravua ji yainiburu yóboi nacajacuyumu yu yainore jaruvari”, ayu bateáme. ⁶⁴Que baru churaravare me jári coreicōjejacu mũ Jesús bācuí baju bācarōre ne jaruvainore yóbescurijāravua vaiyeta. Nópe ñajacu, ñi bueimara ne ñavamenajiyepo ayu ñi mácuí baju bācarōre ñamine. Ñi mácuí baju bācarōre ñavaivũ baru, “Jesús nacajaimi yainore jaruvari”, arí coyurājarama pōevare. Nópe ñaivũ baru, ñamei jujovajebu pōevare ne mamarũmu jujovaiye báque pueno. Ñi mácuí “Nacajacuyumu” ñi aiyede báqueque pōevare jujovarĩduame. Ubenita “Nacajaimi” ne ájuroeque, pōevare jāve jujovajebu, arejaimađa na Pilatore.

⁶⁵Pilatocapūravũ arejaimađa náre:

—Churaravare cuvavũ muja. Náre jarorĩ me coreicōjeyara Jesús bācuí baju bācarōre ne jaruvainore, arejaimađa Pilato.

⁶⁶Que baru churaravare jarorĩ, cūraturava uraturava Jesús bācure jaruvaicobede bieituravare me jājare ñaicōjenejaimađa na. Aru dituravare jājare ñarĩburu yóboi, no ne jaruvainore me jári coreicōjenidurejaimađa churaravare.

Jesús ñi nacajaino yainore jaruvari

(Mr 16.1-8; Lc 24.1-12; Jn 20.1-10)

28 ¹No judíovai jabuóvaujāravũ sábadu yóbocajāravũ, sumana buijāravũ, domingo, miadáe tuquiye jipocai, María Magdalacaco apeco Maríamaque járanurejaimađa Jesús bācuí baju bācarōre ne jaruvainore. ²Aru urarō baju joborō cújidejavũya, ángele ñi ěmeni daiye boje cavarō mearo Jūmenijicui cūrōre jocarĩ. Ñai ángele, Jūmenijicui daroimu, ěmeni, ñarĩ jāturuvarajaimađa diva cūrava uravare, no cūracobede bieiturava bācarōre. Dituravare ñi jāturuvariburũ yóboi, dobarejaimađa diturava puenora. ³Ñai ángele pēoñupe páyu ārójacu barejaimađa, yópe yaroinope. Ñi

cuitótecaje boricaje baju barejávũya. ⁴Ñe jáivũ, ina churarava dicobede jári coreniduivũ jidurivũ bididejaimađa, ne jidué boje. Bidini, turejaimađa joborōi, yópe yaivũ bācavũpe. ⁵Aru ñai ángele arejaimađa ina nomivare:

—Jidubegarā muja. Coreóvaivũ yu voivure Jesúre, ne jocucujaravena pēvaivũ mácure. ⁶Yore cubebi ñi. Javeta nacajaimi, yópe ñi aiyede báquepedeca. Dajarā. Járijide apa. Ñi baju bācarōre ne jaruvaino mácarōre jájara muja. ⁷Maumena muja muja. Yópe arí, coyujarā ñi bueimare: “Jesús nacajaimi yainore jaruvari. Nuscuyume muje jipocai Galilea ámicurijoborōi. Noi járajaramu muja ěre”, coyujarā. Jede, quénoramũ ji coyũino mujare, arejaimađa náre.

⁸Que arĩburu yóboi, maumejiena dicobede etarĩ, nurejaimađa ina nomiva, jidurivũ ubenita pare torojurivũ. Cuyarĩ coyurānurejaimađa iye borore ñi bueimare. ⁹Ne nuiyede, Jesúvacari náre copurejaimađa. Aru náre jacyurejaimađa. Ñi yebai nuri, mori turejaimađa joborōi ñi jipocai. Aru ñi cubobare jēni, mearore jídejaimađa ěre, yópe judíova ne ñarĩ cōmajiyepo. ¹⁰Que teni Jesús arejaimađa náre:

—Jidubegarā muja. Jivure yópe arí, coyurānujara muja, “Galileai nuri, noi yure járanujara muja, aibi Jesús”, náre ajarā muja, arejaimađa dinomivare Jesús.

Churarava Jesús bācuí baju bācarōre jári coreniduivũ bācavũ ne coyũino borocurō

¹¹Ina nomiva ne nuiyedeca, apevũ ina churarava, Jesús bācuí baju bācarōre jári coreniduivũ bācavũ, Jerusalén ámicurĩmaroi nurejaimađa. Coyurānurejaimađa ina sacerdotevare jaboteipōevare caiye iye vaiye báquede náre. ¹²Ina churarava ne coyũiyede jápiaivũ bācavũ, ina sacerdotevare jaboteipōeva ina judíova bucũvaque cójjijidejaimađa, majicarajivũ ne bajumia. Cójjini buojarĩ, urarō tāturare jídejaimađa ina churaravare. ¹³Aru yópe arí, borocucōjenejaimađa náre:

—Yópe ajarā mŭja pōevare, “Jesús báci bueimara ñamine darí, ñje cáiyede, ñavarama ũ máci baju bácarōre”, ajarā mŭja. ¹⁴Aru ñai jabocu ũi jápiaru diede, “Ina churarava boropateivubu ne jári corebe boje” arí dápíaru, ñjavacari meadarájaramu caiyede úque, ũi ñájine ðabequiyepa aivŭ mŭjare, arejaimađa ina judíovai jabova.

¹⁵Que baru iye táuturare ñni, borocurí coyurejaimađa ina churarava, yópe ina sacerdotevare jaboteipōeva ne coyucōjeiye báquepe. Aru no coyúno borocurōre coyŭvaivubu judíova ne bajumia pŭ caride máre.

Jesús ũi coyucōjeino ũi yávaiye méne

(Mt 26.32; Mr 14.28, 16.14-18; Lc 24.36-49; Jn 20.19-23; Hch 1.8)

¹⁶Ñja once paivŭ Jesúi bueimara Galilea ámicurijoborói nurejacařá. Yópe

Jesús ũi nuicōjeiye báquepe, cŭracúi nurejacařá ñja. ¹⁷Noi úre jári, mearore jídejacařá. Ũbenita apevŭ ñjavacavŭ, “Jesús ámemi” arí, ju abedejaima. ¹⁸Aru Jesús arejame ñjare:

—Caiye paruéde cŭvavŭ yŭ. Jipacu Jŭmenijicu parure ðaibi yŭre, ji cōjequiyepa ayŭ caivŭ cavarō mearocavŭre aru caivŭ ijárvŭcavŭre máre. ¹⁹Que baru jaroivŭ yŭ mŭjare. Buenanŭjara caivŭ ijárvŭcavŭre ji yávaiye méne, ne ju arájiyepa aivŭ diede, aru ne ðarájiyepa aivŭ ji ũrōre. Ocoque jáđovajara ina ju aivŭre jipacu Jŭmenijicure; aru yŭre, Jŭmenijicui mácure; aru ñai Espíritu Santore máre. ²⁰Buejará náre, ne ðarájiyepa aivŭ caiyede yópe ji ðaicōjeiye báquepe mŭjare. Aru yúvacari cŭcŭyŭtu mŭjaque cainumŭa, pŭ ijárvŭ buojaiyeta, arejame ñjare Jesús. Quénoramŭ.